

DV ELLVM

MARTIN
BECANI, SOCI
TATIS IESV THEO-
LOGI,

CVM GVILIELM
Tooker, Anglicanae Theolo-
Professore, & Decano Ec-
clesiae Lichfeld-
densis.

DE
Primatu Regis Angliae



M O G V N T I A E
Ex officina typographica Ioannis Albi

Anno M. DCXII.

AL A R T I M I
B E C A M I S O C I E

C O M M I T T E E
F O R T H E P R O P O S I T I O N

W H I C H
W A S
P R E S E N T E D
T O T H E
A S S E M B L Y
O F T H E
C O N G R E S S
O F T H E
U N I T E D
S T A T E S
O F A M E R I C A
I N T H E
Y E A R
1 8 6 2



U N I T E D
S T A T E S
O F A M E R I C A



REVERENDISSIMO

Domino Domino

GISBERTO

MASIO EPI-

SCOPO:

Generoso Baroni Domino

ANTONIO A GRO-

BENDONCK GVBER-

natori:

AMPLISSIMO SENATV,.

fortissimo ac bellicosissimo Populo

Buscoducensi:

MARTINVS BECANVS.

EX Germania in
Angliam, ad Du-
ellum provocatus
sum, in causa Regia. Et quia
A 2 istac

4 PRÆFATIO.

*istac transeundum mihi est,
 ex itinere salutare vos volui.
 Imò debui, tùm vestrà, tùm
 meâ causâ. Apud vos olim
 vixi, cùm adolescens essem, &
 literis humanioribus operam
 dedi. Ab eo tempore, multa de
 vestra fide, pietate, constan-
 tia, zelo ac fervore, armis de-
 nique pro patria & religione
 fortiter fœliciterq; susceptis,
 per hos proximos triginta an-
 nos, quibus absens à vobis
 sum, crebris literis ac rumori-
 bus intellexi. Et non ita pri-
 dem, de insigni in nostram
 Societatem affectu, deq; nouo
 Collegio, quod nostris Patri-
 bus,*

*bus, vestra liberalitate, adornare pergitis, certo nuntio ad me perlatum est. An deceat, his omnibus dissimulatis, ad vos quidem venire, sed mox insalutatos deserere? Non possum. Et tamen propero. Si nescitis, res sic habet. Bien-
nium est, cum Primatum Pontificium defendi; Anglicanum seu Regium oppugnaui. Interea, conspiratio inter Academicos in Anglia facta est; & certus designatus, qui pro causa Regia, Duello mecum decertaret. Is est Guilielmus Tooker, Anglicanae Theologiae Professor, & Ec-
clesia*


clesiæ Lichfeldensis Decanus; qui circumstantibus Anglis, in arena me expectat. Itaque festinandum mihi est, ne causa Pontificia deesse videar. Si molestum non esset, Spectatores vos esse cuperem; si non omnes, saltem aliquos ex vobis. Nec periculum de vita est. Jam antè exploravi vires Aduersarij. Homo quidem arrogans ac fastuosus, sed minimè robustus est, nec in hac palestra exercitatus. Putat se vicisse, si clamet, si multa garriat, si brachia iactet, si aerem verberet, si in pedes se extollat, si conuitiis me insectetur.

etetur. Sed hac non tantifacio; nec ob talia metuendus est. Aliud est, aerem verberare; aliud, hostem ferire. Ego, causæ equitate confisus, facile efficiam, ut succumbat. Nec plura jam. Valet, & si non corporibus, saltem animis presentes este.

Torus vester


Martinus Becanus.


▲ ◆ LECTO-



LECTORI.

A Vdi, quisquis es, Lector. Nuper Guilielmus Tookerus, Anglicanae Theologiae Professor, & Ecclesiae Lichfeldensis Decanus, scripsit in me librum, cum hoc titulo : *Duellum, siue singulare certamen cum Martino Becano Iesuita, futiliter refutante Apologiam & monitoriam Praefationem Serenissimi ac pientissimi Iacobi Regis magnae Britanniae, Authore Gulielmo Tooker, sacrae Theologiae Professore, ac Decano Ecclesiae Lichfeldensis.* Hæc causa est, cur hunc meum libellum, quem Adversario oppono, etiam Duelli nomine appellandum putem. Vale.





D V E L L V M
 M A R T I N I B E -
 C A N I,
 Cum
 G V I L I E L M O T O O K E R O,
 De
 P R I M A T V R E G I S
 A N G L I Æ.



Rouocas me ad Duellum,
 Tookere, in causa Regia: &
 Primatum Serenissimi Regis
 Iacobi, quem exiguo libello
 nuper oppugnaui, singulari
 certamine contra me tueri ac propugnare
 vis. Non defugio. Video autem triplici
 armorum genere instructum te esse, fastu,
 conuitiis, eloquentia. Fastum & arrogan-
 tiam in eo maximè ostendis, quod magni-
 ficè de teipso sentias ac loquaris; de me
 contemptim. In qua re imitaris Daretem
 Virgilianum, qui cum Entello cestibus de-

pugnaturus, mirè iactabat se in omnem partem. Sic planè tu facis: *Mee*, inquis, *partes sunt*, ut *districto gladio stem in acie hac argumentationis*, & *mucrone petam latera ac transuerberem*. Et iterum: *Neque video*, cur non in isto certamine, *Theologus Mateologum, Orthodoxus Iesuitam, Decanus Recanum* perbellè possit *pertundere*. Bene habet Tookere: *pertunde me*, si potes; & *districto gladio pete hoc latus*. Non fugiam.


2. Conuitia, quibus me proscindis, obuia sunt. Vocas me *Terra filium, Emissarium Satanae, incendiarium, sanguinarium*, nihil nisi *maestationem ac cadem Principum meditantem ac impiè dacentem, garrulum, rusticum, importunum, inuerecundum, iracundum in oculis, asperum in voce, ranunculum in luto & cæno procreatum, curiosum, stolidum*. Videris de industria, hæc verborum emblemata comportasse, ut disertus appareres. Sed ego ista contemno. Nec me feris, sed aerem verberas.

3. Eloquentiam tuam non culpo, sed laudo. Vtinam cum pari modestia & eruditione coniuncta esset. Nec tamen nego, quin alicubi modestus & eruditus sis. Hic certè, ubi malæ causæ patronus es, eloquens esse potes, eruditus esse non potes.


Siquid

Si quid tamen adferes, quod laude dignum iudicabitur, non dissimulabo.

4. Hæc igitur, Tookere, tua arma sunt. Ego istis pugnare non didici. Soleo abstinere à fastu, conuitiis, grandiloquentia; & rem, de qua disceptatio est, modeste, breuiter ac nudè proponere & examinare. Et sic tecum nunc agam. Audi igitur. Disceptamus de Primatu Regis in Ecclesia Anglicana. Ego in meo libello, quem de hac re scripsi ante biennium, conatus sum ostendere, eiusmodi Primatum nullo iure ac titulo deberi Regi. Tu, in tuo Duello, contrarium statuis: & quæ à me dicta sunt, putas refutari abs te posse. An ita sit, disquirendum nunc est. Nec commodius id fieri potest, quàm si repetam singula libelli mei capita; & singulis seorsim subiiciam breuem Commentarium, in quo discutiantur ea, quæ à te in contrarium adferuntur. Igitur libellus meus sic incipit.



LIBELL



LIBELLVS


MARTINI BE-

CANI,

De

Primatu Regis Angliæ.

I.



Erenissimus ac Potentissimus Rex Angliæ Iacobus in sua *Apologia* pro iuramento fidelitatis, & in *monitoria Prefatione* ad Imperatorem, Reges & Principes, conatur ostendere, se in Anglia, & vnumquemque Regem in suo regno, esse caput seu Primate[m] Ecclesiæ. Episcopos & Pontificem, non modò in temporalibus, sed etiam in Ecclesiasticis rebus, inferiores esse Rege ac Principe sæculari. Hunc Regis Primatum confirmat Sacellanus ipsius in libro, qui inscri-

inscribitur, *Tortura Torti*; lute, an iniuria, deinceps inquirendum est.

2. Sed ne confusio oriatur, status controuersię prius explicandus, & certa ab incertis secernenda sunt. Ac primò, non disceptamus de primatu in temporalibus. Illum quisque Rex in suo regno legitimè habeat. De Primatu Ecclesię, seu de potestate Ecclesiastica, tota lis est. Solet autem distingui triplex potestas Ecclesiastica. Vna ordinis; altera iurisdictionis interioris; tertia iurisdictionis exterioris. Prima refertur ad Sacramenta conficienda & ministranda. Secunda ad regendum populum Christianum in foro conscientię. Tertia ad eundem populum regendum in foro exteriori. Igitur ad potestatem ordinis spectat, Baptismum & sacros ordines conferre, Eucharistiam conficere & ministrare, Chrisma & oleum infirmorum benedicere. Ad potestatem iurisdictionis interioris, ius dicere in foro.

foro conscientia, id est, absolueret vel ligare. Ad potestatem iurisdictionis exterioris, Synodum conuocare, & in ea præsidere, constitutiones condere, causas audire & cognoscere, controuersias dirimere, beneficia conferre, ministros Ecclesiæ constituere, delinquentes excommunicare. Vno verbo, omnium causarum & controuersiarum, quæ ad fidem & religionem pertinent, iudicem agere.

3. Quando ergo quæritur, an Rex Angliæ in suo regno habeat Primatum Ecclesiæ, debet sic intelligi, an habeat triplicem illam potestatem excellentiori modo, quàm Episcopi & Pontifex? Vel, quod idem est, an in triplici illa potestate, supra Episcopos & Pontificem collocandus sit?

4. Duo certa sunt; vnum in controuersia. Primò, certum est, Regem non vindicare sibi potestatem ordinis; & multò minùs in ea superiore

riorem esse Episcopis & Pontifice. Non enim ordinatus & consecratus est ad Sacramenta conficienda & ministranda, ut per se constat. Nec in hoc genere supra Episcopos & Pontificem collocari vult. Nouit enim, quid in simili causa dictum sit Oziæ Regi, 2. Paralipom. 26. 18. *Non est tui officii Ozia, ut adoleas incensum Domino, sed Sacerdotum, qui consecrati sunt ad huiusmodi ministerium.*

5. Secundò, æquè certum est, non habere potestatem iurisdictionis interioris, quæ in absoluendo & ligando consistit. Non enim Regibus, sed Apostolis & Sacerdotibus dictum est: *Accipite Spiritum sanctum, quorum remiseritis peccata, remissa sunt eis, & quorum retinueritis, retenta sunt.*

6. Tota ergo controuersia versatur circa potestatem iurisdictionis exterioris, an eam Rex habeat in suo regno, & quidem supra Episcopos & Pontificē? id est, an Rex sit supremus Iudex

Iudex Ecclesiasticus, qui sua auctoritate à nullo alio in terris dependente, possit conuocare Synodos, iis præsidere, controuersias circa fidem & religionem dirimere, beneficia conferre, Episcopos constituere & deponere, & similes actus religionis exercere? Hoc enim est, habere Primatum in Ecclesia, quoad gubernationem exteriorem. Ut autè distinctè examinetur hæc quaestio, hoc ordine procedendum est.

- 1 *An Rex iure naturali habeat Primatum Ecclesie?*
- 2 *An iure diuino Veteris Testamenti?*
- 3 *An iure diuino Noui Testamenti?*
- 4 *An iure ciuili vel canonico?*
- 5 *An consensu doctorem hominum?*
- 6 *An titulo praescriptionis?*
- 7 *An secundum principia suae doctrinae?*
- 8 *Si Rex non habet primatum Ecclesie, quodnam illius officium circa Ecclesiam sit?*



COMMENTARIUS.

1. **I**N primo aditu, hæc mihi obiicis, Tookere; quod nec Regem Angliæ, nec Sacellatum eius; appellem eo nomine, quo debui; quod indignis modis laceſſam Regem; quod ſolitus ſim Regibus maledicere, & Pontifici adulari; quod ſim curioſus in aliena Republica & Eccleſia; quod non intelligam ſtatum quæſtionis de Primatu Regis; quod nullum ſeruem ordinem ac methodum; quod multa dicam, nihil probem. Singula expendamus:

2. Primùm ergo obiicis, quod Regem Angliæ non appellem eo nomine, quo debui. Sic enim ſcribis in Duello tuo, pag. 2. *Quem* (Regem Iacobum) *ut nam honoris cauſa, & virtutum ſuarum admirabilitate, nominaffes, ſicut debuiffes.* Reſpondeo. Ego plus honoris illi tribui, quàm tu. Vocauì illum *Sereniſſimum & Potentiſſimum* Regem: tu, *Clariſſimum* appellas. Niſi plus ſit in Anglia, *Clariſſimum* vocari, quàm *Sereniſſimum & Potentiſſimum*: quod ſanè vix credam. Sed fortè hoc te malè habet, quod *Angliæ*, non *Britanniæ* Regem

appellarim. At, si hoc peccatum est, non ego duntaxat, sed vos Angli quoque culpandi estis. Nam vester Henricus Salcolbrigienſis in ſuo libello, qui inſcribitur, *Refutatio examinis Becanici*, rarò *Britannia*, ſapè *Anglia* Regem vocat. Deinde, neſcis Tookere, quod Philoſophis notum & uſitatum eſt, ſapè à principali parte ſumi denominationem? Britannia veſtra tres partes complectitur, Angliam, Scotiam, Hiberniam. Inter eas præcipua eſt Anglia. Igitur Regem veſtrum, qui & Angliæ, & Scotiæ, & Hiberniæ, vno verbo, totius Britanniæ Rex eſt, non malè Angliæ Regem appellaui. An non Rex Philippus, multorum regnorum Dominus eſt? Plurimum ſanè, quàm veſter Rex. Et tamen non agrè fert, Hiſpaniæ Regem ſe appellari. Quid tu etgo vitio mihi vertis, quòd, vt alterum Hiſpaniæ, ſic alterum Angliæ Regem nominarim? Uſus ſic obtinet. Nec tamen velim eſſe tam pertinax, quin alium titulum illi tribuam, ſi ita viſum illi ſit.

3. Secundò obiiſcis, quòd nec Sacellatum debito honore proſecutus ſim. Sic enim habes pag. 3. *Quem tu vocas Sacellatum, nos omni laude digniſſimum, Epiſcopum Elienſem dicimus: at quem virum? doctiſſimum fortiſſimumque Eccleſiæ Heroem,*

DE PRIM. REGIO. 19

roem, omni literatura abundantissimum, qui propter multiplicem ac reconditorem. Theologiae cognitionem, apud nos πενταγλωττός, utpote, qui literis Latinis, Graecis, Hebraeis, Chaldaicis ac Arabicis instructissimus sit, iure merito appellatur. Respondeo. Non sciui esse Episcopum Eliensem. Nec tunc erat, cū scripsi. Si interea Episcopatum adeptus est, non inuideo. Possum tamen dubitare, an ideò Episcopus vocari debeat. Et sanè, tu me facis dubitare. Scribis enim, pagina 6. non semper valere argumentum à coniugatis; & negas hanc consequentiam: *Rex Angliae habet Primatum Ecclesiae Anglicanae: ergo est Primas Ecclesiae Anglicanae.* Igitur scrupulum mihi iniicis, quid de hac simili consequentia dicturus esses, *Sacellanus habet Episcopatum Eliensem: ergo est Episcopus Eliensis.* Item quae de hac, *Tookerus habet Decanatum Ecclesiae Lichfeldensis: Ergo est Decanus Ecclesiae Lichfeldensis.* Quòd addis, Sacellanium esse virum magnae eruditionis, & quinque linguarum peritissimum, non video, quid ad rem faciat. Nisi fortè, adulandi gratià, id dictum à te sit. Sed tamen, qui tot linguas callet, utinam vel vnà verum loqueretur. Et cū Græcè instructissimus sit, cur & te, & Typographum

non monuit, vt pro barbara voce *πεντε-
γλωτῆ*, veram ac germanam *πεντί-
γλωτῆ*, substitueretis?

4. Tertiò obiicis, quòd indignis modis
laceffam Regem Angliæ. Sic enim scribis
in dedicatoria Epistola: *Audax negotium,
hominem priuatum personam publicam &
sacrosanctam; terra filium, eundemq; Iesui-
tam & emissarium Satana, clarissimum, do-
ctissimumq; Regem, vinctum Domini, indi-
gnis modis laceffere. Quid est enim indi-
gnius, quàm plurimas contumelias iniuriasq;
imponere optimo Regi, perinde ac si ageret
cùm Iuliano atheo, & Constantio Ariano?*
Respondeo. Quòd me terræ filium & E-
missarium Satanae appellas; lubens tibi
ignosco. Facis, vt Calvinistæ solent. Hoc
miror, quòd dicas, me indignis modis Re-
gem laceffere, & plurimas contumelias ac
iniurias illi imponere. Ab hoc vitio puto
me esse alienissimum. Et, si vnquam alias,
maximè in hoc libello, quem tu oppu-
gnas, modestiam sectatus sum. Nec opus
est longa probatione. Lector, quisquis est,
iudicet. Fateor, in Præfatione libelli me
scripsisse, sicut olim Iuliano & Constantio
Imperatoribus, in causa fidei, opposuerunt
se Patres; ita nunc Iacobo Regi, in simili
casu, resistere nos posse. Sed hæc contu-
melia

melia aut iniuria non est. Vera contumelia est, cum vos scribitis, Pontifici, tanquam Antichristo, resistendum esse.

5. Quartò obiicis, quòd solitus sim maledicere Regibus, & Pontifici adulari. Sic enim ais in Epistola dedicatòria : *Alduco ad excellentiam vestram, hoc meum Duelum, siue singulare certamen, cum Martino Becano Jesuita, Professore Moguntino, Regibus obrectare ac maledicere, Pontificibus verò Romanis assentari, eorumq; tribunalia adulari, & lambere solito.* Respondeo. Vtrumque falsum est. Imò, si modum loquendi spectes, plus honoris Regi Angliæ, quàm Pontifici videar tribuere. Regem, ut dixi, voco *Serenissimum & Potentissimum*. Pontificem, non nisi *Pontificem* aut *Papam* appello, sine alio verborum splendore. Tu potius in hoc genere peccas. Nam & Pontifici calumniosè maledicis, & filio Regis immodicè assentaris. Illum vocas *Antichristum*: hunc, *Decus & delitias humani generis, Principem orbis terrarum maximum, Catholicæ religionis propugnatorem acerrimum*.

6. Quintò obiicis, quòd sim curiosus in aliena Republica & Ecclesia. Sic enim habes in eadem Epistola : *Jesuita hic Primatus Regio de repente factus est inimicus:*

curiosus in aliena Republica & Ecclesia.
 Respondeo. Si idèd curiosum me dicis in
 aliena Ecclesia, quia oppugno Primatum
 Anglicanum, cum in Anglia natus non
 sim; tu certè non minus curiosus es, qui
 oppugnas Primatum Romanum, cum
 Romæ natus non sis. An & Regem tuum
 curiosum esse dixeris? Nam & ille Pri-
 matum Romanum oppugnare, & Im-
 peratorem nostrum, aliosque Reges &
 Principes, ad eum deferendum hortari
 ausus est. Sed audi Tookere. Non cu-
 riosi, sed Christiani hominis officium est,
 oppugnare hæreses & errores, in quam-
 cunque Rempublicam vel Ecclesiam irre-
 pserint. Hoc Apostoli, hoc antiqui Patres,
 hoc moderni Scriptores faciunt. Cur mi-
 hi idem non liceat?

7. Sextò obiicis, quod disputem de Pri-
 matu Regis, & tamen non intelligam,
 quid sit Primatus. Sic enim habes in Epi-
 stola dedicatoria: *Jesuita hic nescit, de*
quibus affirmat, ius & fas legemq, Prima-
tus in regno Britannie penitus ignorat, nec
in singulis magis sapit, quàm beta. Respon-
 deo; Primatus Ecclesiæ duplex est: alter
 verus, qui iure diuino debetur Pontifici,
 non solum in regno Britannia, sed etiam
 in toto orbe Christiano: alter fictus, qui
 huma-

humana præsumptione tribuitur vestro Regi. Prior Primatus est antiquissimus, cuius ignorantiam obiiicere mihi non potes. Consistit enim, vt dixi, in suprema potestate & iurisdictione, qua Pontifex gubernat Ecclesiam in foro exteriori: & officia eius sunt, quæ supra recitauimus. Huiusmodi autem Primatum non conuenire vestro Regi, in hoc libello demonstratum à me est. Posterior Primatus, res planè noua, & nuper sub Henrico Octauo excogitata primum est: nec vsquam ferè, nisi in Anglia vsurpatur. Huius vim ac naturam, si ignorem, mirum non est. Vos ipsi, qui in Anglia estis, ignoratis. Hoc apertè patet ex vestro dissidio. Dissidetis enim in his puunctis. 1. An Primatus vestri Regis sit Ecclesiasticus & spiritualis? Thomsonius & Burhillus negant; alii affirmant. 2. An Rex ab hoc Primatu vocari possit Primas Ecclesiæ? Tu negas; Henricus Solcolbrigiensis affirmat. 3. An ab eodem Primatu vocari possit supremum Caput Ecclesiæ Anglicanæ? Tu iterum negas; multi alii affirmant. 4. An Primatus Regis consistat in aliqua iurisdictione Ecclesiastica? Tu affirmas cum Henrico; Thomsonius & Burhillus negant. 5. An ad Primatum Regis pertineat, conuocare Synodos, sancire


leges Ecclesiasticas , conferre beneficia, creare & deponere Episcopos, controuersias dirimere. Hic, quot capita apud vos, tot sensus. Hæc omnia fusius explicaui in alio libello, qui inscribitur, *Dissidium Anglicanum, De Primatu Regis*. Cum ergo inter vos non possit certò constare, quam vim habeat Primatus Regis in Anglia, ubi educati estis; qua fronte audes mihi obii-cere, quòd ignorem illius vim & energiam? *Medice cura teipsum.*

8. Septimò obiicis, quòd nullum seruem ordinem ac methodum. Sic enim habes in Duello, pag. 35. *Veruntamen ut ad ea, quæ abs te proposita, nullo tamen ordine, nulla methodo disposita vel disquisita sunt, reuertamur, &c.* Respondeo. Duo à me proposita sunt in hoc libello. 1. Hæc quaestio, An Rex Angliæ legitimè habeat Primatum in Ecclesia? In ea tractanda seruauimus hunc ordinem. 1. an habeat Primatum iure naturali. 2. an iure diuino veteris Testamenti. 3. an iure diuino noui Testamenti. 4. an iure ciuili vel canonico. 5. an consensu doctorum hominum. 6. an titulo præscriptionis. 7. an secundum principia suæ doctrinæ. Quid tibi nunc displicet in hoc ordine? Deinde proposita sunt à me officia Primatus ecclesiastici, nimirum hæc, conuocare Synodos, in iis

in iis præsidere, constitutiones condere, causas audire & cognoscere, controuersias dirimere, beneficia conferre, ministros Ecclesiæ constituere, delinquentes excommunicare. Et quid hic culpæ est? An debebam de singulis seorsim disputare? Fuisset superuacaneum. Satis erat ostendere, hæc officia nec iure naturali, nec iure diuino, aut humano, nec titulo præscriptionis, nec alio modo, conuenire Regi Angliæ; quod etiam à me factum est. Si tamen desideras peculiarem tractatum de his omnibus & singulis, poteris videre *Dissidium Anglicanum de Primatu Regis*. Ibi inuenies & erubescas.

9. Octauò obiicis, quòd multa dicam, nihil probem. Sic enim ais in Epistola dedicatoria: *Jesuita hic multa allegat, nihil probat: varia argumentorum, ut armorum, genera colligit ac comportat, Syllogismos, Enthymemata, Dilemmata, quibus oppugnat clarissimi Regis nostri ius Primatus in Ecclesia. Veruntamen in arcem causæ non inuadit, nullum locum expugnat, ne proficit hylum*. Respondeo. Videris mihi declamare, Tookere: tot genera Phrasium colligis & comportas. An ego aliquid effecerim vel expugnauerim meis argumentis, paulò post, cum ad singula libelli mei capita venerimus, facile apparebit. Sed ta-

men, si nihil effeci vel expugnaui, vt tu quidem obiicis, quid necesse fuit, tantum virum, quantus tu in oculis tuis es, in me refutando tantopere desudare? quid opus erat, districto gladio, vt tu loqueris, stare in hac acie argumentationis?



CAPVT. I.

An Rex iure naturali habeat Primatum Ecclesie?

I. **N**E ipse quidem ausit hoc affirmare. Et ratio est euidens. Nam status politicus seu civilis ex natura rei distinctus est ab ecclesiastico seu spiritali: Ergo ex natura rei habet distinctum tribunal & iudicium: Ergo iure naturali necesse non est, vt qui præest vni, præsit etiam alteri. Ergo Rex ex eo præcisè, quia iurisdictionem habet in tribunali politico, non habet etiam ex natura rei in Ecclesiastico. Sicut vicissim,

cissim, Episcopus, qui habet iurisdictionem in foro ecclesiastico, non habet ex natura rei in temporali. Nihil certius. Ut tamen res melius explicetur, adiungendæ sunt duæ conclusiones.

2. PRIOR CONCLUSIO. In Republica Christiana duplex est potestas publica. Vna temporalis seu politica, altera spiritalis, seu Ecclesiastica. Ratio est, quia duplex finis Christiano homini propositus est, ad quem debet pertingere. Vnus naturalis, qui est pax & tranquillitas Reipublicæ: alter supernaturalis, qui est æterna beatitudo. Ad hos fines debet peruenire per diuersa media, quæ sint illis proportionata. Huiusmodi aut media inuenire & præscribere communitati, non est cuiusuis, sed eius, qui supra alios potestatem habet. Itaq; duplex debet esse potestas publica: vna temporalis seu politica, quæ præscribat media necessaria ad finem naturalem; altera ecclesiastica seu

ca seu spiritalis, quæ præscribat media necessaria ad finem supernaturalem. Loquor autem de potestate publica, vt excludam priuatam, qualis est parentum in filios; virorum in vxores, & dominorum in seruos.

3. POSTERIOR CONCLUSIO.

Hæ duæ potestates publicæ in multis differunt, vt facilè ex dictis colligi potest. Primò, ex parte finis & mediorum; quia politica respicit finem & media naturalia; Ecclesiastica verò, supernaturalia. Secundò, ex parte causæ efficientis; quia politica potestalicui tribui, vel immediatè à Deo, quo pacto tributa est Moysi, Iosue, Sauli, Dauidi: vel à communitate, quo pacto tribuitur Regi Polonia, qui eligitur à Senatu: vel iure successionis, quo pacto in Hispania, Gallia, Anglia, filii succedunt parentibus in regimine: vel iure belli, quo pacto Rex vnius regni, lacessitus à Rege alterius regni, potest iusto bello se vindicare, & regnum illius inuadere.


uadere. Secus est de potestate Ecclesiastica. Cùm enim supernaturalis sit, non potest tribui, nisi á solo Deo, præsertim si sermo sit de suprema, de qua hic agimus. Tertiò, differunt ratione dignitatis. Nam Ecclesiastica nobilior & excellentior est, quàm politica. Vnde Innocentius 3. cap. *Solita, de Maiorit. & obedientia*, comparat has duas potestates duobus luminaribus firmamenti, Soli & Lunæ: Et dicit, Ecclesiasticam esse luminare maius, quod præst diei spiritualium; politicam, luminare minus, quod præst nocti temporalium. Et hoc indicat Christus, cum ait: *Regnum meum non est de hoc mundo.* q. d. Potestas seu iurisdicção temporalis est de hoc mundo: at spiritalis seu Ecclesiastica est de cælo. Ergo nobilior est. Et Chrysost. hom. 4. de verbis Isaïæ: *Hoc regnum illo maius est. Regia, quæ hic sunt, commissa sunt: Sacerdoti cælestia.*

4. EX DICTIS DVO COLLIGIMVS.

MVS. Vnum est, quòd hæ duæ potestates ex natura rei distinctæ sint, & ab inuicem separari possint. Nulla enim potest esse naturalis connexio inter potestatem naturalem & supernaturalem. Vnde si homo creatus esset à Deo in statu puræ naturæ, & ad solum finem naturalem (quod fieri potuit) nulla fuisset potestas supernaturalis seu Ecclesiastica, qualis nunc est: ac proinde ciuilis seu politica fuisset reipsa separata ab Ecclesiastica. Nunc etiam in statu gratiæ, in quo vtraque potestas locum habet, vna fuit in Christo sine alia. Nam Christus habuit Præmatum in Ecclesia, non tamen in Republica ciuili & temporali, saltem quoad vsum.

5. Alterum est, quòd hæ duæ potestates, cum ex natura rei distinctæ & separatæ sint, non nisi iure diuino, vel humano coniungi possint. Igitur deinceps inquirendum est, an Rex Angliæ, qui titulo successionis habet su-

bet supremam potestatem politicam in suo regno, habeat simul coniunctam potestatem Ecclesiasticam aliquo iure positiuo, siue diuino, siue humano.



COMMENTARIUS.

1. **H**ic, vt tuis verbis vtar Tookere, partim *eminus*, partim *cominus* aggredi me vis. Adsum, vt excipiam tuos ictus. Quid ergo *eminus*? Primum ex Ilidoro & D. Thoma, transcribis definitionem iuri, naturalis, gentium & ciuilis. Nihil me laedis. Poteras plura alia transcribere. Deinde, prolixè probas ex Aristotele, Platone, S. Augustino, & Ioanne Driedone, consentaneum esse iuri naturali, seu rectæ rationi, vt vxor marito, filius parenti, subditus superiori honorem deferat. Quis hoc nescit? Mox subdis; *Sed ista eminus; iam cominus congregiar*. Bene est; congregere *cominus*: nam *eminus* non successit.

2. *Cominus* sic pugnas, vt pleraq; probes, quæ à me dicta sunt; pauca improbes; quædam otiosa, & nonnulla etiâ pugnantiã adferas. Singula persequar. Ac primû, fateris
verum

verum esse, quod initio capitis dixi, statum politicum ex natura rei distinctum esse ab ecclesiastico, & habere distinctum iudicem ac tribunal; nec Regem ex eo præcisè, quia iurisdictionem habet in tribunali politico, habere etiam in ecclesiastico. Sic enim scribis pag. 56. *Cum syllabatim ista dixeris (nempe, quæ iam posui) habes ex nostris neminem tibi contradicentem.* Gaudio sanè. Nec hoc duelli, sed pacis symbolum est. Et, si ita pergis, non feries me, sed iuuabis.

3. Secundò, fateris verum esse, quod in prima conclusione dixi de duplici potestate publica; vna ciuili; altera ecclesiastica: & similiter, quod in secunda dixi, ecclesiasticam ciuili nobiliorem esse: denique, quod in fine capitis dixi; alteram ab altera separari posse. Verba tua sunt hæc, pag. 56. *Due sunt potestates publicæ; altera ciuilis, altera spiritalis: duo sunt tribunalia, alterum status politici, alterum ecclesiæ politicae.* Et pag. 66. *Potestas ecclesiastica, ratione regiminis animarum, edificationis Ecclesiæ, consummationis Sanctorum, omnibus numeris solatii & perfectionis absolutior est quacunque potestate ciuili.* Et pag. 78. *Illæ ambæ potestates aliquando coniunctæ aliquando separate fuerunt, quod ex pluribus exemplis liquet.*

4. Præ-

4. Præterea, vltro concedis, diuerſa eſſe officia Sacerdotum & Regum. Nam Sacerdotum eſt, inquis, fundare, plantare, irrigare & ſtabilire Eccleſias; Regum eſt, eaſdem ditare & gladio defendere. Illi, curam animarum habent; hi corporum. Illi, gladium ſpiritualem diſtingunt; hi corporalem.

5. Haſtenus mecum ſentis, Tookere, & pacificus es. Nunc arma corripis. Sed, ioco, an ſerio? Videamus. Dixi in ſecunda conſuſione, duas illas poteſtates diſſerre ex parte cauſæ efficientis: Et quidem eccleſiaſticam, præſertim ſupremam, immediate eſſe à ſolo Deo; ciuilem verò, vel à Deo, vel à communitate, vel ex iure ſucceſſionis; vel aliunde. Hic videris à me diſſentire. Nam pag. 57. ſic ſcribis: *Ex quo autem principio tam regalis, quam ſacerdotalis poteſtas, tanquam à ſuo fonte derinetur ac diſmanet, breuiter perpendendum eſt. Poteſtates, quæ ſunt, à Deo ſunt; & non eſt poteſtas, niſi à Deo.* Si his verbis me oppugnās, facile tibi occurrā. Fatebor omnem poteſtatem eſſe à Deo, vel mediatè, vel immediate. Nec habebis, quod obicias. Nam eodem modo reſpondes ad ſimilem obiectionem, cap. 7. pag. 304.

6. Dixi ibidem, eaſdem duas poteſtates diſſerre ex parte finis; eo quod ciuilis re-

spiciat finem naturalem, ecclesiastica supernaturalem. Et hoc videris improbare. pag. 65. cum ais: *An non summa potestas Ecclesiastica, quæ est Sacerdotum in foro interiore, & suprema potestas Regum in foro exteriori, salutem animarum potissimum intuetur?* Audi Tookere. Si potestas civilis spectetur præcisè secundum se, non extendit se, nisi ad finem naturalem. Et hoc efficaciter convinci potest ex eo, quod sub finem capitis notavi. Nam si homo creatus esset in statu puræ naturæ, quod fieri potuit, non fuisset ordinatus ad finem supernaturalem, qui consistit in clara Dei visione, qua nunc perfruuntur Sancti in cælo; sed ad finem naturalem, qui consistit in naturali contemplatione Dei, quatenus author naturæ est. Neque hoc potes negare, si Theologus es. Nosti enim distingui solere duplicem beatitudinem: alteram naturalem, de qua disputat Aristoteles in Ethicis; alteram supernaturalem, de qua passim agunt Scholastici. Similiter, Deum dupliciter spectari posse. Primò, ut est author naturæ; & sic esse finem naturalem, ad quem homo tenderet in statu puræ naturæ. Secundò, ut est author gratiæ; & sic esse finem supernaturalem, ad quem homo tendit in statu gratiæ, in quo iam sumus.

7. Hinc

7. Hinc facile diluitur tua obiectio. Cum enim dicis, potestatem civilem spectare salutem animarum, id dupliciter intelligi potest. Primò, de naturali salute animarum; & sic verum est. Secundò, de supernaturali salute animarum; & sic distinguendum est. Si enim civilis potestas spectetur præcisè in se, non attingit supernaturalem salutem animarum; potest tamen attingere, quatenus potestati ecclesiasticæ, in hoc statu gratiæ, subordinata est.

8. Puto satisfactum tibi nunc esse. Imò, iam sponte arma deponis; & quasi ex prælio fatigatus, incipis otiosè te oblectare, & coram Spectatoribus, ne dilabantur, ludicra quædam spectacula exhibere. Quæ illa? Ex Aristotele proponis duo schemata Dialectica, quæ singula constant quatuor propositionibus, in hunc modum:

Omnis potestas est à Deo.

Nulla potestas est à Deo.

Aliqua potestas est à Deo.

Aliqua potestas non est à Deo.

Omnis potestas in foro exteriori Ecclesiæ est à Deo.

Nulla potestas in foro exteriori Ecclesiæ est à Deo.

Aliqua potestas in foro exteriori Ecclesiæ est à Deo.

Aliqua potestas in foro exteriori Ecclesiæ nō est à Deo.

9. In utroque schemate mirè te recreas. Sed quorsum? An putas Spectatoribus hoc modo te satisfacturum? Erras Tookere. Venerunt spectare robustum pugilem, non morionem. Et sanè, res ipsa, de qua agimus, non ludicra, sed seria est. Alioqui, si ludendum esset, reponerem tibi vicissim vel Arborem Porphyrianam, vel certè schema aliquod ex Modalibus. Quid verò existimas dicturum Regem, cum intelliget te, qui Defensor ipsius esse vis, relicta causà regià, his lusibus occupari?


10. Sed vide, obsecro, quid fiat. Dum ita securus es, implicas te aliquot contradictionibus. Ex iis paucas accipe. Ais pagina 63. indictionem Synodorum, sanctionem

nem legum, & similia, esse iuris mixti, id est, resultantis ex iure Regio & Episcopali; habere tamen suam originem à Primatu Regio, & ab eo communicari Episcopis & Sacerdotibus. Verba tua sunt hæc: *Mixtum autem ius & resultans ex utroque, & iure regio & Episcopali, est legum sanctio, & synodorum indictio, & presidendi in iis prerogativa, & controuersiarum decisio, & beneficiorum collatio, & Episcoporum constitutio & depositio, quæ ferè ab origine Primatus regii descendunt & communicantur Sacerdotibus.*

II. At alibi negas hæc omnia. Nam pag. 42. doces, indictionem Synodorum, & sanctionem legum ecclesiasticarum, iure diuino, pertinere ad Apostolos. Rursum pag. 313. de iudice controuersiarum sic scribis: *Reges Christiani non sunt fidei ac religionis indices.* Similiter, de collatione beneficiorum, pag. 36. *Beneficia autem curata vel non curata, non conferunt Reges omnino in quempiam: multo minus dignitates ecclesiasticas, siue Episcopatus siue Archiepiscopatus. Eorum certè collatio vel institutio est, quorum est destitutio, id est, Episcoporum comprouincialium, qui potestatem habent personas ipsas sacrandi.* Hæc vna contradictio est, Audi alteram.

12. Ais pag. 66. potestatem ecclesiasticam perfectiorem esse quacunque civili. Paulò antè citavi tua verba. At mox contrarium affirmas, eùm subdis: *Potestas ecclesiastica non præsulget civili, potestatis eminentiâ.* Quasi dicas; Civilis eminentior est, quàm Ecclesiastica. At quomodo eminentior? an perfectione? Hoc iam negasti. An amplitudine? Hoc falsum est. Nam suprema potestas ecclesiastica extendit se ad omnes homines, etiam ad Reges & Imperatores. Omnes ei subiecti sunt.

13. Ut verbo repetam, quæ dicta sunt, sic accipe Tookere. Eminus pugnando, nihil effecisti. Cominus, primum quidem fuisti pacificus; tùm, frigide luctatus es; deinde, otiosè te oblectasti; postremò, contradictionibus te implicuisti. Et sic finis duelli circa hoc caput.



CAPVT II.

*An Rex habeat Primatum
Ecclesie iure diuino ve-
teris Testamen-
ti?*

1. Hoc

1. **H**oc ipse omnino videtur vel-
 le. Sic enim habet in sua A-
 pologia, pag. 155. *Sub veteri Testamen-
 to Reges haud dubiò gubernatores erant
 Ecclesiæ intra fines suos: corruptelas pur-
 gauere: abusus sustulere: arcam ad con-
 stitutum quietis locum perduxere: arca
 deportanda ipsi præsumptuere: Templum
 adificauere: adificatum dedicauere: &
 sua præsentia opus consecrationis cohõe-
 starunt: librum legis, tenebris erutum po-
 pulo recitari fecerunt: fædus inter Deum
 populumq; redintegrarunt: confregere
 serpentem æneum, quamuis & deserto
 Dei mandato erectum, & Christum Do-
 minum suo modo figurantem: idola o-
 mnia, Deosq; falsos exterminauere, re-
 formationes publicas instituere, cõuoca-
 tis eo fine & cõgregatis promiscuè sacer-
 dotibus & laicis: exauctorauerunt sum-
 mum Põtificem, aliumq; in eius locũ sub-
 rogauerunt. In summa, cuncta moderati
 sunt, quæ ad ecclesiasticum regimen quo-
 quo modo pertinuerunt. Nec verò tituli
 & nota, quibus insigniuntur, honoraria,*

ab his eorum actionibus discordant. Vocantur enim filii Altissimi, imo Dei, & Vncti Domini, in Dei solio sedentes. Famuli Dei, imo Angeli Dei, facti iuxta cor Dei, Lumina Israelis, Nutricii Ecclesie. Hucusque Rex.

2. Ex quibus verbis conitruui potest hoc argumentum; Reges veteris Testamenti, iure diuino habebant Primatum Ecclesie: ergo & Reges Noui testamenti. Vel sic potius; Reges veteris Testamenti, iure diuino habebant Primatum Ecclesie: at hoc ius non est abrogatum, sed adhuc manet. Ergo eodem iure gaudent Reges noui testamenti. At duplex peccatum in hoc syllogismo committitur. Nam & maior, & minor propositio falsa est. Negamus, in veteri Testamento fuisse ius diuinum de Primatu Regis in Ecclesia. Et, si fuisset, negamus adhuc durare, & non abrogatum esse. Vtrumque breuiter explicandum est per sequentes conclusiones.

3. PRIMA CONCLUSIO. Ius diuinum veteris Testamenti continetur lege Mosaica. Sunt autem triplicia præcepta legis Mosaicæ, moralia, ceremonialia, iudicialia, vt docet D. Thomas in 1.2.q.99. art.2. & seqq. Et colligitur ex illo Deuteron. 5. 31. *Loquar tibi omnia mandata mea, & ceremonias, atque iudicia.* Et Deut. 6. 1. *Hæc sunt præcepta & ceremonia, atque iudicia, quæ mandauit Dominus Deus vester, vt docerem vos.* Et Rom. 7. 12. *Lex quidem sancta, & mandatum sanctum, & iustum, & bonum.* Vbi Apostolos mandatum legis vocat sanctum, propter ceremonialia: iustum, propter iudicialia: bonum, propter moralia, vt explicat D. Thomas loco citato, art. 4. Ratio huius conclusionis est, quia omnis Respublica bene instituta, continet tria præceptorum genera: quorum alia ad priuatos singulorum ciuium mores: alia ad publicam religionem, & cultum Dei: alia ad communem politiam,

& temporalem gubernationem pertinent.

4. SECUNDA CONCLUSIO. Præcepta moralia summatim continentur in decem præceptis decalogi, ut docet D. Thomas in 1. 2. quæst. 100. artic. 3. Et quidem tria priora respiciunt cultum diuinum; reliqua, iustitiam cum proximo seruandam. Deus enim colitur tribus modis. 1. per fidelitatem, adhærendo soli vero Deo, & non habendo Deos alienos. 2. per reuerentiam, non assumendo nomen Dei in vanum. 3. per famulatum, colendo sabbathum. Et ita constituuntur tria prima præcepta Decalogi. Cum proximo autem seruatur iustitia, si & parentes honoremus, & alios non lædamus, neq; ore, neque opere, neque corde. Et hæc est summa reliquorum præceptorum decalogi. DICES, in decalogo habetur præceptum de sabbatho sanctificando, quod non est morale, sed ceremoniale. RESPONDEO. Est morale,

morale, quoad substantiam; ceremoniale, quo ad determinationem certi temporis. Nam ratio naturalis dicitur, Deo deberi aliquem famulatum, cum ipse sit Dominus omnium. Quando autem præstandus sit illi famulatus, pendet ex libera ipsius determinatione.

5. TERTIA CONCLUSIO. Præcepta ceremonialia, quæ præscribunt certas ceremonias pertinentes ad religionem, nihil aliud sunt, quam quædam determinationes eorum præceptorum decalogi, quæ ad diuinum cultum referuntur, ut docet D. Thomas quæst. 101. art. 1. Vnde sequitur, tot esse genera præceptorum ceremonialium, quot sunt genera eorum, quæ ad cultum diuinum pertinent. Hæc autem sunt quatuor. 1. sacrificia, ut holocaustum, hostia pacifica, & hostia pro peccato. 2. sacramenta, partim communia omnibus, ut Circumcisio, esus agni paschalis, purificationes à qui-

quibusdam exterioribus immunditiis, expiationes à peccatis, partim propria Sacerdotibus, vt consecratio Sacerdotum, Esus panum propositionis & aliorum, quæ erant vñibus Sacerdotum deputata, ablutio manuum ac pedũ, & rasio pilorum. 3. Instrumenta diuini cultus, vt Tabernaculum, Templum, Arca fœderis, propitiatorium, cādelabrum, mensa, duplex altare, vasa, vestes sacerdotales, & similia. 4. obseruantia legales, quibus ex decreto Dei, populus Iudæorum discernebatur ab aliis gentibus, vt certus vsus ciborum & vestium, ac solennitates festorum. Circa hæc quatuor rerum genera versantur præcepta ceremonialia.

6. QUARTA CONCLUSIO. Præcepta iudicialia, quæ præscribunt certam formam conseruandi iustitiam inter homines, nihil aliud sunt, quàm determinationes quædam eorum præceptorum Decalogi, quæ adiu-

ad iustitiam & politiam humanam
conseruandam spectant, vt docet
Diuus Thomas q. 104. art. 1. Vnde
etiam sequitur, tot esse genera præ-
ceptorum iudicialium, quot sunt ge-
nera hominum, inter quos iustitia
seruari debet. Ea autem sunt qua-
druplicia. Nam quædam præscri-
bunt certum ordinem iustitiæ inter
Principem & populum: quædam
inter ipsos populares inter se: quæ-
dam inter populum & extraneos:
quædam denique inter domesticos
eiusdem familiæ, vt inter Parentes
& filios; inter maritum & vxorem;
inter seruum & Dominum. v. g. Pro
Principe dantur præcepta, quomo-
do creandus sit, & se gerere debeat
in officio. Pro popularibus, præce-
pta emptionis, venditionis, & alio-
rum contractuum. Circa extraneos,
de bello gerendo, de susceptione
peregrinorum & aduenarum. De-
nique circa domesticos, de seruis, de
vxoribus, de filiis.

7. QUINTA CONCLUSIO. Inter hæc triplicia præcepta, triplex potissimum discrimen est. Primum, quod moralia per se contineantur in decalogo; reliqua extra decalogum. Alterum, quod moralia sint iuris naturalis; reliqua positiui. Tertium, quod moralia non sint abrogata à Christo, sed melius explicata, Matt. 5. At reliqua abrogata sunt, iuxta illud Luc. 16. 16. *Lex & Prophetæ usq; ad Ioannem.* Et ad Gal. 3. 24. *Lex pædagogus noster fuit in Christo, ut ex fide iustificemur: at ubi venit fides, iam non sumus sub pædago.* Et Hebr. 7. 12. *Translato sacerdotio, necesse est, ut & legis translatio fiat.* Et infra v. 18. *Reprobatio fit præcedentis mādātī, propter infirmitatem eius & inutilitatem: nihil enim ad perfectū adduxit lex.* Et ratio est, quia lex Mosaica fuit umbra legis euangelicæ, teste Apostolo, Col. 2. 16. & Heb. 10. 1. At umbra cessat, accedente lumine: Ergo veniente lege euangelica, necesse fuit abrogari Mosaicam.

8. EX DICTIS SIC CONCLVDO: Si Rex Angliæ, iure diuino Veteris Testamenti habet Primatum Ecclesiæ; vel illud ius diuinum continetur in lege morali, vel in ceremoniali, vel in iudiciali. Certum est non contineri in morali. Nam moralis lex generatim comprehenditur decem præceptis decalogi, vt dictum est. At in toto decalogo nulla fit mentio Primatus Regis in Ecclesia. Ergo ius diuinum de primatu Ecclesiæ non potest fundari in lege morali. Sed neque in ceremoniali vel iudiciali fundari potest, duplici de causa. Primò, quia vtraq; lex per Christum abrogata est: Ergo tametsi Reges in veteri Testamento, iure diuino habuissent Primatum Ecclesiæ; non tamen sequeretur, Reges in nouo Testamento gaudere eodem iure, cùm iam penitus abrogatum sit. Et hoc patet in similibus exemplis. Nam in Veteri Testamento iure diuino statutum erat, vt esset vnum templum, in quo

in quo omnes adorarent, vt omnes sacerdotes & ministri Ecclesiæ assumerentur ex sola tribu Leui, vt eorum sacrificia essent cruenta ex animalibus : vt Iudices & Reges eligerentur à Deo, non à populo. At hæc omnia iam abrogata sunt. Ergo quæ iure diuino statuta erant in Veteri Testamento, non amplius eodem iure debent censi statuta in nouo Testamento. Vnde sicut hæc consequentia non valet : *Omnes ministri Ecclesiæ erant olim in eadem tribu: Ergo & nunc ita fieri debet.* Sic neque valet ista: *Omnes Reges habebant olim primatum Ecclesiæ. Ergo etiam nunc habent.*

9. ADDO, nunquam in Veteri Testamento, diuino iure concessum fuisse Regibus primatū Ecclesiæ. Hoc si probauero, corruit totum fundamentum Regalis Hierarchiæ. Probo autem efficaciter tribus rationibus. Prima est, quia totum Ius; quod Deus disposuit circa Reges veteris Testamenti, habetur Deuteron. 17.

14. his

14. his verbis : *Cum ingressus fueris terram, quam Dominus Deus tuus dabit tibi, & possederis eam & dixeris, Constitutam super me Regem, sicut habent omnes per circuitum nationes; eum constitues, quem Dominus Deus tuus elegerit de numero fratrum tuorum. Non poteris alterius gentis hominem Regem facere, qui non sit frater tuus. Cumq; fuerit constitutus, non multiplicabit sibi equos, nec reducet populum in Aegyptum, equitatus numero subleuatus, praesertim cum Dominus praeceperit vobis, ut nequaquam amplius per eandem viam reuertamini. Non habebit uxores plurimas, quae alligiant animum eius, neq; argenti & auri immensa pondera. Postquam autem sederit in solio regni sui, describet sibi Deuteronomium legis huius in volumine, accipiens exemplar a sacerdotibus Leuitica tribus, & habebit secum, legetq; illud omnibus diebus vitae suae, ut discat timere Dominum Deum suum, & custodire verba & ceremonias eius, quae in lege praecepta sunt. Nec eleuetur cor eius in superbiam*

D

super

*super fratres suos, neq̃ declinet in partem
dexteram vel sinistra, vt longo tempore
regnet ipse & filius eius super Israel* Ha-
bes hic totam dispositionē iuris di-
uini circa Reges veteris Testamen-
ti. Atqui nulla fit mentio Primatus
Ecclesiæ. Solum explicantur hæ pau-
cæ conditiones. Prima, vt Rex eliga-
tur à Deo. Secunda, vt ex populo
Iudæorum, non ex gentibus assu-
matur. Tertia, vt non multiplicet
equos, nec reducat populum in Æ-
gyptum. Quarta, vt non habeat plu-
rimas vxores, præsertim alienige-
nas, quæ alliciant illum ad idolola-
triam, sicut accidit Salomoni. Quin-
ta, vt non colligat immensas diui-
tias, quia ex illarum cupiditate so-
lent Reges ad tyrannidem declina-
re, & iustitiam derelinquere. Sexta,
vt à sacerdotibus accipiat præcepta
legis Mosaicæ; eaq̃ describat, & di-
ligenter obseruet. Cur autem à Sa-
cerdotibus? quia illorum est iudica-
re, quæ circa legem & religionem
sunt.

sunt. Septima, vt moderatè se gerat erga alios, & non eleuetur cor eius in superbiam super fra res suos. Multò minus supra Sacerdotes, Episcopos & Pontifices. Octaua, vt lectetur iustitiam, & non declinet ad dextram vel sinistram; quod solet euenire, vel ex fauore & acceptione personarum, vel ex spe lucri, & vtilitatis, vel ex odio seu alia peruersa affectione.

10. Ex his omnibus ita concludo: Quicquid de Regis electione, officio & potestate statutum est iure diuino veteris Testamenti, hoc continetur in supradictis cōditionibus. At qui in illis nihil habetur de Primatu Regis in rebus Ecclesiasticis: Ergo primatus Regis in rebus Ecclesiasticis non est de iure diuino veteris Testamenti.

II. LOQVOR AVTEM DE IVRE DIVINO, quia constat in veteri Testamento fuisse duplex ius Regium; Alterum diuinum, quod iam explicatum

catum est, & de quo solo hic agimus: alterum vsurpatum seu tyrānicum, quod describitur 1. Regum 8. 10. his verbis: Dixit itaq; Samuel omnia verba Domini ad populum, qui petierat à se Regem, & ait: Hoc erit ius Regis qui imperaturus est vobis. Filios vestros tollet, & ponet in curribus suis, facietq; sibi equites & præcursores quadrigarum suarum, & constituet sibi tribunos & centuriones, & aratores agrorum suorum, & messoris segetum, & fabros armorū & curruum suorum. Filias quoq; vestras faciet sibi vnguentarias, & focarias & panificas. Agros quoq; vestros, & vineas, & oliuet optima tollet, & dabit seruis suis. Sed & segetes vestras, & vinearum redditus addecimabit, vt det Eunuchis & famulis suis. Seruos etiam vestros & ancillas, & iuuenes optimos, & asinos auferet, & ponet in opere suo. Greges quoq; vestros addecimabit, vosq; eritis ei serui. Et clamabitis in die illa à facie Regis vestri, quem elegistis vobis: & nō exaudiet vos Dominus in die illa, quia petistis vobis Regem.

His,

HIS, INQUAM, VERBIS NON DESCRIBITUR
ius Regis, quod à Deo concessum
est, sed quod à tyrannis solet v sur-
pari, vt rectè docet diuus Thomas
in 1. 2. q. 105. art. 1. ad 5. & fatetur Cal-
uinus lib. 4. instit. cap. vlt. §. 26. Et de
hoc iure loquitur Christus Matth.
20. 25. & Luc. 22. 25. *Reges gentium do-
minantur eorum: vos autem non sic.*

12. HINC ETIAM PATET, quare
Samuel ægrè tulerit, quod Iudæi pe-
tuerint sibi Regem dari; quia nimi-
rum petebāt Regem, qui more gen-
tilium, non qui iure diuino, eos gu-
bernaret, vt apertè colligitur ex illo
1. Reg. 8. 4. *Congregati ergo vniuersi
maiores natu Israel, venerunt ad Sa-
muelelem in Ramatha. Dixerunt q̄ ei: Ec-
ce, tu senuisti, & filii tui non ambulant
in viis tuis: constitue nobis Regem, vt iu-
dicet nos, sicut & vniuersæ habent na-
tiones, &c.* Hactenus prima ratio.

13. SECUNDA EST, Ipsimet Reges
Veteris Testamenti ingenuè fassi
sunt, se non habere Primatum Ec-

clesiæ, sed sacerdotes: Ergo manifestum est, non ipsos, sed sacerdotes habuisse. Antecedens patet, quia Iosaphat Rex, qui sanè fuit optimus, & officii sui minimè ignarus, de Regis & sacerdotis potestate sic ait, 2. Paralip. 19. 11. *Amarias sacerdos & pontifex vester, in his, quæ ad DEVM pertinent, præsidebit. Porro Zabadias filius Ismael, qui est dux in domo Iuda, super ea opera erit, quæ ad Regis officium pertinent.* Quid clarius? Hæc duo hic opponuntur; Præsidere in his, quæ ad Deum pertinent: Et, præsidere his, quæ ad officium Regis pertinet. Illud prius conuenit Sacerdoti seu Pontifici; hoc posterius, Vicario Regis. Atqui primatum habere in Ecclesiâ, est vnum ex iis, quæ ad Deum pertinent. Ergo conuenit Pontifici, non Regi, aut Vicario Regis.

14. TERTIA ratio: Ille censetur habere primatum Ecclesiæ à Deo, qui in rebus ad legem diuinam, & eius interpretationem pertinentibus

bus, constitutus est supremus iudex, cui oporteat obedire, ut supra explicatum est; Atqui non Rex, sed Sacerdos constitutus est talis iudex à DEO: Ergo non Rex, sed Sacerdos habet primatum Ecclesiæ à DEO. Minor patet ex illo Deuteronom. 17. 8. *Si difficile & ambiguum apud te iudicium esse perspexeris inter sanguinem & sanguinem, causam & causam, lepram & lepram. Et iudicium intra portas tuas videris verba variari: surge, & ascende ad locum, quem elegerit Dominus Deus tuus: Veniesq; ad sacerdotes Leuitici generis, & ad iudicem, qui fuerit illo tempore; quaresque ab eis, qui indicabunt tibi iudicii veritatem. Et facies quodcumq; dixerint, qui præsunt loco, quem elegerit Dominus, & docuerint te iuxta legem eius; sequerisq; sententiam eorum, nec declinabis ad dextram, neque ad sinistram. Qui autem superbierit, nolens obedire Sacerdotis imperio, qui eo tempore ministrat Domino DEO tuo, & decreto iudicis, morietur homo ille.*

Hic tria notanda sunt. Primum, quòd sermo sit de controuersis legalibus, quæ difficultatem habent, & in vtramque partem ab inferioribus iudicibus trahuntur. Alterum, quod huiusmodi controuersia non ad Regem, sed ad summum Sacerdotem, tanquam ad legitimum iudicem deferendæ sint. Tertium, quod sub pœna mortis oporteat acquiescere sententiæ Sacerdotis. At si Rex esset supra Sacerdotem à Deo constitutus, non opus esset stare iudicio Sacerdotis, sed liceret ad Regem, tanquam ad superiorem iudicem prouocare. At hoc non licet. Non ergo Rex, sed Sacerdos est supremus iudex controuersiarum legalium à Deo constitutus.

15. HVC SPECTAT ILLVD AG-
GÆI, 2. 12. *Hæc dicit Dominus: Interro-
ga Sacerdotes legem. Non Regem. Et*
Malach. 2. 7. *Labia Sacerdotis custodi-
ent scientiam: & legem requirent ex ore*
eius: Nō ex ore Regis, sed sacerdotis.

Et

Et quare? Causa mox additur; *quia Angelus Domini exercituum est.* q. d. Sacerdos est nuncius seu Interpres diuinæ voluntatis. Igitur à Sacerdote petendum est, quid *DEVS* fieri à nobis, vel circa nos velit, Quod clarius explicatur Num. 27. 21. *Pro Ioseph, si quid agendū erit. Eleazar sacerdos consulat Dominum. Ad verbum eius egredietur & ingredietur ipse, & omnes filii Israel cum eo, & cetera multitudo.* Eodem pertinet illud Leuit. 10. 8. *Dixit quoque Dominus ad Aaron: Vinum, & omne, quod inebriare potest, non bibetis tu, & filii tui, quando intratis in tabernaculum testimonii; ut habeatis scientiam discernendi inter sanctum & prophanum, inter pollutum & mundum; doceatisque filios Israel omnia legitima mea.* Hic vides, non Regum, sed Sacerdotum esse, discernere inter sanctum & prophanum, & legem *DEI* docere ac interpretari. Vnde sicut Azarias pontifex ad Oziam Regem dixit 2. Paralip. 26. 18. *Non est tui of-*

ficii Ozia, ut adoleas incensum Domino, sed sacerdotum, qui consecrati sunt ad huiusmodi ministerium; sic etiam potuisset dicere: Non est tui officii Ozia, ut discernas inter sanctum & prophanum, sed sacerdotum, qui ad hoc ministerium á DEO constituti sunt. Et cōsequenter, Non est tui officii Rex ut gubernes Ecclesiam, sed Sacerdotum, quibus iure diuino id commissum est. Rursus, sicut Ozias Rex, contra imperium Pontificis volens adolere incensum, lepra percussus est: sic etiam, qui vellet sibi arrogare primatum Ecclesiæ, eadem pœna haud indignus esset.

16. OSTENDI HACTENVS, Regem Angliæ nihil præsidii pro suo Primatu stabiliendo habere posse ex veteri Testamento, duplici de causa. Primò, quia Reges in Veteri Testamento non habuerunt primatum Ecclesiæ iure diuino, sed Sacerdotes, ut tribus rationibus iam probatum est. Secundò, etiam si habuissent,

sent, non tamen sequeretur, etiam Christianos Reges habere, cum ius veteris Testamenti abrogatum sit. Contra hanc posteriorem partem, nihil opponit Rex Angliæ. Contra priorem verò multa obiicit, non ex iure, sed ex facto petita, ut supra vidimus, quæ sigillatim discutienda sunt.

*I. Obiectio, ex facto Regis
Iosaphat.*

17. **R**educam omnes obiectiones Regis Angliæ ad formam syllogisticam, ut facilius earum vis appareat. Prima est hæc: Quicumque constituit Leuitas & Sacerdotes in aliqua ciuitate, habet Primum Ecclesiæ: Atqui Rex Iosaphat constituit Leuitas & Sacerdotes in Ierusalem: Ergo habuit Primum Ecclesiæ. Minor patet ex illo 2. Paralip. 19. 8. *In Ierusalem quoque constituit Iosa-*

Iosaphat Leuitas & Sacerdotes, & Principes familiarum, &c.

IS. RESPONDEO. Si textus integrè citaretur, multò fortius argumentum fieret contra Regem, quàm pro Rege. Textus enim sic habet; *In Ierusalem quoque constituit Iosaphat Leuitas, & Sacerdotes, & Principes familiarum ex Israel, ut iudicium & causam domini iudicarent habitatoribus eius. Præcepitque eis dicens Omnem causam, quæ venerit ad vos fratrum vestrorum, qui habitant in urbibus suis, ostendite eis, ut non peccent in dominum. Amarias autem Sacerdos & Pontifex vester, in his, quæ ad DEVM pertinent, præsidebit. Porro Zabadias filius Ismahel, qui est Dux in domo Iuda, super ea opera erit, quæ ad Regis officium pertinent.* In quo textu tria notanda sunt. Primò, quod Iosaphat Rex. non solum Leuitas & Sacerdotes, sed etiam Principes familiarum constituerit in Ierusalem. Secundò, quod illos omnes in eum finem constituerit, ut

rit, vt essent Iudicēs controuersiarum, quæ in populo oriri solēt. Tertiò, quod in controuersis Ecclesiasticis, quæ ad DEVM pertinent, Sacerdotes constituti sint iudices; in ciuilibus verò, quæ ad officium Regis spectant, Principes familiarum. Hinc sumo tale argumentum contra Regem Angliæ; Sacerdotes iure diuino constituti sunt supremi iudices omnium controuersiarum, quæ ad Deum & religionem pertinent: Ergo Sacerdotes iure diuino tenent primatum Ecclesiæ. Item; Ea, quæ ad Deum pertinent, distincta sunt ab iis, quæ pertinent ad officium Regis: Ergo Rex, ex officio suo, non potest immiscere se iis, quæ ad Deum pertinent: ergo non tenet primatum Ecclesiæ.

19. ARGUMENTVM contrarium facile soluitur. Non enim Iosaphat Rex constituit, id est, creauit & consecrauit Sacerdotes, quia hoc ad officium eius non pertinebat; sed ex
iis,

super fratres suos, neq; declinet in partem dexteram vel sinistram, vt longo tempore regnet ipse & filius eius super Israel. Habes hic totam dispositionem iuris diuini circa Reges veteris Testamenti. Atqui nulla fit mentio Primatus Ecclesiæ. Solum explicantur hæ pau- cæ conditiones. Prima, vt Rex eligatur à Deo. Secunda, vt ex populo Iudæorum, non ex gentibus assumatur. Tertia, vt non multiplicet equos, nec reducat populum in Ægyptum. Quarta, vt non habeat plurimas uxores, præsertim alienigenas, quæ alliciant illum ad idololatriam, sicut accidit Salomoni. Quinta, vt non colligat immensas diuitias, quia ex illarum cupiditate solent Reges ad tyrannidem declinare, & iustitiam derelinquere. Sexta, vt à sacerdotibus accipiat præcepta legis Mosaicæ; eaq; describat, & diligenter obseruet. Cur autem à Sacerdotibus? quia illorum est iudicare, quæ circa legem & religionem sunt.

sunt. Septima, vt moderatè se gerat erga alios, & non eleuetur cor eius in superbiam super fra res suos. Multò minus supra Sacerdotes, Episcopos & Pontifices. Octaua, vt lectetur iustitiam, & non declinet ad dextram vel sinistram; quod solet euenire, vel ex fauore & acceptione personarum, vel ex spe lucri, & vtilitatis, vel ex odio seu alia peruersa affectione.

10. Ex H I S omnibus ita concludo: Quicquid de Regis electione, officio & potestate statutum est iure diuino veteris Testamenti, hoc continetur in supradictis cōditionibus. At qui in illis nihil habetur de Primatu Regis in rebus Ecclesiasticis: Ergo primatus Regis in rebus Ecclesiasticis non est de iure diuino veteris Testamenti.

II. LOQVOR AVTEM DE IVRE DIVINO, quia constat in veteri Testamento fuisse duplex ius Regium: Alterum diuinum, quod iam expli-

catum est, & de quo solo hic agimus: alterum vsurpatum seu tyrānicum, quod describitur 1. Regum 8. 10. his verbis: *Dixit itaq; Samuel omnia verba Domini ad populum, qui petierat à se Regem, & ait: Hoc erit ius Regis qui imperaturus est vobis. Filios vestros tollet, & ponet in curribus suis, facietq; sibi equites & præcursores quadrigarum suarum, & constituet sibi tribunos & centuriones, & aratores agrorum suorum, & messores segetum, & fabros armorū & curruum suorum. Filias quoq; vestras faciet sibi vnguentarias, & focarias & panificas. Agros quoq; vestros, & vineas, & oliueta optima tollet, & dabit seruis suis. Sed & segetes vestras, & vinearum redditus addecimabit, vt det Eunuchis & famulis suis. Seruos etiam vestros & ancillas, & iuuenes optimos, & asinos auferet, & ponet in opere suo. Greges quoq; vestros addecimabit, vosq; eritis ei serui. Et clamabitis in die illa à facie Regis vestri, quem elegistis vobis: & nō exaudiet vos Dominus in die illa, quia petistis vobis Regem.*

His,

His, inquam, verbis non describitur ius Regis, quod à Deo concessum est, sed quod à tyrannis solet usurpari, vt rectè docet diuus Thomas in 1. 2. q. 105. art. 1. ad 5. & fatetur Caluinus lib. 4. instit. cap. vlt. §. 26. Et de hoc iure loquitur Christus Matth. 20. 25. & Luc. 22. 25. *Reges gentium dominantur eorum: vos autem non sic.*

12. HINC ETIAM PATET, quare Samuel ægrè tulerit, quod Iudæi petierint sibi Regem dari; quia nimirum petebāt Regem, qui more gentilium, non qui iure diuino, eos gubernaret, vt apertè colligitur ex illo 1. Reg. 8. 4. *Congregati ergo vniuersi maiores natu Israel, venerunt ad Samuelem in Ramatha. Dixeruntq; ei: Ecce, tu senuisti, & filii tui non ambulant in viis tuis: constitue nobis Regem, vt iudicet nos, sicut & vniuersæ habent nationes, &c.* Hactenus prima ratio.

13. SECUNDA EST, Ipsimet Reges Veteris Testamenti ingenuè fassi sunt, se non habere Primatum Ec-

clesiæ, sed sacerdotes: Ergo manifestum est, non ipsos, sed sacerdotes habuisse. Antecedens patet, quia Iosaphat Rex, qui sanè fuit optimus, & officii sui minimè ignarus, de Regis & sacerdotis potestate sic ait, 2. Paralip. 19. 11. *Amarias sacerdos & pontifex vester, in his, quæ ad DEVM pertinent, præsidebit. Porro Zabadias filius Ismael, qui est dux in domo Iuda, super ea opera erit, quæ ad Regis officium pertinent.* Quid clarius? Hæc duo hic opponuntur; Præsidere in his, quæ ad Deum pertinent: Et, præsidere his, quæ ad officium Regis pertinet. Illud prius conuenit Sacerdoti seu Pontifici; hoc posterius, Vicario Regis. Atqui primatum habere in Ecclesia, est vnum ex iis, quæ ad Deum pertinent, Ergo conuenit Pontifici, non Regi, aut Vicario Regis.

14. TERTIA ratio: Ille censetur habere primatum Ecclesiæ à Deo, qui in rebus ad legem diuinam, & eius interpretationem pertinentibus

bus, constitutus est supremus iudex, cui oporteat obedire, ut supra explicatum est; Atqui non Rex, sed Sacerdos constitutus est talis iudex à DEO: Ergo non Rex, sed Sacerdos habet primatum Ecclesiæ à DEO. Minor patet ex illo Deuteronom. 17. 8. *Si difficile & ambiguum apud te iudicium esse perspexeris inter sanguinem & sanguinem, causam & causam, lepram & lepram. Et iudicium intra portas tuas videris verba variari: surge, & ascende ad locum, quem elegerit Dominus Deus tuus: Veniesq; ad sacerdotes Leuitici generis, & ad iudicem, qui fuerit illo tempore; quaresque ab eis, qui indicabunt tibi iudicii veritatem. Et facies quodcumq; dixerint, qui præsunt loco, quem elegerit Dominus, & docuerint te iuxta legem eius; sequerisq; sententiam eorum, nec declinabis ad dextram, neque ad sinistram. Qui autem superbierit, nolens obedire Sacerdotis imperio, qui eo tempore ministrat Domino DEO tuo, & decreto iudicis, morietur homo ille.*

Hic tria notanda sunt. Primum, quòd sermo sit de controuersis legalibus, quæ difficultatem habent, & in vtramque partem ab inferioribus Iudicibus trahuntur. Alterum, quod huiusmodi controuersia non ad Regem, sed ad summum Sacerdotem, tanquam ad legitimum Iudicem deferendæ sint. Tertium, quod sub pœna mortis oporteat acquiescere sententiæ Sacerdotis. At si Rex esset supra Sacerdotem à Deo constitutus, non opus esset stare iudicio Sacerdotis, sed liceret ad Regem, tanquam ad superiorem Iudicem prouocare. At hoc non licet. Non ergo Rex, sed Sacerdos est supremus iudex controuersiarum legalium à Deo constitutus.

15. HVC SPECTAT ILLVD AGGÆI, 2. 12. *Hac dicit Dominus: Interroga Sacerdotes legem. Non Regem. Et Malach. 2. 7. Labia Sacerdotis custodient scientiam: & legem requirent ex ore eius: Nō ex ore Regis, sed sacerdotis.*

Et

Et quare? Causa mox additur; *quia Angelus Domini exercituum est*, q. d. Sacerdos est nuncius seu Interpres diuinæ voluntatis. Igitur à Sacerdote petendum est, quid *DEVS* fieri à nobis, vel circa nos velit, Quod clarius explicatur Num. 27. 21. *Pro Iosue, si quid agendū erit. Eleazar sacerdos consulat Dominum. Ad verbum eius egredietur & ingreditur ipse, & omnes filii Israel cum eo, & cetera multitudo.* Eodem pertinet illud Leuit. 10. 8. *Dixit quoque Dominus ad Aaron: Vinum, & omne, quod inebriare potest, non bibetis tu, & filii tui, quando intratis in tabernaculum testimonii; ut habeatis scientiam discernendi inter sanctum & prophanum, inter pollutum & mundum; doceatisque filios Israel omnia legitima mea.* Hic vides, non Regum, sed Sacerdotum esse, discernere inter sanctum & prophanum, & legem *DEI* docere ac interpretari. Vnde sicut Azarias pontifex ad Oziam Regem dixit 2. Paralip. 26. 18. *Non est tui of-*

ficii Ozia , vt adoleas incensum Domino , sed sacerdotum , qui consecrati sunt ad huiusmodi ministerium ; sic etiam potuisset dicere: Non est tui officii Ozia , vt discernas inter sanctum & prophanum , sed sacerdotum , qui ad hoc ministerium á DEO constituti sunt. Et cõsequenter, Non est tui officii Rex vt gubernes Ecclesiam , sed Sacerdotum , quibus iure diuino id commissum est. Rursus , sicut Ozias Rex , contra imperium Pontificis volens adolere incensum , lepra percussus est : sic etiam , qui vellet sibi arrogare primatum Ecclesiæ , eadem pœna haud indignus esset.

16. OSTENDI HACTENVVS , Regem Angliæ nihil præsidii pro suo Primatu stabiliendo habere posse ex veteri Testamento , duplici de causa. Primò , quia Reges in Veteri Testamento non habuerunt primatum Ecclesiæ iure diuino , sed Sacerdotes , vt tribus rationibus iam probatum est. Secundò , etiamsi habuissent,

sent, non tamen sequeretur, etiam Christianos Reges habere, cum ius veteris Testamenti abrogatum sit. Contra hanc posteriorem partem nihil opponit Rex Angliæ. Contra priorem verò multa obiicit, non ex iure, sed ex facto petita, ut supra vidimus, quæ sigillatim discutienda sunt.

*I. Obiectio, ex facto Regis
Iosaphat.*

17. **R** Educam omnes obiectiones Regis Angliæ ad formam syllogisticam, ut facilius earum vis appareat. Prima est hæc: Quicumque constituit Leuitas & Sacerdotes in aliqua ciuitate, habet Primatum Ecclesiæ: Atqui Rex Iosaphat constituit Leuitas & Sacerdotes in Ierusalem: Ergo habuit Primatum Ecclesiæ. Minor patet ex illo 2. Paralip. 19. 8. *In Ierusalem quoque constituit Iosa-*

rit, vt essent Iudicēs controuersiarum, quæ in populo oriri solēt. Tertiò, quod in controuersijs Ecclesiasticis, quæ ad DEVM pertinent, Sacerdotes constituti sint iudices; in ciuilibus verò, quæ ad officium Regis spectant, Principes familiarum. Hinc sumo tale argumentum contra Regem Angliæ; Sacerdotes iure diuino constituti sunt supremi iudices omnium controuersiarum, quæ ad Deum & religionem pertinent: Ergo Sacerdotes iure diuino tenent primatum Ecclesiæ. Item; Ea, quæ ad Deum pertinent, distincta sunt ab iis, quæ pertinent ad officium Regis: Ergo Rex, ex officio suo, non potest immiscere se iis, quæ ad Deum pertinent: ergo non tenet primatum Ecclesiæ.

19. ARGVMENTVM contrarium facile soluitur. Non enim Iosaphat Rex constituit, id est, creauit & consecrauit Sacerdotes, quia hoc ad officium eius non pertinebat; sed ex
iis,

iis, qui iam antea creati & consecrati erant, certos delegit, qui iudicium Domini exercerent in Ierusalem: sicut etiam certos delegerat, qui in aliis ciuitatibus populum docerent, vt habetur 2. Paralipom. 17. 7. Vbi notandum est, tria spectari posse in ministris Ecclesiæ Veteris Testamenti. 1. Electionem seu designationem personæ. 2. Consecrationem. 3. Applicationem ad certum vsum seu exercitium. Electio seu designatio non fiebat à Rege, sed à Deo, qui solam tribum Leui ad ministerium sacrum deputauerat. Consecratio verò commissæ erat Aaroni, tanquam summo Sacerdoti, & eius successoribus. Applicatio verò ad certum officium poterat fieri à Rege; sicut etiam nunc fieri potest. Quo pacto Rex Angliæ diceretur in suo regno constituere Iesuitas & Sacerdotes, si ex iis iam antea ordinatis & consecratis, quosdam aliunde euocaret, quorum alij concio-

nes

nes ad populum haberent, alii Confessiones exciperent, alii aliis ministeriis deputarentur. Et hoc passim apud Catholicos in usu est. Nemo tamen propterea censet, eos Principes, qui hoc modo Iesuitas ad se vocant, Primatum Ecclesiæ tenere.

2. Obiectio, ex facto Davidis & aliorum Regum.

20. SECUNDA obiectio est hæc:
 Qui tollunt abusus & corruptelas Ecclesiasticas, habent Primatum in Ecclesia: Reges Veteris Testamenti sustulerunt abusus & corruptelas Ecclesiasticas: Ergo habuerunt Primatum in Ecclesia. Minorem probat Sacellanus Regis Angliæ dupliciter. Primò ex illis verbis 2. Reg. 5. 6. *Et abiit Rex & omnes viri, qui erant cum eo, in Ierusalem, ad Iebusaum habitatorem terræ, dictumq; est David ab eis: Non ingredieris huc, nisi*

nisi abstuleris cecos & claudos dicentes; Non ingreditur David huc. Ex quibus verbis sic argumentatur; Ad regem Davidem spectabat, de templo cœcum & claudum tollere: Ergo ad eum spectabat, omnes abusus tollere. *Non enim abusus aliunde existunt, quam vel de inscitia, quod cæci sint homines; vel de incuria, quod in officio claudicent.* Secundo probat exemplo aliorum Regum, qui in scriptura reprehenduntur; quod Excelsa non sustulerint. At non reprehenderentur, nisi ad eorū officium pertineret, Excelsa tollere. Quid autem aliud est tollere Excelsa, quam tollere abusus & corruptelas?

21. R E S P O N D E O 1. generatim cum distinctione. Nam aliud est, iudicare seu decernere, quænam sint corruptelæ & abusus in religione: aliud verò, corruptelas & abusus, quando certò constat tales esse, tollere & exterminare. Prius pertinet ad officium summi Sacerdotis, ut
supra

supradictum est. Posterius non modò Regi, sed etiam cuilibet patrifamilias cōcessum est. Quilibet enim in sua domo potest ea emendare, quæ certò constat per abusum irrepisse. Virumque ostendo exemplis Noui Testamenti, Inter Christianos quæri solet, an sit abusus seu corruptela, habere & colere imagines, inuocare sanctos, pro defunctis orare, plura possidere beneficia Ecclesiastica, voto castitatis se obstringere, certis diebus à carnibus abstinere? de his iudicare, non pertinet ad Principes sæculares, sed ad Prælatos Ecclesiæ. At postquam res iudicata est, quilibet Rex in suo regno, quilibet Magistratus in sua ciuitate, quilibet paterfamilias in sua domo, potest executionem præstare. Idem factum est in Veteri Testamento. Deus sæpe per Prophetas ostendit, displicere sibi, quod populus adoleret in Excelsis. Itaque diuinitus constabat, abusum seu corrupte-

E rupte-

ruptelam esse. Rex in suo regno poterat tollere hunc abusum. Imò tenebatur. Nec ideo tamen primatum habebat in Ecclesia. Non magis, quàm si Deus per Prophetas ostenderet, connubia fidelium cum gentilibus sibi displicere: & quisque patrum familias in sua domo, si quid in hoc genere peccatum esset, in posterum emendaret. An ideo primatum teneret in rebus ad religionem pertinentibus? Nequaquam: Sed executor esset voluntatis diuinæ. Cur autem potius Reges, quàm Sacerdotes in veteri Testamēto reprehensi sint, quod Excelsa non tollerent; ideo factum est, quia pópulus Iudæorum, propter duritiem cordis, non curabat exhortationes & monita Sacerdotum ac Prophetarum: nec aliter, quàm vi & auctoritate Regis, ab errore sinebant se reuocari. Itaq; si Rex in hac negligentior esset, meritò à Deo reprehendebatur. Hoc generatim.

22. Duo in particulari explicanda sunt. Alterum, de abusu adolendi & sacrificandi in Excelsis. Alterum, de cæcis & claudis efficiendis. Quod ad prius attinet, tria certa sunt. Primum est, quod ab egressu filiorum Israel ex Ægypto, transacti fuerint 480. anni, antequam templum à Salomone ædificaretur, ut patet ex illo 3. Reg 6. 1. *Factum est ergo quadringentesimo & octuagesimo anno egressionis filiorum Israel de terra Ægypti, ædificari cæpit domus Domino.* Secundum est, quod toto illo tempore, secundum legem ordinariam, iussi sint Israelitæ offerre sacrificia in eo loco, in quo esset tabernaculū fœderis cum Arca, ut habetur Leuit. 17. 4. Porro tabernaculum cum Arca non semper mansit eodem loco. Nam primis 40. annis fuit cum populo in deserto. Postea, cum terram promissionis ingressi essent, & eam pacificè possiderent, positum fuit in Silo, iuxta illud Iosue 18. 1. *Congregatiq; sunt*

omnes filii Israel in Silo, ibiq; fixerunt tabernaculum testimonij, & fuit eis terra subiecta. Inde separatim arca, separatim tabernaculum, in diuersa loca translata sunt. Arca quidem in eum locum, in quo Israelitæ bello victi sunt à Philistinis, vltimo anno Heli sacerdotis, 1. Reg. 4.3. Tunc enim & capta est à Philistinis, 1. Reg. 4.11. & asportata in Azotum, 1. Reg. 5.1. Et mansit in eorum regione septem mensibus, 1. Reg. 6.1. Deinde remissa est ab illis in urbem Bethsames 1. Reg. 6.12. Postea in Cariathiarim, 1. Regum 7.1. Ibique mansit, donec Dauid confirmato iam regno super Iudam & Israel, reduxit eam ex Cariathiarim, 1. Paral. 13.6. mansitq; in domo Obededom Gethæi tribus mensibus, 1. Paral. 15.25. Tabernaculum autem ex Silo (licet de tempore non satis constet) translatum fuit in Nobem ciuitatem Sacerdotum, vbi erat, cùm Dauid fugiebat Saulem, 1. Reg. 21.1. Inde venit in Ga-

Gabaon , urbem Tribus Benjamin,
1.Paral.21.29. Ibi autem mansit,do-
nec cum Arca illatum est á Salomó-
ne in Templum, 3.Reg.8.4.

23. TERTIVM est, quod ab eo tem-
pore, quo perfectum fuit Templum
Salomonis, non alibi, quàm in illo
Templo licuerit offerre sacrificia,
secundùm legem ordinariam, vt pa-
tet ex illo Deuter.12.13. *Caue ne offe-
ras holocausta tua in omni loco, quem vi-
deris; sed in eo, quem elegerit Dominus.*
Et cap.26.1. *Cumq; intraueris terram,*
quam Dominus Deus tuus tibi daturus
est possidendam, tolles de cunctis frugibus
tuis primitias, pergesq; ad locum, quem
Dominus Deus tuus elegerit, vt ibi inuo-
cetur nomen eius, accedesq; ad Sacerdo-
tem, qui fuerit in diebus illis, &c. Dixi,
secundùm legem ordinariam, quia
tam antè, quàm post Templi ædifi-
cationem, licebat ex speciali DEI
dispensatione, etiam alibi, quàm in
Tabernaculo vel Templo sacrificare.
Hoc modo Samuel immolauit

in Ramatha & in Galgalis, 1. Reg. 7. 17. & c. 11. 14. Dauid in area Ornam Iebusæi, 1. Paralip. 21. 26. Elias in monte Carmeli, 3. Reg. 18. 19.

24. Ex his omnibus sequitur, nunquam licuisse, secundum legem ordinariam, immolare vel adolere in Excelsis, vbi non esset tabernaculū: Et hunc fuisse abusum, quem Deus reprehendit sæpè in Scripturis, vt 3. Regum 3. 3. *Dilexit Salomon Dominum, ambulans in preceptis Dauid patris sui, excepto quod in Excelsis immolabat, & accendebat thymiama.* Et 3. Reg. 22. 43. *Fecitq; Iosaphat, quod rectum erat in conspectu Domini. Verumtamen excelsa non abstulit. Adhuc enim populus sacrificabat, & adolebat incensum in Excelsis.* Loquor autem de Excelsis, vbi non esset Tabernaculum, quia in Excelfo Gabaon, vbi erat Tabernaculum, licebat immolare, 3. Reg. 3. 4. *Abiit Salemon in Gabaon, vt immolaret ibi: illud quippe erat Excelsum maximum, id est, præferebatur omni-*

omnibus Excelſis, quod in eo eſſet
tabernaculum à Moſe factum, vt pa-
tet 1. Paralip. 21. 29. *Tabernaculum au-*
tem Domini, quod fecerat Moſes in de-
ſerto, & altare holocauſtorum. ea tempe-
ſtate erat in Excelſo Gabaon. Et 2. Paral.
1. 3. *Et abiit cum vniuerſa multitudine*
in Excelſum Gabaon, vbi erat Taberna-
culum fœderis Domini, quod fecit Moſes
famulus DEI in ſolitudine. Vbi obiter
notandum eſt, fuiſſe duo Taberna-
cula. Vnum à Moſe factum, de quo
hactenus dixi. Alterum à Dauide,
quod ipſe tetendit in Ieruſalem,
quando eo deduxit Arcam fœderis,
de quo 2. Paralip. 1. 4. *Arcam autem*
DEI adduxerat Dauid de Cariathiarim
in locum, quem praparauerat ei, & vbi
fixerat illi Tabernaculum, hoc eſt, in Ie-
ruſalem. Et 3. Regum 1. 50. *Adonias*
autem timens Salomonem, ſurrexit, &
abiit, tenuitq; cornu altaris. Et cap. 2.
28. *Fugit ergo Ioab in Tabernaculum*
Domini, & apprehendit cornu altaris.
Hæc non poſſunt intelligi de taber-

mines. Statuas quidem tripliciter. Primò, vt per eas super muros positæ significati fuerint homines otiosi, q. d. Etiam nobis nihil agentibus intrare non poteris, tam scilicet munita vrbs nostra est. Secundò, vt per eas significata fuerint ædium fastigia, quibus illæ affixæ essent, q. d. Nisi transcendis ædium nostrarum fastigiis, non ingredieris. Tertiò, vt fuerint duæ imagines, quarum altera representauerit Isaac cœcutientem, altera Iacob claudicantem: Et hæ duæ propterea fuerint ad muros seu portas ciuitatis affixæ, vt significarent, Iudæis non licere bello infestare Iebusæos, eo quod parentes eorum, Isaac & Iacob, percussissent olim fœdus pacis cum Rege Abimelech, cuius posteri erant Iebusæi; interposito etiam iuramento, quod in ore illarum imaginum descriptum erat. Hæc Rabinorum sententia est; sed falsa. Primò, quia illud fœdus cum Rege Abimelech

non est initum à Iacob, sed ab Abraham, ut habetur Genes. 21. 22. Eodem tempore dixit Abimelech ad Abraham: *DEVS tecum est in vniuersis quæ agis. Iura ergo per Deum, ne noc eas mihi & posteris meis. Dixitq; Abraham: Ego iurabo. Et infra: Percusseruntq; ambo fædus.* Secundò, quia si Iebusæi voluissent pacare animum Davidis, & militum eius, per aspectum seu memoriam Isaac & Iacob; non debuissent eos in forma cæci & claudi (quæ potius ad contemptum & desum spectabat) sed in alia decentiori & augustiori repræsentare. Tertiò, quia illa verba, quæ sequuntur in textu, *cæcos & claudos, odientes animam David;* nullo modo possunt accommodari Isaac & Iacob; neque præ se ferunt desiderium pacis, sed odii potius ac contentionis.

26. ALII ergò rectius sentiunt, fuisse veros homines, quod etiam tripliciter intelligi potest. PRIMÒ, quòd fuerint ipsimet Iebusæi, qui dixerint

xerint Dauidi: *Nisi abstuleris cæcos & claudos*: id est, nisi nos abstuleris, quos tu conuitio militaris cæcos & claudos appellasti, *nō ingredieris huc*. SECUNDO, quod fuerint cæci & claudi, nō corpore, sed animo, id est, peccatores & flagitiosi. TERTIO, quod fuerint verè cæci & claudi, quos in contemptum Dauidis posuerint Iebusæi in mœnibus. q. d. Nostra ciuitas tam firma & munita est, vt non egeat aliis defensoribus, quàm his cæcis & claudis, qui sufficienter poterunt eam contra tuum exercitū tueri ac propugnare. Hæc est verà explicatio huius loci, quam sequitur Ioseph. lib. 7. c. 2. Theodoret. q. 16. 17 Glossa interlinearis, Abulens. q. 7. & plures alii. Simile quid legimus contigisse in vrbe Tyro, quæ cum esset fortissima, ciues in contemptum obsidentium, posuerunt Pygmæos in mœnibus, quasi illi abundè sufficerent ad eius defensionem, nec indigerent alio propugnatore. De his loqui-

loquitur Ezechiel Propheta. c. 27. 11.
*Sed & Pygmai, quierant in turribus
 tuis (ô Tyre) pharetras suas suspende-
 runt in muris tuis per gyrum, &c.*

27. Ex hac autem expositione, quæ
 sine dubio litteralis & germana est,
 non potest colligi, Dauidem aufe-
 rendo cæcos & claudos, voluisse o-
 stendere, quod abusus & corrupte-
 las Ecclesiæ esset ablaturus, vt fingit
 Sacellanus Regis Angliæ. Credo, ne
 quidem in mentem illi hoc venisse,
 cum ea res gesta est. Sed, etsi id fa-
 cere voluisset, non ideo sequeretur,
 habuisse illum Primatum Ecclesiæ,
 quia, vt supra dixi, quilibet pater fa-
 milias potest tollere abusus & cor-
 ruptelas, quando certo constat, ta-
 les esse.

3. *Obiectio, ex facto eiusdem Davidis.*

TERTIA OBIECTIO est hæc;
 Qui perducit Arcam fœderis
 ad constitutum quietis locum, &
 Arcæ

Arcæ deportandæ præfultat, tenet Primatum Ecclesiæ: Atqui Rex David perduxit Arcam ad constitutum quietis locum 1. Paral. 13. 12. & Arcæ deportandæ præfultauit, 2. Reg. 6 14. Ergo habuit Primatum Ecclesiæ. Hoc argumentum magni facit Sacellanus Regis, & vim facit in eo, quod David saltauerit ante, non post Arcam. Nam *hoc ipso*, inquit, *significauit se Primatum tenere in negotio Arce deportandæ*. Mira hominis subtilitas. Cur non similiter vim facit in eo, quod boues Arcam præcesserint, non secuti sint?

29. Ut autem magis appareat huius argumenti vanitas, tria notanda sunt. PRIMVM est, quod in arca Domini fuerint hæc tria, *Urna aurea habens manna, & Virga Aaron, qua fronduerat, & tabulæ Testamenti*, vt expressè testatur Apostolus Hæbr. 9. 4. ALTERVM, quod hæc Arca, præsertim quoad manna, quod in ea custodiebatur, fuerit typus seu
figura

figura nostræ Eucharistiæ. Ratio autem figuræ consistit in his : Primò, Manna datum est Israelitis peregrinantibus in deserto, vt possent ad terram promissionis peruenire. Secundò, habuit omnem saporem suauitatis corporalis (Sap. 15. 20.) Tertiò, fuit cibus de cælo missus (Ioan. 6. 31.) Quarta fuit expositum dubitationi (Psal. 77. 32.) & contradictioni (Num. 21. 5.) Quintò, licet alii plus, alii minus colligerent, eandem tamen mensuram postea habebant, (Exodi 16. 18.) Hæc omnia accommodantur Eucharistiæ. 1. quia datur Christianis in deserto huius vitæ peregrinantibus, vt possint ad vitam æternam peruenire. 2. continet omnem saporem suauitatis spiritualis. 3. est cibus de cælo missus. 4. exposita est dubitationi Capharnaitarum, & contradictioni Caluinistarum. 5. siue sub magna, siue sub parua hostia sumatur, æquè prodest sumentibus.

30. TERTIVM est, quod hæc tria distinguenda sint. 1. Arcam ædificare. 2. eam deducere, comitari, vel præcedere. 3. eandem portare vel attingere. Arcam ædificaverunt Bezeliel de tribu Iuda, & Oolias de tribu Dan. Exodi 31, 2. Arcam deduxerunt, & ante eam luserunt, non solum Rex, sed etiam populus, ut patet ex illo, 1. Reg. 4. 4. *Misit populus in Silo, & tulerunt inde Arcam federis Domini exercituum, sedentis super Cherubin.* Et 2. Reg. 6. 5. *David autem & omnis Israel ludebant coram Domino in omnibus lignis fabrefactis.* Et infra v. 15. *David & omnis domus Israel ducebant Arcam Testamenti Domini in Iubilo.* Et 3. Reg. 8. 5. *Rex autem Salomon, & omnis multitudo Israel, gradiebatur cum illo ante arcam.* At nemini licebat eam tangere, propter sanctitatē (quam & aliunde, & ex eo habebat, quod figura esset Eucharistiæ) nisi solis Sacerdotibus. Hinc Oza, quod eam tangere præsumpsisset, cum Sacerdos non esset.

morte

morte à Deo punitus est, 2. Reg. 6. 6. Imo ne Leuitis quidem hoc licuit. Nam vt patet Num. 4. iuebantur Sacerdotes velo arcam obuoluere, & vedes per annulos arcæ transmittere, ne Leuitæ, qui illam portaturi essent, eam attingerent.

31. Ex His patet, quam friuolum sit argumentum Sacellani Regis, quando sic infert; Rex David deduxit & præcessit Arcam Domini: Ergo habuit Primatum Ecclesiæ. Cur non similiter infert; Omnis multitudo Israel gradiebatur ante Arcam: Ergo habuit Primatum Ecclesiæ? Vel sic; Pueri Christiani præcedunt Eucharistiam, quando publicè in processione deportatur; Ergo habent Primatum Ecclesiæ. Ineptè omnia. Potius sic oportebat argumētari; Non licuit Regibus, sed solis Sacerdotibus, attingere Arcam domini: Ergo Sacerdotes præferuntur Regibus, in iis, quæ ad Deum & religionem pertinent.

4. Obie-

4. Obiectio, desumpta ex facto Salomonis Regis.

32. QVARTA obiectio est talis: Qui ædificat templum, & Deo dedicat, tenet primatum Ecclesiæ: Atqui Rex Salomon ædificauit Templum, & Deo dedicauit; 1. Paral. 28. 6. Et 2. Paral. 6. 10. Ergo Rex Salomon tenuit primatum Ecclesiæ: hoc argumentum sic vrget Sacellanus: *Dedicare Deo templa, actus est primarius, neque cuiusquam, nisi cuius partes in Religione prima. At templum à Salomone dedicatum est. Ergo.*

33. NON video hic plus subtilitatis, quàm in præcedenti argumento. Vt hoc ostendam, tria notanda sunt. PRIMVM est, quod templum Hierosolymitanum, de quo agimus, ter dedicatum sit. PRIMO à Salomone, 3. Reg. 8. 1. SECUNDO ab iis, qui è captiuitate Babylonica reuersi sunt, 1. Esdræ 6. 16. TERTIO à Ma-
F cha-

chabæis, cùm post prophanationẽ
 esset iterum renouatum & sanctifi-
 catum, 1. Machab. 4. 36. **ALTE-**
RVM est, quod dedicare rem ali-
 quam **DEO**, si vim nominis spectes,
 nihil aliud sit, quàm dicare illã cul-
 tui diuino, seu offerre, & destinare
 illam ad colendum **DEVM**. Hoc
 modo (Exod. 35.) dicuntur Israeli-
 tæ, tam viri, quàm fœminæ, hyacin-
 thum, purpuram, byssum, coccum,
 pilos caprarum, pelles arietum, me-
 talla & ligna cetim dedicasse **DEO**,
 id est, obtulisse ad cultum diuinum.
 Eodẽ sensu Salomon dicitur tem-
 plum **DEO** dedicasse, id est, diuino
 cultui dicasse seu mancipasse. Hinc
 non magis colligi potest Primatus
 Salomonis, qui ligna & lapides,
 quàm fœminarum, quæ aurum, pur-
 puram, & hyacinthum **DEO** dedi-
 carunt. **TEETIVM** est, quod in
 hac templi dedicatione à Salomo-
 ne facta variæ ceremoniæ vsurpatæ
 fuerint cum soleanni lætitia. Nam
 pri-

primo, postquam templum ædificatum est, congregati sunt Israelitæ ad Regem Salomonem in Ierusalem. 2. Sacerdotes intulerunt Arcam, tabernaculum, & omnia vasa sanctuarii in Templum. 3. Deus, ut ostenderet sibi placere, quod agebatur, nebula impleuit templum. 4. Salomon gratiis Deo actis, multa precatus est, & præsertim, ut quicumque essent oraturi Deum in templo isto, exaudirentur. 5. Finita hac oratione, victimæ & sacrificia Deo oblata sunt. 6. Iterum secuta est benedictio seu gratiarum actio; ac tandem octauo die, populus ad sua cum gaudio dimissus est. Hæc omnia habentur 3. Reg. 8.

34. N E Q V E hinc colligi potest Primatus Salomonis; quod sic ostendo. Tria hominum genera spectari hic debent. 1. Salomon. 2. Sacerdotes. 3. Populus. Quid quisque horum fecit in hac dedicatione? Salomon orauit, & gratias Deo egit.

F 2 Sacer-

Sacerdotes portarunt Arcam, tabernaculum, vasa sanctuarii, & obtulerunt sacrificia. Populus interfuit, & gratiis Deo actis, lætatus est. Si quid ergo pro primatu Salomonis colligendum est, sic colligi debet. Quicumque in templo recens ædificato, orat Deum, ut in eo exaudiantur preces & vota supplicantium, is tenet Primatum Ecclesiæ: Atqui Salomon in templo à se recens ædificato oravit Deum, ut in eo exaudirentur preces & vota supplicantium: Ergo tenuit Primatum Ecclesiæ. At maior propositio aperte falsa est. Quasi nemo, nisi qui supremam iurisdictionem in Ecclesia habet, commodo, quo Salomon, orare possit. Multi mercatores, suis sumptibus, templa in honorem Dei erexerunt, & quotidie erigunt. An non liceat Ipsis orare, ut Deus accepta ea habeat, & preces seruorum suorum in iis exaudiat? Omnino sanè. Imò, plerique clerici, quoties dedica-
tio ali-

tio alicuius templi occurrit, solent orare hoc modo: *DEVS qui nobis per singulos annos huius sancti Templi tui consecrationis reparas diem, & sacris semper mysteriis representas incolumes; exaudi preces populi tui, & presta, ut quisquis hoc templum beneficia petiturus ingreditur, cuncta se impetrasse lateatur. Per Dominum nostrum Iesum Christum filium tuum. &c.* Itemque hoc modo: *Deus qui inuisibiliter omnia continet, templum hoc potentiâ tuæ inhabitationis illustra, & concede, ut omnes, qui huc deprecaturi conueniunt, ex quacumq; tribulatione ad te clamauerint, consolationis tuæ beneficia consequantur. Per Dominum nostrum, &c.* An hinc inferas, singulos clericos, qui sic orant, supremos esse prælatos in Ecclesia? Nihil minus.

35. *PLVS DICAM.* Faciamus in aliqua diœcesi Anglicana templum incendiō perire, vel ab hostibus deuastari. Episcopis suis sumptibus curet restaurari. Conuocet deinde

populum sibi subiectum : Inferat
 vasa sacra : Oret Deum , vt ratum
 habeat hoc obsequium, & preces
 subditorum exaudiat: Offerat sacri-
 ficiū : Benè precetur populo, &
 gratis Deo actis, dimittat vnumquē-
 que cum gaudio. Quid? An dices
 hunc Episcopum esse Primate[m] Ec-
 clesiæ? Si est, quid de Rege fiet? Si
 non est, quid minus fecit, quam Sa-
 lomon? Imo totum id præstitit,
 quod Salomon & sacerdotes simul.

*5. Obiectio, desumpta ex fa-
 cto eiusdem Regis Salo-
 monis*

36. **Q**UINTA obiectio est talis;
 Qui deponit summum sa-
 cerdotem ab officio, & alium illi sub-
 rogat, necessario habet iurisdic-
 tionem supra summum sacerdotem:
 Atqui Salomon Rex deposuit Ahi-
 athar summum sacerdotē ab officio,
 & subrogauit illi Sadoc. 3. Reg. 2. 27.
 Ergo

Ergo Salomon Rex habuit iurisdictionem supra summum Sacerdotem, Hoc est præcipuum argumentum pro Primatu Regis. Sed sanè parui momenti. Ac primum, sic retorqueri potest: Qui deponit Regem ab officio, & alium illi subrogat, necessario habet iurisdictionem supra Regem: Atqui Ioiada summus sacerdos, non solum deposuit, sed etiam occidit Athalias reginam, & Ioas in eius locum subrogavit. 4. Reg. II. Ergo Ioiada summus sacerdos habuit iurisdictionem supra Regem.

37. SED ad rem. Hæc obiectio duo supponit. Vnum, quod Salomon, quando deposuit sacerdotem ab officio, usus sit potestate regiâ. Alterum, quod rectè ac legitimè eâ usus sit. At neutrum probari potest. Imo gravissimi Authores constanter docent, non regia, sed prophetica potestate usum esse; nec ordinaria via, sed ex peculiari Dei instinctu fecit.

F 4 se, quod

se, quod fecit. Ita Cardinalis Bellarminus, Iacobus Graeferus, & plures alii. Et videtur colligi posse ex illis verbis, 3. Regum 2. 27. *Eiecit ergo Salomon Abiathar, ut non esset Sacerdos Domini, ut impleretur sermo Domini, quem locutus est super domum Heli in Silo.* q.d. Olim tempore Heli Sacerdotis prædictum fuit à Deo per Samuelem Prophetam, fore aliquando, ut officium sacerdotale auferatur à familia Heli, propter peccata filiorum eius, 1. Reg. 2. 31. Ut ergo hæc prophetia impleretur, Salomon diuino instinctu, tanquam verus Prophetas, abstulit sacerdotium ab Abiathar, qui erat ex familia Heli.

38. Quod si ita est, facile apparet, nullius momenti esse obiectionem Regis Angliæ. Nam nihil aliud ex facto Salomonis colligi poterit, quàm Prophetas accipere aliquando extraordinariam potestatem à Deo etiam supra sacerdotes, quod nihil ad rem facit. Non enim disputamus

tamus de potestate Prophetarum, sed Regum. Nec status controuersia est, an Prophetę ex peculiari Dei instinctu possint aliquando punire Sacerdotes; sed, an Reges ordinaria sua potestate possint id facere? Hęc valde distincta sunt. Et alterum cum altero minimè connexum est. Non enim sequitur; Salomon Rex peculiari Dei instinctu, submouit Abiathar Sacerdotem ab officio sacerdotali: Ergo Iacobus Rex, ordinaria sua potestate potest idem facere. Non magis, quàm si dicam: Nathan ex peculiari DEI instinctu reprehendit Dauidem Regem: ergo quilibet subditus in Anglia potest ordinaria via reprehendere Iacobum Regem.

39. Sed demus (quod tamen probari non potest) Salomonem in submouendo Sacerdote, vsum esse potestate regia, quid quæso hinc efficitur contra nos? Nihil sanè, nisi prius constet, legitimè ea vsum esse.

Hoc autem nec in Scripturis sacris disertè exprimitur; nec ex iis euidenter deduci potest. Aliud enim est, factum alicuius recenseri; aliud, probari seu commendari. Legimus quidem in Scriptura, Baziam gladio & præcipitio se ipsum occidisse. Legimus, à Saule sacerdotes Domini; ab Abimelech septuaginta fratres; ab Athalia, semen regium; ab aliis alios interfectos esse. At non legimus, hæc omnia iustè ac legitimè contigisse, Idem dico de Salomone. Legimus, ab eo depositum esse Abiathar sacerdotem. At non legimus, rectè ac legitimè id factum esse. Vel ergo probandum est Regi Angliæ, factum esse legitimè; vel nihil contra nos concludit.

40. Dicet fortè; Abiathar grauius peccauerat contra Salomonem Regem, ac proinde dignus erat, qui puniretur. Potuit ergo Salomon autoritate regia illum punire. Respondeo. Non sequitur.

Esto

Esto enim ; peccauerit Abiathar propter iniquam conſpirationem, & dignus propterea fuerit, qui officio ſubmoueretur. An ideo à Salomone ſubmoueri legitimè potuit ? Id minimè conſequens eſt. Non enim quilibet reus à quolibet puniri poteſt, ſed ab eo duntaxat, qui in illum habeat legitimam poteſtatem ac iuriſdictionem. Hanc autem habuiſſe Reges Iudæorum in Sacerdotes, nondum probatum eſt. Imo ex ipſis Iudæis contrarium probari poteſt, ſemper enim perſuaſum ipſis fuit, Reges non habere vllam iuriſdictionem in eos, qui miniſterio diuino deputati ſunt. Hoc ſatis colligitur ex illo, *i. Reg. 22, 16. Dixit Rex Saul : morte morieris Abimelech, tu & omnis domus Patris tui. Et ait Rex emiſſariis, qui circumſtabant eum ; Conuertimini, & interficite Sacerdotes Domini ; nam manus eorū cum David eſt. Noluerunt autem ſerui Regis extendere manus ſuas in Sacer-*

in Sacerdotes Domini. Ex quibus verbis patet, Regem Saulem mandasse suis famulis, ut interficerent Sacerdotes Domini, eo quod conspirassent cum Dauide contra ipsum Regem. Porro famulos Regis, qui erant Iudæi, & optimè norant clementiam Sacerdotum supra Reges, non voluisse id facere, etiamsi Rex mandasset. Nam certò persuasum illis erat, non posse Regem legitimè id mandare, nec Sacerdotes imperio Regis subiacere. Quod etiam aduertens Rex, homini barbaro ac gentili imperauit, ut quod famuli facere renuissent, ipse imperterritus exequeretur. Quod etiam factum est. Subiungitur enim in textu: *Et ait Rex ad Doeg: Conuertere tu, & irruere in Sacerdotes. Conuersusq; Doeg Idumæus irruit in Sacerdotes.*

41. Hinc ita concludo: Saul & Salomon fuerunt pares in potestate regia, nec plus iuris habuit Salomon in Sacerdotes, quàm Saul, ex
ea præ-

ea præcisè parte, qua Reges erant. Atqui Saul, quâ Rex, non habuit legitimam potestatem puniendi Sacerdotes : ergo nec Salomon. Maior per se nota est. Minor patet ex dictis, quia famuli Saulis non recusassent imperium sui Regis, si putassent illum habere legitimam potestatem in Sacerdotes. Libenter enim parebant illi in persequendo Dauidem. Quod ergo nollēt parere in occidendis sacerdotibus, qui adhærebant Dauidi; non aliunde provenire potuit, quam quod putarent, Regem habere potestatem in Dauidem, non autem in Sacerdotes. Idem ergo de Salomone, quâ Rex erat, statuendum est. Si enim Sauli non licuit punire Sacerdotes Domini; nec Salomoni potuit licere. Uterque enim, quâ Rex, pari potestate fuit præditus.

42. Dices; Non rectè hoc sequitur. Fuit enim aliunde, dispar causa utriusque, Nam Sacerdotes à Saule
inter-

interfecti, erant innocentes. Abiathar autem, quem Salomon puniuit, erat reus læsæ maiestatis. Quis porro nesciat, aliud esse, interficere innocentes, quod fecit Saul; aliud, punire reos, quod fecit Salomon? Esto igitur; non rectè ac legitimè fecerit Saul; rectè tamen ac legitimè fecit Salomon. Respondeo. Hæc disparitas non obstat. Tametsi enim sacerdotes, qui iuebantur interfici à Saule, re ipsa fuerint innocentes; nihilominus famuli Saulis, putabāt esse nocentes, ac reos læsæ maiestatis: Nec tamen putabant licere Regi, etiam nocentes sacerdotes interficere. Hoc inde cōstat; quia parebant Regi in persequendo Dauide, vt dictum est: & ideo parebant, quod existimarent Dauidem iniuste aspirare ad regnum, ac proinde læsæ maiestatis reum esse. Alias sanè non parituri. Cum ergo audissent à Saule, sacerdotes adhærere Dauidi, quid aliud suspicari poterant, quam

quam eos etiam nocentes ac reos esse? Et tamen obtemperabant Sauli in prosequendo Dauide, non autem in necandis Sacerdotibus. Nec alia de causa, quam quod verè putarent, Regem habere potestatem puniendi & coercendi laicos, non autem Sacerdotes.

43. Ex his abundè satisfactum est argumento Regis, quod, vt compendio repetam, quæ dicta sunt, dupliciter formari potest. Primo, in hunc modum; *Salomon potestate prophetica legitimè puniuit Sacerdotem: Ergo Rex Iacobus potestate regia, idem præstare potest. Secundo sic; Salomon potestate regia legitimè puniuit Sacerdotem: Ergo Rex Iacobus idem præstare potest.* In priori forma, negatur consequentia; in posteriori, antecedens. Nec à Rege Angliæ vnquam probari poterit.

6, *Obiectio ex facto Iosia
Regis.*

44. **S**EXTA obiectio est hæc. Qui
librum legis è tenebris eru-
tum, populo recitari facit, & fœdus
inter Deum populumque redinteg-
rat, habet primatum Ecclesiæ: V-
trumq; fecit Rex Iosias, 4. Regum
22. & 23. Ergo habuit primatum Ec-
clesiæ. Hoc argumentum virget Sa-
cellanus Regis in hunc modum:
*Libro reperto, indixit Rex conuentũ, in
eo iubet recitari librum, recitato fœdus
nouum init cum Domino, populum quo-
que ad fœdus adiurauit. Tum præcipit
ipsi Pontifici, reliquisque secundi ordi-
nis Sacerdotibus, vt eiiciant è templo,
atque exurant vasa omnia, quæ Baali
sacra fuerant, vt excelsa demoliantur.
Mandauit post de Paschate nouo facien-
do, denique de religione tota in integrum
reformanda.*

45. Multæ sunt partes huius ar-
gumen-

gumenti. PRIMA, quòd Rex, reper-
to libro legis Mosaicæ, conuocarit
populum, vt eum illi prælegeret. Fa-
teor; Sed Helcias Pontifex, qui li-
brum reppererat, eo fine miserat Re-
gi, vt id faceret. SECUNDA, quod
Rex iusserit recitari librum Legis,
Esto. Etiam sceminæ apud aduersa-
rios legunt Biblia, aut ab ancillis reci-
tari iubent. TERTIA, quòd recitato
libro, fœdus nouum inierit cum
Deo, id est, quod promiserit Deo,
se velle custodire omnia præcepta,
quæ scripta erant in libro Legis. An
non cuilibet, etiam priuato homini,
hoc licitum est? Optarim sanè, sin-
gulos Christianos ita affectos esse,
vt inito cum D E O fœdere, pro-
mitterent, se legem seruatu-
ros. QVARTA, quod populum hortatus
sit, vt idem præstaret. At hoc non soli
Regi, sed cuilibet concionatori lici-
tum est apud suos auditores. Nisi
quod aduersarii dicant, Legem ser-
uatu impossibilem esse; In quo mul-

tum discrepant à Iofia, quem tanto perè laudant. QVINTA, quod præceperit Pontifici & Sacerdotibus fecundi ordinis, vt proiicerent de templo DEI omnia vafa, quæ facta fuerunt Baal, & aliis falsis Diis. Meritò fanè; quia hoc ad illos pertinebat. Nec tam præcepit, quàm eos officii fui commonuit. SEXTA, quod mandauerit Pascha celebrari, quod diu fuerat intermiſſum. At à DEO præceptum erat, vt celebraretur. Poterat ergo Rex urgere executionem. SEPTIMA, quod totam religionem iuſſerit in integrum reformari. Bonum factum. Nec tamen iudicium de Reformatione, ſed executio ad Regem pertinebat; iudicio reſeruato Sacerdotibus.

7. *Obiectio ex factò Ezechia Regis.*

46. SEPTIMA OBIECTIO; Ezechias Rex confregit serpentem æneum, *quamvis & deserto DEI mandato erectū, & Christum Dominum suo modo figurantem*, 4. Regum 18. 4. Ergo tenuit Primatum in Ecclesia. Hic duo dicēda sunt. 1. Ex qua causa vel occasione id fecerit Ezechias, 2. Qua autoritate fecerit. De priori, sic res habet. Serpens æneus ab initio, in bonū vsum erectus fuit mandato DEI, iuxta illud Numer. 21. 8. *Locutus est Dominus ad Moysen: Fac serpentem æneum, & pone eum pro signo: qui percussus aspexerit eum, viuet, Fecit ergo Moyses serpentem æneum, & posuit eum pro signo: quem cum percussi aspicerent, sanabantur.* At postea, progressu temporis, abiit in abusum, quia filii Israel adolebant ei incensum, vt habetur 4. Reg. 18. 4. idq; propterea, quod meminissent, olim ex solo illius aspectu sanatos fuisse, quotquot à serpentibus morfi erant in deserto: & putarent, se tunc quo-

que præsidii aliquid ab eo sperare
posse. Hunc abusum volens tollere
Ezechias, non alia via commodius
id facere potuit, quàm serpentem
ipsum, qui erat occasio idololatriæ,
tollendo & confringendo. At qua
authoritate id fecit? Non alia, quàm
diuina. DEVS enim, non solum Re-
gi, sed cuilibet è populo mandaue-
rat, vt auferrent omnem cultum
idololatriæ, Deut. 7. 5. *Aras eorum
subuertite & confringite statuas, lucosq;
succidite, & sculptilia comburite, quia
populus sanctus es Domino DEO tuo.*
Quid ergo mysterii hic est, quod
Ezechias confregerit serpentem
æneum, quod quilibet alius facere
potuisset?

47. DICES: Serpens æneus, &
DEI mandato factus erat, & CHRIS-
TVM figurabat. Quid tum? Si
ideò aliis non licuit eum confringe-
re, cur Regi licuit? aut si Regi licuit,
cur aliis non item? Nusquam legi-
mus, Regi peculiare quid conces-
sum

sum fuisse circa serpentem, quod aliis similiter concessum non sit. Et quid dicemus de arca Noe? Nonne, & mandato Dei facta fuit, & Christi Ecclesiam figuravit? Omnino. An ideo soli Regi permissum fuit, illam dissolvere, post peractum diluvium? Nemo dixerit.

*8. Obiectio, sumpta ex titulis
Regum Veteris Testa-
menti.*

48. **R** Ex Angliæ, sicut hætenus ex facto Regum Veteris Testamenti conatus est astruere primatum suum in Ecclesia; ita nunc ad titulos eorum conuertitur. Sunt autem hi. 1. Reges vocantur *Filii Altissimi*. 2. *Dii*. 3. *Vncti Domini*. 4. *in folio Dei sedentes*. 5. *Famuli Dei*. 6. *Angeli Dei*. 7. *Facti iuxta cor Dei*. 8. *Lumina Israelis*. 9. *Nutritii Ecclesia*. Ergo habent Primatum in Ecclesia.

49. Videamus, quid lateat in his

titulis. PRIMVS est, Reges, inquit, vocantur *filii Altissimi*, iuxta illud 2. Reg. 7. 14. *Ego ero ei (Salomoni) in Patrem, & ipse erit mihi in filium* Sed quæro, an non omnes pii ac fideles sint filii DEI, qui ex Christi institutione dicunt, *Pater noster, qui es in caelis*? An non de omnibus piis ac fidelibus intelligendum sit illud 1. Ioan. 3. 1. *Videte, qualem charitatem dedit nobis Pater, ut filii Dei nominemur & simus*? Nihil dubito. Cur ergo Rex Angliæ hunc titulum, quem CHRISTVS & Apostoli volunt omnibus bonis communem esse, solis Regibus arrogare vult? Et Sacellanus, qui tãtopere fauet suo Regi, an se filium Dei esse non putat? An in tota Anglia, solum Regem eo priuilegio gaudere censet? Nisi dicat, omnes quidem pios, sed Reges peculiari quodam modo filios DEI esse. Etiamne improbos? Si soli probi sunt, iam non sanè, quàm Reges, sed quàm probi, filii DEI sunt.

50. SECVNDVS TITVLVS; Reges vocantur *Dii*, Psal. 81. 6. *Ego dixi, Dii estis.* Et Exod. 22. 8. *Si inuenitur fur, duplum reddet, si latet fur, Dominus domus applicabitur ad DEOS.* Mira res. Solent aduersarii grauitè accusare Catholicos, quòd Pontificem Romanum appellent Deum. Et ipsi suos Reges impune appellari sic volunt. Imò sacræ Scripturæ testimoniis abutuntur. Nam illud, *Ego dixi, Dii estis*, non de solis Regibus, sed de Prophetis quoque intelligendum esse, discretè explicat Christus Ioan. 10. 34. cùm ait: *Nonne scriptum est in lege vestra, quia ego dixi, Dii estis? Si illos dixit Deos, ad quos sermo DEI factus est, &c.* Similiter illud: *Dominus domus applicabitur ad Deos*, non de Regibus, qui tunc nulli erant, sed de Iudicibus intelligendum esse, quis nescit? Si ergo non soli Reges, sed etiam alii vocari possunt *Dii*, quid est, quod ex hoc titulo colligit Rex Angliæ, Reges, & non alios, esse Primates Ecclesiæ?

51. TERTIVS TITVLVS: Reges vocantur Christi, seu vncti Domini, 1. Reg. 24. 11. *Non extendam manum meam in Dominum meum, quia Christus Domini est.* Fateor. At non soli Reges, sed etiam sacerdotes in veteri Testamento vngebantur. Et quamquam hoc neget Sacellanus Regis, ita tamen clarum est, vt negari, nisi impudenter, non possit. Testimonia Scripturæ passim obuia sunt. Exodi 29. 7. *Oleum unctionis fundes super caput eius, atque hoc ritu consecrabitur.* Et Leuit. 4. 3. *Si Sacerdos, qui vnctus est, peccauerit.* Et Leuit. 8. 12. *Fundens oleum super caput Aaron, vnxit eum & consecrauit.* Et Num. 3. 3. *Hæ nomina filiorum Aaron Sacerdotum, qui vncti sunt, & quorum consecratae manus, vt sacerdotio fungerentur.* Et 2. Machab. 1. 10. *Qui est de genere Christorum Sacerdotum.* Imò etiam Prophetæ vngebantur, 3. Reg. 19. 16. *Iehu filium Namsi unges regem super Israel: Eliseum autem filium Saphat, unges Prophetam pro te.*
Hinc

Hinc ita concludo: Vtriq; , tam Sacerdotes, quàm Reges, in veteri Testamento, vocabantur *Vncti Domini*: Ergo si solus ille titulus spectetur, vel vtrique, vel neutri habebant Primatum Ecclesiæ. Si vtrique, cur de Sacerdotibus negat Rex Angliæ? Si neutri, cur de Regibus affirmat? Ad- do. Vel sermo est de externa vnctio- ne, vel de interna. Si de externa, cõ- munis ea fuit Regibus, Sacerdotibus & Prophetis, vt dictum est. Si de in- terna, nemo fidelium excluditur. Omnes vncti sunt. 2. Cor. 1. 21. *Qui vnxit nos Deus.* Et 1. Ioan. 2. 20. *Vos vnctionem habetis á Sancto.*

52. **QVARTVS TITVLVS**, Reges di- cuntur in solio Dei sedere, 2. Paral. 9. 8. *Sit Dominus DEVS tuus benedi- ctus, qui voluit te ordinare super thro- num suum, Regem Domini DEI tui.* Sed constat, duplex esse regnum: vnum terrenum, alterum spirituale. Duo igitur solia, duo throni distinguendi sunt. Reges sedent in solio regni

terreni: Episcopi in solio Ecclesiæ, quod est regnum spiritale. Acto. 20. 28. *Attendite vobis & vniuersi gregi, in quo vos Spiritus sanctus posuit Episcopos regere Ecclesiam DEI.* Nec Regibus, sed Apostolis dictum est. à CHRISTO. Matth. 19. 28. *Cum sederit Filius hominis in sede maiestatis sue, sedebitis & vos super sedes duodecim iudicantes duodecim tribus Israel.* En, Apostoli Regum iudices erunt; non Reges Apostolorum.

53. QUINTVS TITVLVS, Reges vocantur *Serui Dei.* 2. Paral. 6. 15. *Qui prestitisti seruo tuo David, patri meo, quaecunque locutus fueras ei.* Ita est. Sed an soli Reges sunt serui DEI? An non etiam Apostoli & Episcopi? Acto. 4. 29. *Et nunc Domine, da seruis tuis cum omni fiducia loqui verbum tuum.* Act. 16. 17. *Isti homines serui Dei excelsi sunt, qui annuntiant vobis viam salutis.* Rom. 1. 1. *Paulus seruus Iesu Christi.* An non omnes pii Christiani? Roman. 6. 22. *Nunc autem libe-*
rati

rati à peccato, serui autem facti DEO.
Occurrit Sacellanus, omnes quidē
pios ac fideles vocari seruos Dei, sed
tamen Regibus per quandam emi-
nentiam conuenire hunc titulum.
Audio. Sed in quo consistit hæc emi-
nentia? An quia Reges sunt magis
pii, quàm cæteri fideles? At non
semper id verum est. An quia serui-
unt Deo in altiori gradu, quàm cæte-
ri? Hoc ipsum est in quæstione. Ego
contendo, Apostolos & Episcopos
seruire in altiori gradu. Seruiunt
Deo in regno Christi, quod *non est de
hoc Mundo.* Sunt *dispensatores myste-
riorum DEI.* 1. Cor. 4. 1. Et quod am-
plius est, sunt *adiutores Dei.* 1. Cor. 3. 9.
Imò sunt *Patres* seu *genitores* filiorum
DEI, 1. Cor. 4. 15. Sunt *fundamenta*,
supra quæ reliqui ædificati sunt, E-
phes. 2. 20. Denique, si plura expec-
tantur, sunt supra conditionem ser-
uorum Dei, Ioan. 15. 14. *Iam non di-
cā vos seruos, quia seruus nescit, quid fa-
ciat Dominus eius. Vos autē dixi amicos*
quia

quia omnia, quaecunque audini à Patre meo, nota feci vobis.

54. SEXTVS TITVLVS: Reges vocantur Angeli Dei, 2. Reg. 14. 20. *Tu autem Domine, mi Rex, sapiens es, sicut habet sapientiam Angelus Dei, vt intelligas omnia super terram.* Sed quid hinc colligi potest? Non aliud, quàm ex omnibus Iudæorum Regibus, solum Dauidem vocatum fuisse Angelum Dei, idque à muliere, non ob regiam potestatem, sed ob singularem sapientiam, qua erat præditus. Quid si ego plus adferam pro Sacerdotibus? Non de vno tantùm, sed de omnibus dictum est illud Malach. 2. 7. *Labia Sacerdotis custodient scientiam, & legem requirent ex ore eius, quia Angelus Domini exercituum est.* Nunc expendamus, vter rectius concludat, Rex Angliæ, an ego. Regis illatio est hæc: Dauid habuit tantam sapientiam, vt Angelo similis esse videretur: Ergo omnes Reges sunt tales: quisque igitur Rex in
suo

suo regno Primatum Ecclesiæ tenet. Ineptè. Hæc autem mea est: Omnes Sacerdotes summi in veteri Testamento, vocati sunt Angeli Dei, quia Dei voluntatem certò & infallibiliter aliis annuntiabant, quod non poterant Reges: Ergo Sacerdotes in rebus ad DEVM pertinentibus erant supra Regēs.

55. SEPTIMVS TITVLVS; Reges dicuntur facti iuxta cor Dei, 1. Reg. 13. 14. *Quasiuit Dominus sibi virum iuxta cor suum.* Esto hoc. Quid tum? An quia Dauid Rex fuit vir iuxta cor Dei, omnes Reges tales sunt? Imò, contra res habet. Saul Rex, quia non erat vir secundùm cor Dei, à regno exclusus est: Dauid autem, quia erat talis, Sauli subrogatus. Sic enim loquitur Scriptura: *Dixit Samuel ad Saul: Stultè egisti, nec custodisti mandata Domini Dei tui, quæ præcepit tibi. Quod si non fecisses, iam nunc præparasset Dominus regnum tuum super Israel in sempiternum: sed nequaquam regnum*

regnum tuum ultra cōsurget. Quæ fuit Dominus sibi virum iuxta cor suum, ut esset Dux super populum suum. Nec vilius momenti est distinctio Sacellani, cū ait, Regem dupliciter dici posse iuxta cor Dei. 1. quoad personam Regis. 2. quoad officiū seu magistratum. Omnes Reges, etiam malos, licet priori modo non sint iuxta cor Dei, posteriori tamen esse. Sed, si hoc sufficit, omnes etiam Sacerdotes & Episcopi sunt secundū cor DEI. Imò magis, quā Reges. Nam DEVS in Veteri Testamento sponte, & ex proprio beneplacito constituit magistratum sacerdota-lem: regium autem, non nisi ex importuna Iudæorum postulatione concessit, ut habetur 1. Regum 8. 5. Igitur Sacerdotum magistratus magis fuit secundū cor DEI, quā Regum.

56. OCTAVVS titulus: Reges vocantur *Lucerna Israelis*, 2. Reg. 21. 17. *Tunc iurauerunt viri David, dicentes:*

Ima

*Iam non egredieris nobiscum in bellum,
ne extinguas lucernam Israel.* Fateor.
Sed etiam Apostoli vocantur à Chri-
sto *Lux Mundi*, Matth. 5. 14. Et Epi-
scopi septem Ecclesiarum Asiæ, vo-
cantur *septem stellæ*: Apoc. 1. 20. Si er-
go Reges ideò habent primatum in
Ecclesia, quia appellantur *Lucernæ*:
cur nō similiter Apostoli & Episcopi
habeant primatum, cū appellētur
stellæ & lux mundi? Non enim hic ti-
tulus minor est, quàm ille. Hinc for-
motale dilemma: Hæc propositio,
*Qui vocatur Lucerna, Lux, Stella, ha-
bet Primatum Ecclesia*: vel vera, vel
falsa est. Si vera, sequitur, Apostolos
& Episcopos habere Primatum Ec-
clesiæ, quod Rex Angliæ negat. Si
falsa, sequitur, Regem Angliæ ex fal-
so fundamento procedere.

57. NONVS titulus: Reges vo-
cantur *Nutritii Ecclesiæ*, Isaïæ 49. 23.
*Et erunt Reges nutritii tui, & Reginae
nutrices tuæ.* Sed adde quod sequitur:
*Vultu in terram dimisso adorabunt te, &
pulue-*

puluerem pedum tuorum lingent. Loquitur Propheta de futura Christi Ecclesia; & dicit, fore aliquando tempus, quando Reges & Reginae gentiles conuertentur ad fidem Christi, & sic magno incremento augebunt Ecclesiam, eamque tanquam sponsam Christi venerabuntur. At hinc non efficitur Reges & Reginas fore primates Ecclesiae, sed potius filios & subiectos. Et sanè, si vim faciamus in voce, *Nutritius*, quis magis nutriuit Ecclesiam CHRISTI quàm Apostoli & eorum successores, qui per vniuersum orbem prædicarunt Euangelium, & omnes gentes, cum suis Regibus & Reginis, Ecclesiae CHRISTI aggregarunt?


58. HACTENVS de titulis. Ex quibus sic cōcludo: Apostoli & Episcopi nō habent minores titulos, quàm Reges; imò sæpe maiores: si ergo ex titulis debeat colligi Primatus Ecclesiae, non minus Apostoli & Episcopi,

scopi, quàm Reges, erunt primates in Ecclesia; imò multo magis. Vtrunque ostendo inductione. 1. Reges vocantur *filij Altissimi*. Non minus Apostoli. 2. Reges vocantur *Dij*. Etiam Sacerdotes & iudices Ecclesiastici. 3. Reges vnguntur. Etiam Sacerdotes. 4. Reges sedent in folio terreno; At Apostoli & Episcopi in cœlesti. 5. Reges sunt *serui DEI*. At Apostoli, *iam non serui, sed amici*. 6. Reges sunt *Angeli DEI*. Nec minus Sacerdotes. Imò toti generi Sacerdotum id conuenit; non toti Regum. 7. Reges sunt *iuxta cor DEI*. Multò magis Sacerdotes & Apostoli. 8. Reges sunt *lucerna Israelis*. At Apostoli *lux mundi*. 9. Reges sunt *nutritii Ecclesiæ*. At Apostoli Patres nutritiorum.

Conclusio totius capituli.

59. **H**Oc capite ostensum est,
nullum extare ius diuinum
H vete-

Veteris Testamenti pro primatu Regum: extare tamen pro primatu Sacerdotum. Nec aduersarios vllum ius pro se hactenus allegasse, sed ex solis Regum factis & titulis argumentatos esse. Hanc autem argumentandi rationem non solum infirmam esse, sed etiam magis nobis, quàm ipsis patrocinari. Hæsi autem diutius in hoc capite, quia si semel probatum sit, ex veteri Testamento nihil adferri posse pro primatu Regis: consequenter ostensum erit, Reges nullo modo esse Primates Ecclesiæ. Nam Sacellanus Regis Angliæ fatetur, fundamentum illius Primatus in solo Veteri Testamento quæri oportere: & nullum illius in Nouo vestigium aut exemplum existere. Nihilominus tamen, vt seruemus ordinem superius assignatum, etiam de Nouo Testamento aliquid dicendum est.



COMMENTARIUS.

1. **C**irca hoc caput, quod in hac quaestione præcipuum est, duo potissimum facis Tookere. Primò, quædam inepta ac futilia in medium adfers. Hæc lubens præteribo. Secundò, contendis mecum de quibusdam Scripturæ testimoniis, quæ ex veteri Testamento desumpta sunt. In his discutiendis, quia verè ad rem faciunt, aliquantisper immorandum est. Nec sine fructu, ut spero.

I. TESTIMONIUM SCRIPTURÆ discutitur.

2. Igitur primum testimonium habetur Deuteronomii 17. 14. his verbis: *Cum ingressus fueris terram, quam Dominus Deus tuus dabit tibi, & possederis eam, & dixeris, Constituam super nos Regem, sicut habent omnes per circuitum nationes; eum constitues, quem Dominus Deus tuus elegerit de numero fratrum tuorum. Non poteris alterius gentis hominem Regem facere, qui non sit frater tuus. Cumq; fuerit constitutus, non multiplicabit sibi equos, nec reducet populum in Ægyptum, equitatus numero suble-*

natus, præsertim cùm Dominus præceperit vobis, vt nequaquam amplius per eandem viam reuertamini. Non habebit vxores plurimas, quæ alliciant animum eius, neq; argenti & auri immensa pondera. Postquam autem sederit in solio regni sui, describet sibi Deuteronomium legis inuius in volumine, accipiens exemplar à Sacerdotibus Leuiticæ tribus, & habebit secum, legetq; illud omnibus diebus vitæ suæ, vt discat timere Dominum Deum suum, & custodire verba & ceremonias eius, quæ in lege præcepta sunt. Nec eleuetur cor eius in superbiam super fratres suos, neque declinet in partem dextram vel sinistram, vt longo tempore regnet ipse, & filius eius super Israel.

3. Ex hoc testimonio sic argumentatus sum: Quidquid de Regis electione, officio & potestate, statutum est iure diuino veteris Testamenti, hoc continetur in his verbis Deuteronomii, quæ iam citata sunt: sed in illis nihil habetur de Primatu Regis in rebus ecclesiasticis: Ergo Primatus Regis in rebus ecclesiasticis non fundatur in iure diuino veteris Testamenti.

4. Quid tu hîc Tookere? Negas maiorem & minorem. Maiorem, quia multa, inquis, statuta sunt iure diuino veteris Testamenti circa Regem. quæ non habentur in illis.

in illis verbis Deuteronomii, vt v. g. de vn-
 ctione, inauguratione, & diuinatione Re-
 gis. Audi, mi homo. Non dixi, omnia vni-
 uersè, quæ statuta sunt circa Regem, ha-
 beri in illis verbis Deuteronomii; sed o-
 mnia, quæ pertinent *ad electionem, pote-
 statem & officium Regis*. Vnctio & inau-
 guratio ab eis distincta sunt. Igitur hæc
 propositio negari poterat, si à me fuisset
 posita: *Quicquid de Regis electione, vnctio-
 ne, inauguratione, potestate & officio, sta-
 tutum est iure diuino veteris Testamenti,
 hoc habetur in cap. 17. Deuteronomii*. Hæc
 autem non potest negari: *Quicquid de Re-
 gis electione, officio & potestate statutum
 est iure diuino veteris Testamenti, hoc ha-
 betur in capite 17. Deuteronomii*. Nec ad
 eam elidendam valet instantia de vnctio-
 ne & inauguratione.

5. Quod addis de diuinatione, sumpsi-
 sti ex illo Prouerbiorum cap. 16. 10. *Diui-
 natio in labiis Regis; in iudicio non errabit
 os eius*. Sed non video, quid ad rem fa-
 ciat. Primò, quia nos hic agimus de iis,
 quæ iure diuino statuta sunt in veteri Te-
 stamento, & quærimus, an inter ea de-
 beat recenseri Primatus Regis in Ecclesia?
 At non omnia, quæ habentur in Pro-
 uerbiis, statuta sunt iure diuino Veteris
 Testamenti. Aliud est, hoc aut illud ha-

beri in Verbo Dei; aliud, hoc aut illud statutum esse iure diuino. Quæ tu confundis, Tookere. Secundò, quia magni authores interpretantur illum locum, quem citasti ex Prouerbiis, de solo Christo, qui est Rex Regum; non de aliis Regibus. Nec sine causa. Nam Christus nunquam errat in iudicio; alii sæpè errant. Tertiò, quia cæteri, qui eundem locum interpretantur de aliis Regibus, non intelligunt de iudicio Regum in rebus Ecclesiasticis, sed solùm in ciuilibus; neque de quouis Rege in particulari, sed tantùm de aliquibus. Quo pacto Salomon non errauit in iudicio circa filium meretricis; nec Daniel in iudicio circa Susannam. An tu putas, Salomoni & Danieli omnes similes esse? Vtinam id quidem sit.

6. Negas etiam minorem. Negas, inquam, in isto capite Deuteronomii, nihil haberi de Primatu Regis. Dic ergo, in quibus verbis vel apicibus habetur aliquid de Primatu? In istis, inquis: *Describet sibi Rex Deuteronomium legis huius in volumine, accipiens exemplar à Sacerdotibus Leuitica tribus, & habebit secum, legetq; illud omnibus diebus vite sue, ut discat timere Dominum Deum suum, & custodire verba & ceremonias eius, quæ in lege præcepta sunt.* Sed primùm quæro, an Rex Angliæ putet, hæc

hæc verba ad se pertinere, nec ne? Si ad illum non pertinent, quomodo Primatus eius probari inde potest? Si pertinent, cur non seruat, quæ in iis præcepta sunt? Non enim custodit ceremonias & iudicia, quæ in Deuteronomio præscribuntur de agno paschali, de ciborum delectu, de libello repudii, de stupro, adulterio, ædificio, suspendio, de aliis sexcentis.

7. Dices fortè, non opus esse, vt Rex Angliæ seruet omnia simpliciter, quæ in Deuteronomio scripta sunt, sed vt seruet præcepta Decalogi. Nam reliqua præcepta, ceremonialia & iudicialia abrogata sunt. Esto sanè. Sed quid inde colligis pro Primatu? An ex eo, quia Rex seruare debet præcepta Decalogi, probare vis, Regem in Ecclesia Primatum obtinere? Valde erras. Etiam alii, qui Reges non sunt, seruare ea debent; nec ideo in Ecclesia Primatum habent. At, inquires, hoc Regi præ aliis peculiare est, quòd non solum ipse seruare ea debeat, sed & operam dare, vt subditi ea seruent. Primum nego, hoc illi peculiare esse. Etiam parentes curare debent, vt Decalogus seruetur à domesticis. Deinde, sit illi peculiare. Nondum probatum est, Sacerdotes & Episcopos, in rebus Ecclesiasticis, subditos Regi esse. Nec facîle id probaturus es.

II. TESTIMONIUM

discutitur.

8. Secundum testimonium habetur in eodem capite Deuteronomii, v. 8. his verbis: *Si difficile & ambiguum apud te iudicium esse perspexeris inter sanguinem & sanguinem, causam & causam, lepram & lepram; & Iudicum intra portas tuas videris verba variari: surge, & ascende ad locum, quem elegerit Dominus Deus tuus. Veniesq; ad Sacerdotes Leuitici generis, & ad Iudicem, qui fuerit illo tempore: quæresq; ab eis, qui indicabunt tibi iudicii veritatem. Et facies, quodcunque dixerint, qui præsunt loco, quem elegerit Dominus, & docuerint te iuxta legem eius; sequerisq; sententiam eorum, nec declinabis ad dextram, neque ad sinistram. Qui autem superbierit, nolens obedire Sacerdotis imperio, qui eo tempore ministrat Domino Deo tuo, & decreto Iudicis, morietur homo ille, & auferes malum de Israel.*

9. Circa hoc testimonium tria notavi. Primò, quòd sermo sit de controuersis legalibus, quæ difficultatem habent, & in vtrâmq; partem ab inferioribus iudicibus trahuntur. Secundò, quod huiusmodi controuersie ad summum Sacerdotem, tanquam ad legitimũ iudicem deferendæ sint.

Ter-

Tertiò , quòd sub pœna mortis oporteat acquiescere sententiæ Sacerdotis.

10. Hinc dupliciter argumentatus sum. Primò sic: Ille censetur habere Primatum Ecclesiæ, qui in rebus ad legem diuinam & eius interpretationem pertinentibus, constitutus est supremus Iudex in terris, cui oporteat obedire: Atqui non Rex, sed Sacerdos constitutus est talis Iudex à DEO: Ergo non Rex, sed Sacerdos habet Primatum Ecclesiæ. Secundò sic: Si Rex esset supra Sacerdotem in causis ecclesiasticis, non opus esset stare iudicio Sacerdotis, sed liceret ad Regem, tanquam ad superiorem Iudicem prouocare. At hoc non licet: Non ergo Rex, sed Sacerdos est supremus Iudex in controuersis legalibus à Deo constitutus.

11. Hic vertiste in omnem partem, Too-kere. Ac tria potissimum dicis. Primò, in testimonio Deuteronomii citato, latam esse legem à Deo, qua iubentur subditi in rebus ambiguis ire ad summum Sacerdotem, & illius iudicio acquiescere, seclusa omni prouocatione ad Regem. Hoc pro me facit. Secundò, legem illam esse iudicalem, ac proinde abrogatam. Hic te iugulas. Nam si concedis, in Veteri Testamento fuisse talem legem à DEO latam (etiamsi iam abrogata sit)

necessariò debes concedere, Sacerdotem in veteri Testamento fuisse supremum Iudicem in causis legalibus, cui omnes debuerint obedire: Et quod inde sequitur, Sacerdotem in veteri Testamento habuisse Primatum Ecclesiæ. At hoc ipsum est, quod contendimus. Quid ergo præsidij habes ex veteri Testamento pro Primatu Regis? Nihil sanè.

12. Tertiò dicis, etiamsi Lex illa non esset abrogata, sed adhuc vigeret, non tamen obfuturam Primatui Regis. Non enim latam esse pro solo Sacerdote, sed simul pro Sacerdote ac Iudice. Itaque ex illa lege non confirmari authoritatem solius Sacerdotis, sed authoritatem duarum personarum coniunctim, nempe Sacerdotis & Iudicis: Et per Iudicem intelligi Regem. Audi Tookere. Dabo tibi, quod vis, legem illam latam esse pro duabus personis, id est, pro Sacerdote & Iudice. Sed primum, unde probas, per Iudicem intelligi ipsum Regem? Textus loquitur de Sacerdote & Iudice, qui habitaturi erant in eo loco, quem elegisset Domiuus Deus, id est, in eo loco, in quo futurum erat Tabernaculum vel Templum Domini. At Rex non semper habitabat in eo loco, ubi erat Tabernaculum: Ergo per Iudicem habitan-

habitantem in eo loco , non intelligitur Rex.

13. Sed etiam hoc dabo tibi , per Iudicem intelligi Regem , ac proinde legem illam Deuteronomii , coniunctim latam esse pro Sacerdote & Rege. Sed quo sensu hoc intelligis ? Video quatuor modis intelligi posse. Primò , vt vterq; per modum vnius fuerit Iudex in quacunque controuersia , tam ecclesiastica , quàm ciuili ; nec Rex sine Sacerdote , nec Sacerdos sine Rege , potuerit sententiam ferre. Secundò , vt Sacerdos seorsim fuerit supremus Iudex in Ecclesiasticis , & Rex seorsim in ciuilibus. Tertiò , vt solus Sacerdos fuerit supremus Iudex in omnibus , tam ciuilibus , quàm ecclesiasticis ; cui tamen Rex fuerit subordinatus. Quartò , vt solus Rex fuerit supremus Iudex in omnibus , cui Sacerdos fuerit subordinatus.

14. Primus sensus nec verus est , nec tibi patrocinator. Non enim verum est , Regem & Sacerdotem , per modum vnius Iudicis , debuisse coniunctim de quacunque controuersia sententiam ferre. Hoc patet ex ipso textu , qui sic habet ; *Si difficile & ambiguum apud te iudicium esse perspexeris inter sanguinem & sanguinem , causam & causam , lepram & lepram*. Vbi illa particula,

la , *inter causam & causam* , communis est , & extendi potest , tam ad causam ecclesiasticam , quàm civilem. Illa verò , *inter sanguinem & sanguinem* , significat causam civilem. Illa denique , *inter lepram & lepram* , denotat causam Ecclesiasticam , ad solos Sacerdotes pertinentem. Nam soli Sacerdotes iudicabant de lepra, vt expressè habetur in Levitico, cap. 13. & 14. per totum. Vnde Christus in Evangelio non misit leprosum ad Regem, sed ad solum Sacerdotem. *Vade*, inquit, *ostende te Sacerdoti*, Matth. 8. 4. Hinc infero, in controuersia de lepra, non fuisse duos Iudices per modum vnius, sed solum Sacerdotem fuisse Iudicem sine Rege. Falsum ergo est, legem Deuteronomii latam esse de Sacerdote & Rege coniunctim, per modum vnius. Sed etiamsi lata sic esset, non faceret pro te Tookere. Nam inde sequeretur, Primatum Ecclesiæ in Veteri Testamento non pertinuisse ad solum Regem, quod tu contendis; sed coniunctim ad Regem & Sacerdotem, quod tu minimè vis.

15. Secundus sensus omnino contra te est. Afferit enim in veteri Testamento fuisse duos supremos Iudices : alterum in controuersis ecclesiasticis , nempe Pontificem

rificem ; alterum in ciuilibus, nempe Regem aut Vicarium illius. Vbi ergo Primarius Regis in Ecclesiasticis ? Et hoc sensu videtur hanc legem Deuteronomii, de qua agimus, interpretatus esse Iosaphat Rex, 2. Paralipom. 19. 11. cum dixit; *Amarias Sacerdos & Pontifex vester, in his, quæ ad Deum pertinent, præsidebit. Porro Zabadias filius Ismael, qui est Dux in domo Iuda, super ea opera erit, quæ ad Regis officium pertinent,* De quibus verbis paulò post iterum dicemus.

16. Tertius sensus non minus contra te facit. Eo asseritur, in veteri Testamento solum Sacerdotem fuisse supremum Iudicem controuersiarum: Regem autem in fuisse illi subordinatum, tanquam executorem. Hoc tu non vis. Alii tamen volunt, præsertim illi, qui sic legunt textum: *Qui autem superbierit, nolens obedire Sacerdotis imperio, ex decreto iudicis morietur.* Vbi illa particula, *nolens obedire Sacerdotis imperio*, significat, Sacerdotem fuisse supremum iudicem, cuius imperio erat obtemperandum. Illa verò, *ex decreto iudicis morietur*, denotat Regem vel Vicarium illius fuisse executorem sententiæ à Sacerdote latæ. Et ita sentit Cardinalis Bellarminus lib. 4. de Pontifice cap. 1.

17. Quartus sensus pro te quidem faceret, si verus esset; sed tamen verus non est. Asserit enim in veteri Testamento solum Regem fuisse supremum Iudicem in omnibus controuersis, tam ecclesiasticis, quàm ciuilibus; & Sacerdotem fuisse illi subordinatum. Quod sine dubio falsum est. Hoc primo patet ex illa particula, *inter lepram & lepram*. Nam, vt supra dixi, Rex in veteri Testamento non iudicabat de lepra, sed solus Sacerdos. Deinde ex illa particula, *Qui noluerit obedire Sacerdotis imperio, morietur*. Quæ significat, ab imperio & sententia Sacerdotis non licuisse prouocare ad alium iudicem; ac proinde non fuisse alium iudicem supra Sacerdotem. Ex quibus omnibus concludo, testimonium Deuteronomii, de quo hactenus actum est, nullo modo patrocinari Regibus, in quæstione de Primatu Ecclesiæ, sed Sacerdotibus.

III. TESTIMONIUM discutitur.

18. Tertium testimonium habetur, 2. Paralip. 19. 8. his verbis: *In Ierusalem quoque constituit Iosaphat Leuitas & Sacerdotes & Principes familiarum ex Israel, vt iudicium & causam Domini iudicarent habitato-*

bitatoribus eius. Præcepitque eis dicens :
Omnem causam , quæ venerit ad vos fra-
trum vestrorum , qui habitant in urbibus
suis, ostendite eis , ut non peccent in Domi-
num. Amarias autem Sacerdos & Pon-
tifex vester , in his, quæ ad Deum pertinent,
præsidebit. Porro Zabadias, filius Ismael,
qui est Dux in domo Iuda , super ea opera
erit, quæ ad Regis officium pertinent.

19. Hoc testimonio vos abutimini pro
Primatu Regis stabiliendo ; nos rectè vti-
mur ad eundem Primatum destruendum.
Facitis autem duo argumenta. Alterum
est Iacobi Regis, in hunc modum : Qui-
cunque constituit Leuitas & Sacerdotes
in aliqua ciuitate, habet Primatum Eccle-
siæ : Atqui Rex Iosaphat constituit Leui-
tas & Sacerdotes in Ierusalem : Ergo ha-
buit Primatum Ecclesiæ. Hoc argumen-
tum supra à me solutum est. Dixi , tria
spectari posse in Leuitis & Sacerdotibus
veteris Testamenti. 1. Electionem seu
designationem personæ ad officium diui-
num. 2. Consecrationem. 3. Applica-
tionem ad exercitium in certo aliquo lo-
co. Igitur Regem Iosaphat nec elegisse,
nec cōsecrasse Leuitas & Sacerdotes (cū
electio ad solum Deum ; consecratio ad
summum Pontificem pertinuerit) sed
tantum applicasse ad exercitium in certo
aliquo

aliquo loco, id est, vocasse Leuitas & Sacerdotes, qui iam consecrati erant, vt seruirent Deo in Ierusalem, qui prius alibi seruiuerant. Hinc autem non rectè colligi Primatum Ecclesiæ. Nam & nunc Principes Catholicos simile quid facere, quando aliunde vocant Iesuitas in suas ditiones, vt ibi concionentur, & alia officia diuina peragant; nec tamen ideo Primatum Ecclesiæ sibi arrogare. Hæc fuit mea solutio. Tu nihil contra eam adfers, Tookere, nisi quod displiceat tibi exemplum Iesuitarum, quo solutionem illustraui. Si vsus fuisset exemplo Prædicantium, sine dubio nihil habuisses, quod opponeres.

20. Alterum argumentum à te prodiit. Est autem huiusmodi. Iosaphat Rex constituit sibi duos Vicarios seu delegatos: Vnum in rebus diuinis & ecclesiasticis, nempe Amariam Pontificem; alterum in ciuilibus & temporalibus, nempe Zabadiam: Ergo Iosaphat Rex habuit supremam iurisdictionem in vtrisque rebus, tam ecclesiasticis, quàm ciuilibus; quia in vtrisque habuit sub se Vicarium seu delegatum. Respondeo. Antecedens falsum est. Primò, quia si Iosaphat habuisset sub se Pontificem, tanquam Vicarium in ecclesiasticis; sicut habuit sub se Zabadiam, tanquam

tanquam Vicarium in ciuilibus; planè sequeretur, quod sicut in ciuilibus poterat omnia per se facere, quæ faciebat per Zabadiam, sic etiam in ecclesiasticis potuisset omnia per se facere, quæ faciebat per Pontificem: At hoc falsum est: Ergo & illud, ex quo sequitur. Maior per se nota est, quia quidquid facit aliquis per Vicarium, cui committit seu delegat suas vices, potest facere sine Vicario, non delegando illi suas vices, sed sibi retinendo. Minor probatur, quia Iosaphat non poterat per se exercere vllum officium summi Sacerdotis seu Pontificis. Non enim poterat introire in sancta Sanctorum, nec offerre sacrificium, nec leprosos expiare; & quæ similia sunt. Secundò, quia Vicarius, qui habet potestatem delegatam, ab eo habet, cuius Vicarius est: sed Pontifex in veteri Testamento non habebat suam potestatem à Rege, sed à Deo, mediante consecratione: Ergo non erat Vicarius Regis. Maior patet ex ipsis terminis, quia habere potestatem delegatam, nihil aliud est, quàm habere potestatem ab alio sibi concessam & demandatam. Minor constat ex ritu consecrandi Pontificem, Exodi 29.

21. Hæc sufficiant de vestris argumentis. Nos ex eodem Scripturæ loco, mult s

fortius argumentamur contra Primatum Regis; & quidem dupliciter. Primò sic: Qui præsidet in iis omnibus, quæ ad Deum & Ecclesiam pertinent, habet Primatum Ecclesiæ: Atqui in veteri Testamento, non Rex, sed Pontifex præsidebat in iis omnibus, quæ ad Deum & Ecclesiam pertinebant. Ergo in veteri Testamento, nō Rex, sed Pontifex habebat Primatum Ecclesiæ. Nec est, quod obiicias, Pontificem nomine Regis præsedisse. Hoc enim iam antè refutatum est.

22. Secundò sic: In veteri Testamento, Zabadias præsidebat in iis omnibus, quæ pertinebant ad officium Regis: at non præsidebat in rebus ecclesiasticis. Ergo res ecclesiasticæ nō pertinebant ad officium Regis. Maior & minor disertè habentur in textu. Conclusio legitimè sequitur. Vel sic: Quæcunq; pertinebant ad officium Regis, commissæ erant Zabadiæ: at res ecclesiasticæ non erant illi commissæ: ergo non pertinebant ad officiū Regis. Et quis dubitet?

IV. TESTIMONIUM discutitur.

23. Quartum testimonium habetur, 2. Reg. 5. 6. his verbis: *Et abiit Rex, & omnes viri, qui erant cum eo, in Ierusalem, ad Iehuseum habitatorem terræ, dictumq; est David*

David ab eis: Non ingredieris huc, nisi abstuleris cæcos & claudos, dicentes, Non ingreditur David huc.

24. Ex hoc loco conatus est Sacellanus confirmare Primatum Regis in hunc modum; Ad Davidem Regē spectabat, cæcos & claudos è templo tollere: Ergo ad eum spectabat, omnes abusus & corruptelas tollere. Ergo habebat Primatum Ecclesiæ. Sed iam supra dixi, nec priorem, nec posteriorem consequentiam legitimam esse. Tu tamen, Tookere, vtranq; legitimā esse vis. Itaq; tecum agendum mihi iam est. Et quia tota lis pendet ex vero sensu illorum verborum: *Non ingredieris huc, nisi abstuleris cæcos & claudos*, primò discutiendum est, quid cæcorum & claudorū nomine intelligi debeat? Vel, quod idē est, an illa verba propriè, an metaphoricè intelligenda sint?

25. Tu, cum Sacellano, (quem Episcopū Eliensem vocas) metaphoricè interpretaberis. Nec tamen in explicanda metaphora, cum illo cōsentis. Nam ille, per claudos & cæcos, generatim intelligit oēs abusus & corruptelas, quæ possunt esse in Ecclesia. Omnes enim, ut ipse ait, oriri solēt *vel ex inscitia, quòd cæci sint homines, vel ex incuria, quòd in officio claudicent*. Tu non oēs, sed aliquas tantum corruptelas intelligi putas; ac eas potissimū, quæ sunt in ministris Ecclesiæ.

Et in eum sensum citat illud ex Leuitico: *Cæcus & claudus non ingreditur in templum Domini, ut obeat ministerium.* Igitur Sacellanus sic argumentatur: Illius est tollere omnes abusus, cuius est tollere cæcos & claudos, cum hæc duo idem sint (nisi quòd alterum propriè, alterum metaphoricè intelligi debeat.) Atqui Davidis erat tollere claudos & cæcos: Ergo illius erat tollere omnes abusus. Tu aliter, in hunc modum: Illius est tollere omnes abusus, cuius est tollere aliquos, cum omnium sit eadem ratio: Atqui Davidis erat tollere aliquos: Ergo illius erat tollere omnes.

26. Dicam, Tookere. Ambo cæci & claudi estis; tu & Sacellanus. Cæci, in explicanda Scriptura; claudi in argumentando. Testimonium Scripturæ, quod citatum est, non metaphoricè de abusibus, sed propriè de hominibus verè cæcis & claudis, ad literam intelligendum est. Hoc primò constat ex re gesta, quæ sic habet: David Rex obsidebat Ierusalem & arcem Sion, in qua habitabant Iebusæi, qui ab obitu Iosue vsque ad id tempus, expelli inde non potuerant, propter loci firmitatem ac munitionem. Quare Iebusæi, quòd putarent se inexpugnabiles esse, irridebant conatum Davidis, & per contemptum,
pone-

ponebant aliquot cæcos & claudos in mœnibus, qui acclamabant Dauidi: *Non ingredieris huc.* Quo facto significabant, non alio, quàm cæcorum & claudorum præsidio se egere ad urbem suam, contra tantum Dauidis exercitum, propugnandam ac conseruandam.

27. De qua re ita scribit Iosephus lib. 7. antiquitatum Iudaicarum cap. 2. *David cum omnibus his copiis Hierosolyma est profectus. Iebusæi verò, qui tum urbem incolabant, Chanaanæorum & ipsi generis, clausis ad eius aduentum portis, & in mœnibus, quotquot erant cæci vel claudi, aut alioqui mutili, in contemptum Regis collocatis, detestabant hos ad arcendum hostem sufficere, freti munitionum firmitate. Quo ludibrio ad iram concitatus, oppugnationem aggreditur, & cum strenua militum opera uteretur, omnibus adnitentibus, ut vnius urbis expugnatione, cæteris, si qui similiter pertinaces essent, metus incuteretur, ut inferiorem urbis partem occupat. Resistente autem sola arce, decreuit propositis honoribus ac præmiis, militem ad rem alacriter gerendam excitare: promisitq; ei, qui per subiectam vallem in arcem euassisset, totius exercitus imperium se commissurum; & cum eo certatim omnes eniterentur, cupiditate summæ Præfecturæ accensi, Sarniæ filius*
I 3 Ioabus

Ioabius alios præuenit, & conscensa arce, clamore sublato, à Rege promissum copiarum imperium poposcit. Similia habent alii, vt Theodoretus quæst. 16. 17. Abulensis quæst. 7. Glossa interlinearis, Lyranus, &c.

28. Hinc patet, nomen cæcorum & claudorum non metaphoricè pro abusibus, sed propriè pro verè cæcis & claudis, accipi oportere. Quod etiam confirmant illa verba, quæ sequuntur in textu sacro: *Proposuerat David in die illa præmium, qui percussisset Iebuseum, & tetigisset domatum fistulas, & abstulisset cæcos & claudos odientes animam David.* Vbi illa particula, *odientes animam David*, non potest aliter intelligi, quàm quòd cæci & claudi, qui stabant in mœnibus, essent hostes & aduersarii Davidis. De abusibus certè intelligi non potest. Quis enim sic loquatur, *Abusus oderunt animam David?*

29. Posita hac interpretatione, quæ verissima est, videamus, quam vim habeat argumentum tuum, Tookere. Sic sanè formandum esset: *Iebusæi per contemptum dixerunt Davidi, Non ingredieris in hanc ciuitatem, nisi prius abstuleris cæcos & claudos ex mœnibus: Ergo ad Davidem iure diuino spectabat, tollere abusus & corruptelas Ecclesiæ. Consequentia probatur, quia*

quia Tookerus & Sacellanus sunt boni viri, quibus negari nihil potest.

V. TESTIMONIVM
discutitur.

30. Quintum testimonium habetur 2. Reg. 6. 2. his verbis : *Surrexit David & abiit, & vniuersus populus cum eo, vt adducerent Arcam Dei.* Et infra v. 14. *David saltabat totis viribus ante Dominum, accinctus ephod lineo. Et David & omnis domus Israel ducebant arcam testamenti Domini in iubilo, & in clangore buccinae.*

31. Ex hoc testimonio putat Sacellanus stabiliri posse Primatum Regis, in hunc modum : David præcessit arcam Domini : Ergo habuit Primatum Ecclesiæ. Sed iam supra dixi, ineptam esse consequentiam. Sicut etiam hæc inepta est ; Populus Israel præcessit arcam Domini : Ergo habuit Primatum Ecclesiæ. Et similiter hæc : Pueri Christiani præcedunt venerabile Sacramentum Eucharistiæ, quando in publica processione deportatur. Ergo habent Primatum Ecclesiæ. Adieci, hanc legitimam esse ; Non licuit Regibus, sed solis Sacerdotibus, attingere arcam Domini : Ergo Sacerdotes præferuntur Regibus, in iis, quæ ad Deum & religionem pertinent.

32. Hæc tu agrè fers, Tookere. Et multa, quæ parum ad rem faciunt, in medium adfers. Primò dicis, me, cùm ista scriberem, fortè inter scyphos lusisse, & Ioannis illius Anglici, olim Papæ vel Papissæ de Moguntia, recordatum esse. An putas me tui vel Thomsonii similem esse, vt quotidie inter scyphos madeam? De te sic scribunt, qui norunt: *Guilielmus Tookerus, minister genialis & aulicus, comedit bibitq; lautè. Item: Culinam tantum & Bacchum sapit. Item: Homo est turbulentissimus, vinolentus, indoctus.* De Thomsonio sic: *Richardus Thomsonius notus omnibus, natione Batauus est, sed ex parentibus Anglicis, rhetor, poeta, & potator insignis. Nescio, si alter similis illi in Anglia Bythias.* Item: *Quidam vir grauis sæpius hominem adiit, sed semper ebrium inuenit; & ad integrum diem, sobrium reperire, factu difficile, imò & impossibile existimat.* Nos, Tookere, in hac schola non exercemur.

33. Et quæ est illa Papissa de Moguntia, de qua loqueris? Constat, apud vos fuisse scæminam, quæ Ecclesiæ Anglicanæ supremum in terris Caput, post Christum, appellata est. Magno sanè vestro dedecore. Apud nos, nec est, nec fuit, quæ similem titulum aut honorem sibi arrogaret. Neq;
tam

tam molles ac delicati sumus, vt in rebus ad Ecclesiam pertinentibus, vnius sceminae arbitrio, dirigi ac gubernari nos sinamus. Antiqua fides & religio, quam sequimur, cordatos & robustos cultores habet. Vobis, qui nouella ac molliori fide imbuti estis, volupe est, vel mulierculæ, vel androgyni alicuius imperio subiacerere. Aptissime à quodam dictum est:

*Roma viros Papas; Papissas Anglia cœlo
Subuehit; androgynos stulta Geneva colit.*

34. Sed videamus cætera. Secundò igitur dicis: *Ecclesiam nostram similem esse Michol filia Saulis. Sicut illa irrisit Dauidem ante arcam saltantem; sic nos ridere & subsannare vestra solennia.* Magnum mysterium narras Tookere. Sed erras in personis. Puritani rident & subsannant solennia Catholicorum; rident Exorcismos in Baptismo; rident Sacramenta Confirmationis, Ordinis, Pœnitentiæ, extremæ Vnctionis; rident cantum, organa, sacrificia, ieiunia, festiuitates, solennes processiones, & quæ similia sunt. Nihil horum apud vos est; aut si adhuc aliquid est, à Puritanis, qui vobiscum habitant, ridetur & subsannatur. Nos certè innoxii sumus.

35. Tertiò dicis, Eucharistiam, quæ in solenni processione deportatur, nihil aliud esse,

esse, quàm *libum, frustulum, crustulum, idolomaniam*: Et nos, qui eam prosequimur, *Asinos esse, clitellis superstitionum onustos*. Hoc est, quod dixi, Tookere. Tu cum Puritanis rides nostra solennia; non nos vestra. Nos Davidi; vos Micholi similes in hac re estis. David in solenni processione deducebat arcam, & præ gaudio saltabat, canebat, exultabat. Et quo magis à fœmina ridebatur, eo maiori conatu ac pietate, inchoatum opus perficiebat. Ita planè nunc fit. Nos Catholici in solenni processione deducimus sacrosanctam Eucharistiam, & præ gaudio exultamus, ac omni campanarum, musicorum, organorum & cereorum genere, Deum nostrum honoramus: Et quo magis à vobis irridemur, (qui in hoc negotio fœminæ, non viri estis) eò plus incrementi capit nostra deuotio, & in Deum charitas ac reuerentia. Neq; nos turbat, quòd asini à te vocemur, quòd clitellis superstitionum onusti esse dicamur. Iam pridem edocti sumus, calumnias & iniurias patienter pro Christo ferre. Hoc vnum dolemus, quòd sacram Eucharistiam tam enormi blasphemia lacerare ausus es. Quanquam aliud à te expectari vix potest. *Culinam tantum & Bacchum sapis*. Res diuinæ ludibrio tibi sunt.

36. Atque hæc hætenus effudisti. Addis
duo,

duo, quæ ad causam spectant: vnum circa Sacellani, seu Episcopi Eliensis argumentum; alterum circa meum. De illius argumento sic scribis: *Rectè conclusit Eliensis Episcopus: David saltavit & præiit in negotio arcæ deportandæ: Ergo Primatum tenuit. Et est vnum, inter cætera, argumentum pro Primatu Ecclesiæ.* Sed paulò post cogam te aliter canere.

37. Meum argumentum erat hoc: Non licuit Regibus, sed solis Sacerdotibus, attingere arcam Domini. Ergo Sacerdotes præferuntur Regibus, in iis, quæ ad Deum & religionem pertinent. Hanc illationem concedis cum hac limitatione: *Sacerdotes præferuntur Regibus, non quidem in omnibus, quæ ad religionem pertinent, sed tamen in quibusdam, id est, in liturgiis, concionibus, clauibus, sacramentis.* Bene habet, Tooke-re. Accipio, quod das. Porro ex hac tua cõcessione colligi possunt hæ duæ propositiones. Vna, Sacerdotes præferuntur Regibus in quibusdam rebus ad religionem pertinentibus. Altera, Reges vicissim præferuntur Sacerdotibus in quibusdã rebus ad religionem pertinentibus. Hinc primò sequitur, nec solum Regem, nec solum Sacerdotem, habere absolutè Primatum in Ecclesia Anglicana. Nam in quibusdã Rex superior est; in aliis Sacerdos. Secundò sequitur, cum alteri in Ecclesiæ Primatu


præferendum esse, qui alteri præfertur in rebus Ecclesiæ dignioribus: Atqui Sacerdos, ex tua sententia, præfertur Regi in Liturgiis, concionibus, clauibus, Sacramentis, quæ sunt res Ecclesiæ digniores? Ergo Sacerdos præfertur Regi in Primatu Ecclesiæ. Itâne est Tookere?

38. Sed magis te vrgebo, in hunc modum: Sacerdos præfertur Regi in Sacramentis, & consequenter in negotiis ad Sacramenta pertinentibus, vt iam disertè confessus es: At arca Domini in veteri Testamento erat Sacramentum, quod tu etiam expressè affirmas: Ergo Sacerdos in veteri Testamento præferebatur Regi in negotio ad arcam pertinente. Ergo iam penitus euanescit argumentum Sacellani, quod antea defendebas.

ALIA TESTIMONIA.

39. Supersunt alia quinque testimonia, de quibus inter nos contentio est. Primum de ædificatione & dedicatione templi à Salomone facta. Alterum de Abiathar summo Sacerdote, quem Salomon exauthorauit. Tertium de Iosia Rege, qui fœdus inter Deum & populum redintegravit. Quartum de Ezechia, qui serpentem æneum

Æneum confregit. Quintum de titulis, quibus Reges in veteri Testamento honorantur. Sed hæc omnia iam superius à me explicata & discussa sunt. Nec tu quicquam adfers, Tookere, quod noua disquisitione indigeat. Nam ineptias tuas, & pueriles declamationes, in quibus studium ac operam perdis, non tanti facio, ut hoc loco refutandas existimem. Igitur pergo ad tertium caput, in quo agitur de iure Noui Testamenti.



CAPVT III.

An Rex iure diuino Noui Testamenti habeat primatum Ecclesie?

I. **I**VS diuinum Noui Testamenti à Christo conditum est. Is enim, sicut veteres ritus, ceremonias, sacrificia, totam denique synagogam abrogauit: ita noua Sacramenta, nouum sacrificium, nouos mini-

ministros, nouā Ecclesiam instituit:
 Et præcepta dedit, quibus omnia,
 quæ ab ipso instituta essent, legiti-
 mē gubernari & conseruari possent.
 Nunc ergo quæstio est, quid in hac
 tota Oeconomia sua statuerit de
 Primatu Ecclesiæ? An cum voluerit
 esse apud Reges & Principes sæcu-
 lares, an verò apud Apostolos & eo-
 rum successores?

2. REPETO quod supra monui,
 hunc Primatum cōsistere in exteriori
 Iurisdictione, cuius potissimi actus
 sunt hi. 1. Regere Ecclesiam. 2.
 Synodos conuocare. 3. Iisdem præ-
 sidere. 4. Lites finire & controuer-
 sias fidei decidere. 5. Leges & con-
 stitutiones condere. 6. Contuma-
 ces excommunicare; aut alio modo
 punire delinquentes. 7. Ministros
 Ecclesiæ constituere & deponere.
 Et si qui similes. Igitur inuestigan-
 dum est, quinam hanc iurisdictionem
 in Ecclesia à Christo accepe-
 rint? Apostoli & eorum successores,

res, an Reges & Principes sæculares? Id autem ex quadruplici capite inuestigari potest. Primò, ex verbis CHRISTI, quibus suam mentem in hac re declarauit. Secundò, ex testimoniis Apostolorum, qui sine dubio CHRISTI mentem assecuti sunt. Tertio, ex praxi, quæ illo tempore in Ecclesia seruata est. Quartò, ex aliis circumstantiis.

3. Si verba Christi spectemus, res in promptu est. Legamus Euangelium. Mox inueniemus, Petro dictum esse, Ioan. 21. 22. *Pasce oues meas.* Et Matth. 16. 18. *Tu es Petrus, & super hanc petram edificabo Ecclesiam meam, & portæ inferi non praualebunt aduersus eam. Et tibi dabo claues regni cælorum.* Et Lucæ 22. 32. *Tu aliquando conuersus confirma fratres tuos.* At nusquam legimus, Tiberio, Pilato, vel Herodi dictum esse: *Pascite oues meas: Ecclesia mea Primatum tenete.*

4. Et quid est, *Pasce oues meas?* Constat ex Euangelio, CHRISTVM esse

esse Pastorem: Ecclesiam, ouile.
Christianos, oues. Igitur tantundem
est, ac si dixisset: In hoc pastoralis of-
ficio vicariam operam mihi præsta
Ouile meum tibi commendo; pa-
sce, quotquot in eo sunt, oues. Vel
clarius: Ecclesiam meam tibi com-
mendo: dirige & gubernare fideles,
quotquot in Ecclesia sunt. Vno ver-
bo, Vicarius meus esto. Quid vn-
quam simile dictum est Regi vel Im-
peratoris? Imò eos ipsos, si oues Chri-
sti sunt, Petro commissos esse, ne-
cesse est, cui totum ouile commis-
sum est. Rectè enim Epiphanius in
Ancorato: *Hic est, qui audiuit, Pasce
oues meas, cui creditum est ouile*. Et
Eucherius Lugdunensis in Vigilia
sancti Petri: *Prius agnos, deinde oues
ei commisit, quia non solum pastorem,
sed pastorum pastorem eum constituit.
Pascit igitur Petrus agnos, pascit & oues;
pascit filios, pascit & matres: regit &
subditos, & Prælatos. Omnium igitur
pastor est, quia præter agnos & oues in
Ecclesia nihil est.*

5. Iam, quid aliud est, Petro, non Regi aut Imperatori, datas esse claves Ecclesiæ, quàm datam esse potestatem & officium gubernandi Ecclesiæ? Hoc ipsa Metaphora planè significat. Et confirmat vsus. Solent enim, qui in familia vel vrbe præsunt, accipere claves in signum imperii & Iurisdictionis. Vnde Dominus apud Isaiam c. 22. cùm vellet significare, se potestatem summi sacerdotis translaturum à Sobna in Eliacim, vsus est metaphora clauium. Sic enim ait: *Vade, & ingredere ad eũ, qui habitat in tabernaculo, ad Sobnam præpositum templi, & dic ad eum: Quid tu hic? Expellam te de statione tua, & de ministerio tuo deponam te: & vocabo seruum meum Eliacim, & induam illum tunica tua, & cingulo tuo confortabo eũ, & potestatem tuam dabo in manu eius: Et dabo clauem domus David super humerum eius: & aperiet, & non erit, qui claudat: & claudet & non erit, qui aperiat.* Eadem metaphora vtitur scri-

K

ptura

ptura ad significādum principatum Christi, Apocal. 3. 7. *Hac dicit sanctus & verus, qui habet clauem David: qui aperit & nemo claudit: claudit & nemo aperit.* Hinc Gregorius l. 4. epist. 32. *Cunctis Euangelium scientibus liquet, quod voce dominica, omnium Apostolorum principi Petro totius Ecclesiae cura commissa est. Ipsi quippe dicitur, Tibi dabo clauēs regni cælorum.*

6. Et quis vsus harum clauium est? soluere & ligare: aperire & claudere, id est, exercere triplicem potestatem; Vnam intromittendi in Ecclesiam, & eiiciendi, prout quisque meretur. Alteram, soluendi vincula peccatorum, legis, voti, iuramenti. Tertiam, ligandi per præcepta & pœnas. Vno verbo: exercere supremam iurisdictionem in domo DEI, quæ est Ecclesia.

7. Igitur ex verbis Christi, perspicuè constat, Petro & eius successoribus, non item Regi commissum esse ouile, concreditas oues, concessas cla-

las clauēs. Videamus nunc, quid Apostoli hac de re dicāt. Sanè D. Paulus, tametsi non semel, sed sæpè, de structura & regimine Ecclesiæ Christi loquatur, nusquam tamē Reges & Principes sæculares, sed ubiq; Apostolos & Episcopos, nominare solet. Proferā tria ipsius testimonia. PRIMVM est Act 20.28. *Attendite vobis & vniuerso gregi, in quo vos Spiritus S. posuit Episcopos regere Ecclesiam Dei.* Verba aperta sunt. Qui ergo constituti sunt præsides & Rectores Ecclesiæ Christi? Episcopi. A quo constituti sunt? A Spiritu sancto. Reges ergo vel constituti non sunt; vel à Spiritu sancto non sunt. Alterum est, Eph. 2.20. *Superedificati super fundamētum Apostolorum & Prophetarū, ipso summo angulari lapide Christo Iesu.* Hic in structura Ecclesiæ nullū fundamentum est, præter Christum, Apostolos & Prophetas. At si Reges ad illam structuram pertinerent, & quidem magis, quàm Apostoli & Prophetæ,

8. Ex his testimoniis sic concludo. In Ecclesia Christi est legitimus quidam ordo, seu, ut alii vocant, dispositio & Hierarchia, in qua alii Prælati, alii subditi sunt: alii Pastores, alii oues: alii in fundamento, alii supra fundamentum: alii Doctores, alii discipuli. Vele ergo Reges includuntur in hac hierarchia, tanquam Primates, vel tanquam subditi. Si hoc posterius, salua res est. Si illud prius, necesse est, maiori potestate præditos esse, quàm Apostolos & Episcopos. Nam si vel parem cum illis, vel inferiorem potestatem haberent, non rectè dicerentur esse primates Ecclesiæ. Si ergo maiorem habent, ea sine dubio à Christo ipsis concessa est. At ubi & quibus verbis? Aut ubi Apostoli in suis scriptis & actis illius potestatis à Christo concessæ meminerunt? In testimoniis citatis nihil inuenio. Omnes silent de Regibus: loquuntur de Apostolis. Solus Rex Angliæ cum suo Sa-

cellano, dicit rem ita habere. *An à vobis*, inquit Apostolus, *Verbum Dei processit? aut in vos solos peruenit?* 1. Corinth. 14. 36.

9. VENIO ad praxin Ecclesiæ, quæ tempore Apostolorum seruata est. Ea, sine dubio, fallere non potest. Quis ergo tunc Ecclesiam gubernauit? Apostoli. (Actor. 20. 28.) Quis primam Synodum, quæ Hierosolymis celebrata est, indixit? Apostoli. (Acto. 15. 6) Quis huic synodo cum auctoritate præsedit? Apostoli. Quis sententiam dixit? Apostoli. Quis legem de abstinentia ab immolatis simulachrorum, & sanguine & suffocato sanciuit? Apostoli. Quis Corinthium incestuosum excommunicauit? Paulus Apostolus (1. Cor. 5. 3.) Quis accusationem aduersus Presbyteros, tanquam legitimus iudex admisit? Timotheus Episcopus. (1. Timo. 5. 19.) Quis Ananiam & Saphiram in causa Ecclesiastica puniuit? Petrus Apostolus (Act. 5. 3.)

Nullæ

Nullæ hic partes Regum ; nullum vestigium.

10. DICET fortè Rex, eo tempore nullos fuisse Reges Christianos, qui Ecclesiam gubernare, & hæc officia præstare potuissent. Rectè quidem. Sed nec erant Apostoli aut Episcopi Christiani, antequam Christus eos vocaret, & designaret. Sicut ergo novos Apostolos & Episcopos in noua Ecclesia instituit: cur non etiam novos Reges, qui Ecclesiæ præessent? Et sicut Paulum Ecclesiæ persecutorem, subito in vas electionis immutauit: cur non simili modo egit cum Tiberio Imperatore, vel Herode Rege?

11. HINC iam sumo nouum argumentum ex circumstantiis in hunc modum: Si Christus voluit Reges esse Primates Ecclesiæ, & supra Apostolos & Episcopos iurisdictionem exercere: cur non statim ab initio, sicut certos Apostolos elegit, sic etiam certos Reges designauit, qui Eccle-

sic præfiderent? Cur non statim, sicut Apostolos instruxit, quo pacto prædicarent Euangelium, administrarent sacramenta, & Ecclesiam propagarent: sic etiã Reges edocuit, qua ratione Apostolis, & doctoribus in regimine Ecclesiastico præessent, synodos conuocarent, cōtrouerfias dirimerent? Cur denique sicut Apostolis, præter priuatam instructionem, promisit Spiritum sanctum, cuius instinctu cætera omnia cognoscerent, quæ ad ipsorum ministerium pertinabāt: sic non etiam Regibus promisit eundem Spiritum qui eos in suo officio perfectius omnia edocerent? Nihil horum factum.

12. CONCLVDO, Reges ex institutione Christi non habere Primatum Ecclesiæ; quia nec verba Christi, nec testimonia Apostolorū, nec praxis primæ Ecclesiæ, nec circumstantiæ rerum, vlla ratione id significant. Omnia Apostolis, & eorū successoribus.

cessoribus patrocinaur. De illis dictum est. Acto. 20. 28. *Spiritus sanctus posuit vos regere Ecclesiam Dei.* Et 1. Corinthior. 4. 1. *Sic nos existimet homo, ut ministros Christi, & dispensatores mysteriorum Dei.* Et 2. Corinth. 5. 20. *Pro Christo legatione fungimur.* Et Luc. 10. 16. *Qui vos audit, me audit: & qui vos spernit, me spernit.* Et plura in eandem sententiam.

Obiectio.

13. Sed multa obiicit Rex Angliæ in sua Apologia, his verbis: *Quid in Novo Testamento? Ouenis animaiis (Regibus) subiici iubetur, idq; propter conscientiam. Orandum quidem & pro omnibus, sed præcipuè pro Regibus & in auctoritate constitutis, ut sub iis piam ac pacatam, honestamque vitam degamus. Magistratus Dei administer est ad ulciscendos facinorosos: innocentes autem, atq; probos remunerandos. Omnibus quidē obtemperandum est superioribus pote-*
K 5 *statibus*

statibus, sed potissimum principibus, & in eminentia collocatis Reddite unicuique quod suum est: timorem, cui timor: amorem, cui amor iure debetur. Date Cesari, qua Cesaris sunt; Deo qua Dei sunt. Regnum meum non est de hoc mundo: Quis me constituit iudicem super vos? Reges gentium dominantur eorum. Vos autem non sic. Haftenus Rex.

14. Sed facilis solutio. Ac primum, ut generatim dicā, quod res est: Hæc testimonia partim ad quæstionē, de qua agitur, non faciunt: partim quatenus à Christo & Apostolis prolata sunt, pertinent ad Reges & Imperatores Ethnicos, cuiusmodi erant Tiberius, Caius, Claudius, Nero & similes. Certum autē est, Christum & Apostolos non voluisse suis testimoniis significare, Reges & Imperatores ethnicos habere primatū in Ecclesia. Qui enim sunt extra Ecclesiā, quomodo Primates sint in Ecclesia? qui ne quidem membra, quomodo caput? qui hostes Christi, quomodo Vicarii?

15. Spe-

15. Speciatim sic respondeo. Illud Roman. 13.1. *Omnis anima potestatibus sublimioribus subdita sit*: nihil omnino contra nos facit. Habet enim hunc facilem & obuium sensum: *Omnis homo, qui sub potestate est, debet obedire suo superiori, in rebus, in quibus superior est.* Quis hoc nescit? Nego autem, Reges esse superiores in rebus Ecclesiasticis ac spiritualibus. Hoc probandum erat. Ex hoc autem loco probari non potest.

16. Illud etiam 1. Timoth. 2.2. *Orandum pro omnibus, sed precipuè pro Regibus, & in authoritate constitutis, ut sub iis piam ac pacatam vitam degamus*, partim malè citatum, partim malè intellectum est. Non enim addit Apostolus illam particulam, *precipuè*, nec illam item, *sub iis*, sed illis relictis, sic habet: *Obsecro igitur primum omnium fieri obsecrationes, orationes, postulationes, gratiarum actiones pro omnibus hominibus: pro Regibus, & omnibus, qui in sublimitate sunt, ut quietam & tranquill-*

*quillam vitam agamus in omni pietate
& castitate. Hinc sanè non efficitur,
Reges habere Primatum in Eccle-
sia. Nec Apostolus eo loco præfert
Reges aliis hominibus, sed æqualiter
de omnibus loquitur, vt patet ex se-
quentibus, vbi rationem reddit, cur
pro omnibus orandum sit, quia, in-
quit, hoc acceptum est coram Salvatore
nostro Deo, qui vult omnes homines sal-
uos fieri, & ad agnitionē veritatis veni-
re. Vnus enim Deus, vnus & mediator
Dei & hominū, homo Christus Iesus, qui
dedit redemptionē semetipsum pro omni-
bus. At Deus æquē vult omnes saluos
fieri: Et Christus æquē pro omnibus
mortuus est, æquē pro omnibus se-
metipsum tradidit. An Rex Angliæ
putat, pro se magis, quàm pro Apo-
stolis & Episcopis, mortuum esse
Christum? aut Deum magis velle, vt
Rex saluus fiat, quàm eius Sacella-
nus? Non ita est. Addo, D. Paulum
ibi loqui de Regibus gentilibus, qui
ad agnitionem veritatis nondum ve-
nerant.*

nerant. Vult enim orationes fieri pro illis, vt conuertantur, & salui fiant. At quæ hæc consequentia est: *Orandum est pro Regibus ethnicis, vt ad fidem Christi conuertantur: Ergo Reges ethnici primatum tenent in Ecclesia Christi?* Planè absurda est.

17. Illud verò, Rom. 13. 4. *Magistratus Dei administer est ad vlciscendos facinorosos: vel vt vulgata lectio habet: Dei minister est vindex in ira ei qui malum agit: nihil ad rem facit.* Fatemur, Reges portare gladiū, & habere potestatem puniendi peccata subditorum: & in ea re iustitiæ diuinæ ministros esse. At negamus hanc potestatem extendi ad causas & tribunal ecclesiasticum. In hoc tribunali præsident Apostoli & Episcopi. Illi, vt ostensum est, conuocāt synodos; sententiam dicunt; litem dirimunt, nouas constitutiones sanciunt; contumaces excommunicant; & similes ecclesiasticæ iurisdictionis actus ex officio exercent. Reges procul sunt ab hoc tribunali.

20. Iam illud, Matth. 22. 21. *Reddite, quæ sunt Cæsaris, Cæsari: & quæ sunt Dei, Deo:* omnino extra scopum est, ut ex Euangelio constat. Quærebant Iudæi à Christo, an tenerentur Cæsari Romano, qui tunc gentilis erat, tributum dare, nec ne? Christus, inspecto numismate, in quo Cæsaris effigies erat impressa, respōdit: *Date Cæsari, quæ Cæsaris sunt:* id est, date illi tributum, quod ei debetur. An hinc sequitur, Cæsarem gentilem eo tempore habuisse Primatum Ecclesiæ Christi in imperio Romano? aut Christum voluisse dicere, obediendum esse gentili Cæsari in rebus ad Ecclesiam pertinentibus? Nihil minus. Nisi quis putet, hanc collectionem esse legitimam; Christiani in Turcia habitantes debent Imperatori Turcarum pendere tributum, quod iure exigit: Ergo debent illum agnoscere Primatem in rebus Ecclesiasticis. Hoc Angli, qui in Turcia sunt, non concesserint.

21. Multò minus ad causam facit illud, Ioan. 18. 36. *Regnũ meum non est de hoc Mundo.* Quid enim? An quia Christus, secundum humanitatem, nõ est Rex temporalis, sed spiritalis; ideò Reges temporales habent Primatum in spiritalibus? Contrarium potius colligendum erat hoc modo: Regnum temporale distinctum est à spiritali: sicut ergo Christus & Apostoli administrant spiritale; ita Reges & Imperatores temporale. Itemq̃, sicut Christus, quia Rex spiritalis, non vult se immiscere regno temporali: ita Iacobus, quia Rex temporalis est, non debet se immiscere regno spiritali.

22. Eodem spectat illud Lucæ 12. 14. *Quis me constituit Iudicem aut diuisorem super vos?* Ex quo, si aliquid cõcludi debet ad rem, sic debet: Christus non est constitutus aliorũ iudex in cõtrouersis temporalibus, qualis est *de diuidenda inter fratres hereditate.* Ergo Rex Angliæ est constitutus Iudex in


dex in spiritualibus. At quæ hæc illatio est? Iam ante dixi, sic potius inferendū esse: Christus in causa temporali dixit, *Quis me constituit Iudicem super vos?* Ergo similiter Rex Angliæ in causa spiritali debet dicere, *Quis me constituit Iudicem super vos?*

23. Denique illud Lucæ 22. 25. *Reges gentium dominantur eorum, vos autem non sic: quid prodest ad primatū, de quo agimus? Nihil sanè. Sensus est: Reges gentiles solent esse ambitionosi, & multa per tyrannidem facere, ac suis potius, quàm subditorum commodis studere. Vos autem (mei Apostoli) nolite eos imitari, sed cum modestia & fraterna dilectione Ecclesiā administrate, sicut & ego facio. Eodem sensu ac spiritu dixit Petrus in priori epist. canonica c. 5. 3. *Pascite, qui in vobis est, gregem Dei, providentes non coactè, sed spontaneè, secundum Deū: neque turpis lucri gratiā, sed voluntariè: neque ut dominātes in cleris, sed forma facti regis ex animo.* Hinc iā inferat Rex*

Angliæ ; Apostoli non debent esse ambitiosi & crudeles , sicut Reges ethnici: Ergo Rex Angliæ tenet Primatum Ecclesiæ. Quid absurdius? Sic potius : Christiani non debent esse ambitiosi, more gentilium: Ergo Rex Angliæ , cùm Christianus sit, non debet ambire Primatum Ecclesiæ, quem multis iam sæculis Pōtifex Romanus legitimè & quietè vsurpauit.

24. Ex dictis duo colliguntur. VNUM est, nos ex nouo Testamento, variis testimoniis & argumentis perspicuè demonstrasse, Reges sæculares non habere Primatum & supremam Iurisdictionem in Ecclesia Christi. ALTERVM, nullum testimonium à Rege, vel Sacellano allatum esse, quod non potius contra, quàm pro ipso faciat. Nunc ad ius Canonicum & ciuile transeamus.





COMMENTARIUS.

1. **I**N hoc capite probaui; Primatum seu supremam gubernationem Ecclesiæ, non deberi Regibus, iure noui Testamenti, sed Apostolis & eorum successoribus. Id autem quatuor modis probaui. Primò, ex verbis Christi, quibus suam mentem in hac re declarauit. Secundò, ex testimoniis Apostolorum, qui sine dubio Christi mentem assecuti sunt. Tertiò, ex praxi, quæ illo tempore in Ecclesia seruata est. Quartò, ex circumstantiis. Deinde solui obiectiones, quæ à Iacobo Rege, pro Primatu Regio, allatæ erant. Videamus nunc, Tookere, quid tu sentias de his omnibus, & singula seorsim discutiamus.

Ex verbis Christi.

2. Igitur ex verbis Christi sic argumentatus sum: Dictum est Petro Apostolo, non autem Tiberio, Herodi, aut Pilato, *Pasce oues meas*. Ergo Apostolis, non Regibus aut Imperatoribus commissa est gubernatio Ecclesiæ. Dupliciter respondes ad hoc argumentum. Primò, his verbis: *Dictum est de Tiberio, Dato Cæsari, quæ*

Cæsaris sunt. Dictum est de Herode, Dicite illi vulpeculæ. Dictum est coram Pilato, Ego sum veritas. Sed non video, quorsum hæc spectent. Nisi, quod verisimile est, velis sic ratiocinari: Christus dixit de Tiberio, *Reddite Cæsari, quæ Cæsaris sunt*; Ergo significauit, Tiberium habere Primatum Ecclesiæ. Similiter; Christus dixit de Herode, *Dicite illi vulpeculæ.* Ergo vulpeculæ commisit suam Ecclesiam. Denique; Christus dixit coram Pilato, *Ego sum veritas*: Ergo testatus est, Pilatum præesse Ecclesiæ. Age, Tookere: Vis hoc inferre, vel aliud? Si hoc, ineptè. Si aliud, otiosè.

3. Secundò respondes, quidquid Petro dictum est, non soli Petro, sed aliis quoque Apostolis dictum esse; ac proinde, ex verbis Christi non posse conuinci, Petrum præ aliis Apostolis habere Primatum Ecclesiæ, sed potius, omnes Apostolos in hac repares esse, nec alterum alteri præferendum. Vbies, Tookere? Non quæritur hîc, an Petrus præ aliis Apostolis habeat Primatum Ecclesiæ (quod alio loco, si opus erit, disputabitur) sed solùm, an Christus in nouo Testamento voluerit Apostolos & eorum successores, an verò Reges & Imperatores, præesse suæ Ecclesiæ? Ego pro Apostolis pugno: tu pro Regibus & Im-

& Imperatoribus. Ego contendo, Petro, non Herodi dictum esse, *Pascas oves meas*. Tu vicissim contendis, de Herode, non de Petro dictum esse, *Dicite illi vulpecule*. Vter rectius? An ego, qui Pastori oves committo; an tu, qui vulpeculam in ouile intromittis?

Ex testimoniis Apostolorum.

4. Produxi tria testimonia D. Pauli, quæ confirmant Primatum Episcoporum, non Regum aut Principum sæcularium. Primum est, Act. 20. 28. *Attendite vobis & uniuerso gregi, in quo vos Spiritus sanctus posuit Episcopos regere Ecclesiam Dei*. Alterum, Ephes. 2. 20. *Superædificati super fundamentum Apostolorum & Prophetarum, ipso summo angulari lapide Christo Iesu*. Tertium, Ephes. 4. 11. *Ipse dedit quosdam quidem Apostolos, quosdam autem Prophetas, alios verò Euangelistas, alios autem Pastores & Doctores ad consummationem Sanctorum in opus ministerii in ædificationem corporis Christi*. In quibus testimoniis ex professo agitur de structura & gubernatione Ecclesiæ in nouo Testamento; & tamen nulla fit mentio Regum;

Principum secularium, sed Apostolorum
& Prælatorum Ecclesiæ.

5. Respondes, D. Paulum in citatis testimoniis non loqui de exteriori regimine Ecclesiæ (de quo dicis, illum alibi agere) sed tantum de prædicatione Euangelii & Sacramentorum administratione. Non ita est, Tookere. Loquitur etiam de exteriori regimine. Hoc clarè indicant illa verba, *Spiritus sanctus posuit vos Episcopos regere Ecclesiam Dei*. Deinde, si alibi loquitur de exteriori regimine, profer vel vnum locum, ubi dicat, externum regimen Ecclesiæ, non ad Episcopos, sed ad Reges & Imperatores pertinere. Nunquam id facies.

6. Addis, eo tempore, quo Apostoli vixerunt, non opus fuisse Regibus, qui in externo regimine præessent Ecclesiæ, eo quod satis præsidii ad eam rem esset in ipsis Apostolis, qui tunc coruscabant miraculis, & alia patrabant admiratione digna. Sic enim habes: *Satis præsidii fuit in ipsis (Apostolis) ad illud tempus primævæ Ecclesiæ, cum ipsi coruscarent miraculis, virtutesque magnas facerent, Dæmonia partim eiecissent, partim subiicerent sibi ipsis in nomine Christi; obstinatos ac rebelles Satanae iderent ad destructionem carnis*. Et post aliquot

aliquot pagellas iterum: *Pro illis temporibus erat satis presidii in Apostolis, Apostolicisq; viris, atque Evangelistis, pro gubernanda Ecclesia.*

7. Rectè. Fateris ergo, Apostolos eo tempore gubernasse Ecclesiam, non Reges aut Imperatores. Hoc ipsum est, quod virgemus. Quid ergo paulò antè mulsitas de Tiberio, Herode, & Pilato? Aut cur illis Primatum Ecclesiæ astruebas? Non illi, sed Apostoli regebant tunc Ecclesiam, vt tu ipse concedis. Et, quo iure regebant? Non alio sanè, quàm iure noui Testamenti. At hoc ius mutatum non est. Ergo gubernatio Ecclesiæ, eodem iure, quo tunc pertinebat ad Apostolos, nunc pertinet ad Episcopos, Apostolorum successores. Nihil certius. Nec tu amplius tergiversari hîc potes. Sic enim te constringo: Quidquid iuris habuerunt Apostoli in exteriori regimine Ecclesiæ, hoc acceperunt Episcopi, qui illis successerunt, singuli in suis Provinciis: At Apostoli habuerunt plenum & perfectum ius in exteriori regimine Ecclesiæ, independenter à Regibus & Imperatoribus: Ergo etiam Episcopi, qui illis successerunt, eodem iure vsi sunt. Minor à te concessa est, & paulò post iterum concedetur. Maiorem probo, quia in toto nouo Testamento non potes mihi vel apicem

ostendere, qui insinuet, ius illud, quod Apostolis concessum est, fuisse postea reuocatum, & ab Apostolis ad Reges & Imperatores, non autem ad Episcopos transiisse.

8. Hæc sufficiant de tribus testimoniis, quæ ex D. Paulo, pro Primatu Episcoporum à me allata sunt. Adieceram, ex occasione, duas quæstiones, quas hic repetam. Vna erat, cum in Ecclesia Christi sit legitimus quidam ordo, in quo alii Prælati, alii subditi sunt; alii Pastores, alii oues; alii doctores, alii discipuli; an Reges includantur in hoc ordine, tanquam Primates, an tanquam subditi? Tu respondes, includi, vt subditos. Verba tua sunt hæc: *Includuntur, vt subditi, & toti Ecclesiæ Catholice subiecti.* Vera confessio. At hinc sequitur, quòd nos volumus, Episcopos in Ecclesia superiores esse Regibus. Hi enim, vt fatearis, subditi sunt; illi Prælati: Hi oues, illi pastores; hi discipuli, illi Doctores. Quod etiam alibi ingenuè fassus es, his verbis: *Serenissimus ac piensissimus Rex noster Iacobus, non habet quicquam antiquius & honorificentius, quàm vt cum Valentiniano filium se Ecclesiæ profiteatur, & cum Theodorico Italiæ Rege, se alumnum Ecclesiæ, & discipulum Archiepiscoporum suorum & Episcoporum, libenter recognoscat.*

9. Altera quæstio erat, an Apostoli in suis scriptis vnquam significarint, Reges habere maiore potestatem in Ecclesia, quàm Episcopos. Hic tergiuersaris, Tookere; & post longam digressionem, quam instituis contra Pontificem, tandem ita subiungis: *Inuenio, nihil prouisum fastui Pontificio, multum autem honori Regio consultum & attributum. Honorandos omnes, honorandum Regem præcipue: orandum pro omnibus, ac deinde, (ac si primum locum dedisset Regibus) pro Regibus & omnib. in sublimitate constitutus.* Addis hæc duo testimonia: *Omnis anima potestatibus sublimioribus subdita sit. Et, Subditi esote omni humane ordinationi, siue Regi vt præcellenti.*

10. Videamus, quid in his verbis præsidii sit. Ex iis fieri possunt hæc quatuor argumenta. Primum; Omnes sunt honorandi, sed præcipue Reges: Ergo Reges habent maiorem potestatem in Ecclesia, quàm Episcopi. Respondeo. Antecedens verum est, si Reges conferantur cum suis subditis, & quidem in rebus ciuilibus. Ibi enim magis honorandi sunt, quàm subditi. Falsum, si conferantur cum Episcopis, ac potissimum in rebus Ecclesiasticis. Nam ibi Episcopi plus honorandi sunt, quàm Reges. Episcopi, vt Magistri; Reges, vt Discipuli, vt paulò ante fassus es.

Hinc S. Ignatius, Ioannis Euangelistæ discipulus, in epistola ad Philadelphienſes: *Omnis, inquit, Clerus simul cum omni populo, & militibus atque Principibus, sed & Cæsare, obediant Episcopo: Episcopus verò Christo.* Et Cyrillus Catecheli 17. *Ad hodiernam vsque diem cernimus, mundanos Principes regi & instrui ab Ecclesiasticis.*

11. Alterum; Orandum est pro omnibus, & quidem primo loco pro Regibus: Ergo Reges habent maiorem potestatem in Ecclesia, quàm Episcopi. Tertium: Omnis anima debet esse subiecta sublimioribus potestatibus: Ergo Reges, in Ecclesiæ regimine præferuntur Episcopis. Quartum: Subiecti estote Regi: Ergo Rex est supra Episcopos. Hæc argumenta soluta sunt capite præcedenti; & paulò post iterum de illis agendum est. Igitur ad alia pergamus.

Ex praxi Ecclesiæ.

12. De hac re ita scripsi; Venio ad praxin Ecclesiæ, quæ tempore Apostolorum seruata est. Ea, sine dubio, fallere non potest. Quis ergo tunc Ecclesiam gubernauit? Apostoli. Act. 20. 28. Quis primam synodum, quæ Hierosolymis celebrata est, indixit? Apostoli. Act. 15. 6. Quis huic synodo

nodo cum authoritate præfedit? Apostoli. Quis legem de abstinencia ab immolatis simulachrorum, & sanguine & suffocato sanciuit? Apostoli. Quis Corinthium incestuosum excommunicauit? Paulus Apostolus, 1. Corinth. 5.3. Quis accusacionem aduersus presbyteros, tanquam legitimus Iudex admisit? Timotheus Episcopus. 1. Tim. 5.19. Nullæ hîc partes Regum; nullum vestigium.

13. Tu respondes, his verbis: *Omnia conceduntur*. Valde liberalis es, Tookere: & metuo, ne Rex aut Sacellanus tibi offendatur. Concedis, Apostolos gubernasse Ecclesiam, indixisse Synodum, in Synodo cum authoritate præfedissee, sententiam dixisse, legem ecclesiasticam sanciuisset, cõtumaces excommunicasse, in causis ecclesiasticis legitimos iudices fuisse. Satis est: plus non desidero. Iam sic possum argumentari: Qui propria authoritate gubernat Ecclesiam, & reliqua omnia facit, quæ spectant ad gubernationem Ecclesiæ, is habet Primatum in Ecclesia: At Apostoli propria authoritate gubernarunt Ecclesiam, & reliqua omnia fecerunt, quæ spectabant ad gubernationem Ecclesiæ: Ergo Apostoli habuerunt Primatum in Ecclesia. *Omnia, inquis, conceduntur*. Igitur pergo, vt supra feci; Episcopi, qui succedunt

dunt Apostolis, habent idem ius in exteriori gubernatione Ecclesiæ, quod habuerunt Apostoli: At Apostoli habuerunt ius Primatus: Ergo Episcopi, eorum successores, habent idem ius Primatus. Quid nunc ages cum vestro Rege? quid cum Sacellano? Quamuis hunc facile placabis, ut opinor, quia cum iam sit Episcopus Eliensis, putabit, suo honori valde consultum esse, si asseras, Episcopos habere Primatum Ecclesiæ, non Reges. At Rex, sine dubio, murmurabit.

Ex circumstantiis.

14. Ex circumstantiis sic argumentatus sum: Si Christus voluit Reges esse Primates Ecclesiæ, & supra Apostolos & Episcopos iurisdictionem exercere; cur non statim ab initio, sicut certos Apostolos elegit, sic etiam certos Reges designauit, qui Ecclesiæ præsiderent? Cur non statim, sicut Apostolos instruxit, quo pacto prædicarent Euangelium, administrarent Sacramenta, & Ecclesiam propagarent; sic etiam Reges edocuit, qua ratione Apostolis & Doctoribus in regimine ecclesiastico præessent, synodos conuocarent, controuersias dirimerent, contumaces excommunicarent? Cur denique, sicut Apostolis, præter priuatam instru-

instructionem, promisit Spiritum sanctum, cuius instinctu cætera omnia cognoscerent, quæ ad ipsorum ministerium pertinebant; sic non etiam Regibus promisit eundem Spiritum, qui eos in suo officio perfectius omnia edoceret? Nihil horum factum.

15. In hoc meo argumento continetur hæc trimembris quæstio: Si Christus voluit, Reges habere Primatum Ecclesiæ, cur initio certos aliquos non designauit? cur non instruxit? cur Spiritum sanctum non promisit? Hic tu irasceris, Tookere; & vocas me *Novitium in fide Christi, mirum, stultum, delirum*. Ignosco tibi. Nec iam solum, sed usque septuagies septies, si pergis. Mox obiicis, cum tam multa quæram de Regibus, cur non similiter quæram;

*Dic quibus in terris, inscripti nomina Regum
Nascuntur flores?*

Dicam tibi. Non soleo nugari in re seria; neque extra chorum saltare. De Primatu Ecclesiæ nunc agitur, non de floribus: nec ex Virgilio, sed ex Evangelio lis finienda est. Igitur pergam te urgere, dum respondeas. Si, inquam, Christus voluit, Reges præesse Ecclesiæ, cur neminem designauit? cur non instruxit? cur Spiritum sanctum non promisit? Tandem aliquid extorsi. *Ad hæc tria, inquis, ζητηματα, vniუსmodι, &*
sino

simplex responsio nostra. O altam sapientiæ cognitionisq; Dei opulentiam! quàm penitus recondita eius iudicia! quàm abstruse sunt eius rationes! Quis enim mentem Domini nouit, aut quis eius fuit consiliarius? Scrutare, si libet, profunda Dei: abyssus abyssum inuocat. Nondum venerat plenitudo temporis, ut vocarentur Reges: ab ortu Solis usque ad occasum eius, vniuersus orbis terrarum vocandus erat. Pro illis temporibus erat satis præsidii in Apostolis pro gubernanda Ecclesia.

16. Hæc non simplex, sed triplex responsio est. Prima, Nescio, Deus nouit. Altera, Nondum erat tempus, ut vocarentur Reges. Tertia, Satis erat præsidii in Apostolis pro gubernanda Ecclesia. Prima reliquas destruit. Nam si nescis, quod quæritur, quomodo scis? Quæsiui ex te, cur Christus ab initio non designarit aliquem Regem, qui gubernaret Ecclesiam, si volebat Ecclesiam à Regibus gubernari? Respondes, ideò non fecisse, tum quia nondum erat tempus vocandi Reges; tum etiam, quia nulla erat necessitas, quia Apostoli per se poterant regere Ecclesiam. Hæccine vera causa est, Tookere? Omni-
no, inquis. At, si veram causam scis, quomodo nescis? Aut si nescis, quomodo scis?

An pro-

An profunda Dei iudicia scrutatus es? An consiliarius eius fuisti?

17. Nondum acquiesco. Disceptamus inter nos, An Christus Apostolos & eorum successores voluerit præesse Ecclesiæ, an verò Reges & Principes sæculares? Prior pars à me asseritur; pòsterior à te. Hastenus ostendi, verba Christi, testimonia Pauli, praxin Ecclesiæ, pro me stare. Nunc de circumstantiis agitur. Ex iis sic disputo; Omnes circumstantiæ, quæ faciunt ad Primatum, fauent Apostolis; nullæ Regibus: Ergo, si ex circumstantiis iudicandum est, Apostoli, non Reges, habuerunt Primatum Ecclesiæ. Antecedens probò, quia Christus, cùm institueret nouam Ecclesiæ formam, Apostolos vocauit, elegit, instruxit, claues commisit, Spiritus sancti charismata impertiuit. Nihil horum factum est Regibus. Nulli à Christo vocati, electi, instructi sunt; nullis clauem Ecclesiæ tradidit; nullis Spiritum sanctum largitus est. Qui ergo verisimile sit, non Apostolos, sed Reges, Ecclesiæ gubernatores à Christo designatos esse? Hic certè homini prudenti non satisfacies, Tookere, si exclames: *O altam sapientiæ cognitionisq; Dei opulentiam.* Addo aliam circumstantiam, quæ non parum momenti habet.

Apo

Apostoli non solum à Christo vocati, electi, instructi, potestate clauium & Spiritu sancto donati sunt; sed etiam re ipsa Ecclesiam gubernarunt, synodum indixerunt, legem sancierunt, contumaces excommunicarunt, in causis ecclesiasticis legitimi Iudices fuerunt. Nihil horum affirmari potest de Regibus. Quæ ergo temeritas est, Primatum Ecclesiæ negare Apostolis, quibus omnes circumstantiæ patrocinantur; & asstruere Regibus, qui omni circumstantiarum prælidio destituti sunt? Utinam, Tookere, quod alibi importunè facitis, hic opportunè faceretis. Alibi vociferamini, Ecclesiam nostram corruptam esse, nec aliter repurgari posse, quàm si ad pristinum statum, in quo fuit tempore Apostolorum, reuocetur. At, mi homo, tempore Apostolorum, non Reges, sed Apostoli gubernabant Ecclesiam, ut tu ipse fassus es. Cur ergo Ecclesiam vestram Anglicanam ad normam Apostolicam non reducitis? Cur illius supremam gubernationem transfertis in Reges & Reginas, & non potius Apostolorum successoribus sanctam ecclesiam conseruatis?

Consule Sacellum.

Obie-


Obiectio.

18. Dilui superius obiectionem Iacobi Regis, quæ nitebatur aliquot Scripturæ testimoniis. Singula seorsim à me discussa sunt, & apertè ostensum, nullo modo Primatum Regis confirmari ex iis posse. Tu tamen non quiescis, Tookere; sed partim conaris promouere testimonia à Rege allata; partim alia quædam in subsidium adiungis. Nominatim hæc duo: 1. Dictum est de Herode; *Dicite vulpeculæ illi.* 2. Dictum est coram Pilato, *Ego sum veritas.* Quid vis? An vt excutiam hæc duo? Nihil quidem necesse; sed tamen, si omnino vrges, faciam non inuitus. Igitur ex priori non aliter potes confirmare Primatum Regis, quàm hoc modo; Christus monitus à Pharisæis, vt fugeret, eò quòd Herodes vellet illum occidere, respondit illis: *Ite & dicite vulpi illi, Ecce eijcio dæmonia, & sanitates perficio hodie & cras, & tertio die consummor.* Ergo Herodes habebat tunc Primatum Ecclesiæ. Probatur consequentia, quia *vulpes habent foveas; filius autem hominis non habet, ubi caput suum reclinat.* Ex posteriori sic: Christus dixit coram Pilato: *Ego ad hoc veni in Mundum, vt testimonium perhibeam veritati.*

M

Ergo

Ergo Pilatus habebat supremam administrationem Ecclesiæ. Consequentia probatur, quia *quod scripsi, scripsi*. Itane sentis, Domine Tookere? Certè, magni acuminis Theologues. Quis neget?



CAPVT IV.

An Rex iure civili vel Canonico habeat Prælatum Ecclesiæ?

I. **N**Eutro sanè. De Canonico, res clara est. Multi extant Canones in contrarium. Exiis paucos accipe. *Primus* est Nazianzeni ad Imperatores Constantinopolitanos, apud Gratianum, distinct. 10. can. 6 *Libenter accipitis, quod Lex Christi sacerdotali vos subiicit potestati, atque istis tribunalibus subdit. Dedit enim & nobis potestatem: dedit & principatum multo perfectiorem principatibus*

ribus vestris. Ex hoc canone tria habemus 1. quod principatus Episcoporum sit multo perfectior, quam Regum. 2. quod Reges in rebus Ecclesiasticis, subiecti sint Episcopis. 3. quod hæc subiectio à Christo sit ordinata Quid clarius?

2. SECVNDVS est Adriani Pape. dist. 63. cap. 1. *Nullus laicorum Principum se inserat electioni aut promotioni Patriarchæ, Metropolitæ, aut cuiuslibet Episcopi; ne videlicet inordinata & incongrua fiat electio, vel confusio, vel contentio: præsertim cum nullã in talibus potestatem quemquã potestatiuorum, vel ceterorum Laicorum habere conueniat.* Ex hoc canone etiam tria discimus. 1. quod nullus Princeps sæcularis (qualis est Rex Angliæ) debeat se inferere promotioni aut electioni Episcoporum. Quanto minus debet præesse & præsidere? 2. quod talis electio, cui se inserit Princeps sæcularis, sit inordinata,

M 2 & con-

& confusa 3. Quod in similibus causis Ecclesiasticis nullam potestatem habeat Princeps sæcularis. Multò minus Primatum.

3. TERTIVS est, ex 7. Synodo. act. 2. distin. 63. can. 7. *Omnis electio Episcopi à Principibus facta, irrita maneat, secundum Regulam, quæ dicit: Si quis Episcopus, secularibus potestatibus usus, Ecclesiam per ipsos obtinuerit, deponatur: & segregentur ab Ecclesia omnes, qui illi communicant.* Sanè secundum hunc Canonem, omnes Episcoporum electiones irritæ sunt in Anglia, quotquot à Rege factæ sunt. Vbi ergo Primatus Regis in causis Ecclesiasticis?

4. QVARTVS est Gregorii ad Hermannum Episcopum Metensem, d. 96. can. 9. *Quis dubitet, Sacerdotes Christi, Regum & Principum omnium fidelium Patres & Magistros censerì? Nonne miserabilis insanie esse cognoscitur, si filius patrem, discipulus magistrum sibi conetur subiugare, & iniquis obli-*

obligationibus illum suæ potestati subiicere, à quo credit, non solum in terra, sed etiam in cælis se ligari posse & solui? Omnino sic res habet. Miserabilis infania est, Reges sæculares vsurpare sibi Primatum in Ecclesia, & subiugare sibi Episcopos, quorum filii & discipuli esse debent.

5. QUINTVS est Gelasii Papæ ad Anastasium Imperatorem, dist. 96. can. 10. *Duo sunt, Imperator Auguste, quibus principaliter hic mundus regitur, authoritas sacra Pontificum, & regalis potestas. In quibus tantò grauius est pondus Sacerdotum, quantò etiam pro ipsis Regibus in diuino sunt reddituri examinationem. Et infra: Nosti itaq; ex illorum te pendere iudicio, nõ illos ad tuam redigi posse volũtatem. Facto quidem possunt; iure non possunt.*

6. SEXTVS est Ioannis Papæ dist. 96. can. II. *Si Imperator Catholicus est: filius est, non Præsul Ecclesiæ. Quod ad religionem competit, discere ei conuenit, non docere. Et paulò post: Ad Sacer-*

dotes enim Deus voluit, quæ Ecclesiæ disponenda sunt, pertinere, non ad sæculi potestates: quas, si fideles sunt, Ecclesiæ suæ Sacerdotibus voluit esse subiectas. Et infra: Imperatores Christiani subdere debent executiones suas Ecclesiasticis Præsulibus, non præferre. Igitur, si Rex Angliæ Catholicus est; filius est, nō Præsul Ecclesiæ. Si fidelis est; Ecclesiæ sacerdotibus subiectus est. Si Christianus est; debet se subdere Episcopis, non præferre.

7. SEPTIMVS est Marcelli Papæ II. q. can. 3. *Clericum cuiuslibet ordinis, absq̃ Pontificis sui permissu, nullus præsumat ad secularem iudicem trahere. Ne laico quenguam clericum liceat accusare.* Nimirum clerici pertinent ad tribunal Ecclesiasticum, non ad politicum seu ciuile. Vnde rectè Valentinianus, Theodosius, & Arcadius Imperatores; *Continua lege sancimus, ut nullus Episcoporum, vel eorum, qui Ecclesiæ seruiunt, ad iudicia indicū protrahatur. Habent enim illi suos iudices.*

8. OCTA-

8. OCTAVVS est Gregorii ad Mauri-
 ritium Impc. II. q. I. can. 40. *In diui-
 nis eloquiis sacerdotes aliquando Di, a-
 liquando Angeli vocantur. Et paulo
 post; Quid igitur mirum, si illos vestra
 Pietas dignetur honorare, quibus in suo
 eloquio bonrē tribuens, eos aut Angelos,
 aut Deos ipsemet appellat Deus? Vide,
 quæ supra dicta sunt, c. 2. n. 35. & 57.*


9. NOVVS est Innocentii 3. in De-
 cretalibus, de maiestate & obedi-
 entia, can. 6. *Non negamus, quin præ-
 cellat Imperator in temporalibus, illos
 duntaxat, qui ab illo accipiunt tempora-
 lia: sed Pontifex in spiritualibus excellit,
 quæ tanto sunt temporalibus digniora,
 quanto anima præfertur corpori. Et in-
 fra; Nosse debueras, quod fecit Deus duo
 luminaria magna in firmamento cæli:
 luminare maius, ut præesset nocti. V-
 trumque magnum, sed alterum ma-
 ius. Ad firmamentum igitur cæli,
 hoc est vniuersalis Ecclesiæ, fecit DE-
 VS duo magna luminaria, id est duas in-
 spexit dignitates, quæ sunt, Pontificalis*

authoritas, & Regalis potestas. Sed illa, quæ præest diebus, id est, spiritualibus, maior est: quæ veró carnalibus, minor: ut quanta est inter Solem & Lunam, tanta inter Pontifices & Reges differentia cognoscatur.

10. Sufficiant hi pauci Canones. Nam plures citare, fortasse superuacaneum est: præsertim cum probabile sit, Regem Angliæ non tanti eos facere, ut eorum iudicio stare velit. Quâquam immeritò. Omnes enim Cathedræ Academicæ in Anglia, in quibus Iuris vtriusque Doctores antiquo ritu legitimè promouentur, non minorem iuris Canonici, quàm civilis auctoritatem esse, luculento testimonio sunt.

11. Ex iure civili occurrit illud Iustiniani Imperatoris, in Authentica constit. 123. *Si Ecclesiasticum negotium sit, nullam communionem habento civiles magistratus cum ea disceptatione, sed religiosissimi Episcopi secundum sacros Canones finem imponunto.* Præclara consti-

constitutio. Decernit Imperator, politicos & sæculares Principes non debere adesse, multò minus præsidere in negotiis & disceptationibus Ecclesiasticis. Quare? quia vult in ea re seruari sacros Canones, quibus cautum est, vt Episcopi, non autem Principes, tractent controuersias ad Ecclesiam pertinentes. Si Rex Angliæ ea mente esset, quâ hic Imperator fuit, sine dubio, Primatum Ecclesiæ Episcopis relinqueret, non sibi arrogaret. Plura in hanc sententiam vide in seq. capite.



COMMENTARIUS.

I. IN hoc capite adduxi nouem Canones ex iure canonico, & vnâ Constitutionem Imperialem ex iure Ciuili, contra Primatum Regis. Circa Canones, duo generatim dicis. Primò, me paucos ex multis delibasse; ideoque obliis mihi illud Poetæ:
*Tecum habita, & noris, quàm sit tibi curta
 supellex.*

Sed ineptè. Tibi hoc obiici debet, mihi non potest. An non legisti in vtroque Testamento, *In ore duorum vel trium testium stabit omne verbum?* Ego ex iure Canonico, non duos tantum aut tres, sed nouem testes adduxi pro mea causa: Tu pro tua, ne vnum quidem. Igitur, si testibus agitur, non mihi, sed tibi, supellex curta est; aut, vt verius dicam, nulla. Recipe ergo versiculum tuum, sed vno duntaxat verbulo immutatum; *Tecum habita, & noris, quàm sit tibi nulla supellex.*

2. Secundò dicis, te non magni facere Canones; nec aliud esse, quàm *additamenta, paleas, traditiones*; idque confirmas auctoritate Cornelii Agrippæ. Mira res. Vnus Agrippa, homo non bonæ notæ, pluris tibi est, quàm tot grauissimi authores, quorum sententiæ in ius Canonicum relatae sunt, & ab omnibus Academiis antiquioribus receptæ. Quid censes dicturos, qui apud vos in Anglia, vtriusque iuris Doctores, solenni ritu renuntiantur? An æquo animo, tuam in Ius canonicum contumeliam laturi sunt? Sed, durum telus necessitas. Aliter facere non potuisti. Si enim admitteres auctoritatem Canonum, cadendum esset causâ, quam suscepisti. Nam Canones tibi aduersantur. Mauis igitur hos repudiare, quàm iniquâ causâ deferere.

3. Atque

3. Atq; hæc generatim. Porro in singulis Canonibus seorsim discutiendis tria potissimum præstas, quæ non nisi ab homine iracundo, & parum cauto proficisci possunt. Primum est, quod ferè conuitio excipias Pontifices & Synodos generales, à quibus conditi sunt Canones. Hoc iracundiæ signum est. Alterum, quod nihilominus pleraque admittas, quæ in ipsis Canonibus contra Primatum Regium decreta sunt. In quo debebas esse cautior, si Regio Primatui consultum esse cupiebas. Tertium, quod dum Pontificum & Synodorum generalium auctoritatem apertè cõtemnis, in ipsos quoque Reges & Imperatores, tametsi id minimè aduertas, contumeliosus sis. Singula ostendam.

4. Quod ergo ad primum punctum attinet, de Adriano Pontifice sic scribis: *Adriani auctoritatem nihil moramur.* De Gregorio, sic: *Gregorius durus pater, vel potius capitalis hostis Henrici quarti, dictis ac factis simillimus Antichristo.* Et iterum: *Vox plena fastus & iactantiæ, plena stuporis & contumeliæ: digna sanè vox Ioue Capitolino vestro, id est, Romano Pontifice.* De Gelasio sic: *Gelasii aliorumq; dictata Pontificum Romanorum admittere non tenemur, quippe quæ pro turri illa Babylonica immoderati Principatus extruenda maxime*

ximè faciunt. De Ioanne Pontifice : Nazianzenus melius callet officium suum, quam Ioannes Papa. De Innocentio : Innocentius cæcus amore sui ac ambitione inflatus, fastuosus, impudens, contumeliosus, blasphemus, Antichristus. De septima Synodo generali, quæ est Nicæna secunda: Hæc Nicænæ Synodi authoritas imbecillior est, quàm ut nostram causam lædat. Denique de me, qui horum authoritate usus sum, sic habes : Non modò nequam es & improbus, sed etiam fatuus.

5. Et tamen cum tam iracundus sis, Tookere, in authores Canonum, quæ in ipsis Canonibus sancita sunt, non rarò vera esse concedis. Circa primum, qui est Nazianzeni, sic scribis : *Reges & Præsides subiiciuntur Sacerdotibus in rebus ecclesiasticis.* Circa quartum : *Quis dubitat Sacerdotes Christi, Regum ac Principum esse Patres & Pædagogos in Christo?* Circa quintum Gelasii ; *Quæ dicit ille Pontifex, dabuntur omnia.* Circa sextum : *Si Imperator verè Catholicus est, filius est Ecclesiæ Catholice, non Præsul.* Ex quibus omnibus formatur hæc propositio : Rex Angliæ subiicitur Sacerdotibus in rebus ecclesiasticis, & est illorum filius ac discipulus, non Præsul aut Primatum tenens. Et quid aliud hoc loco
 conten-

contendimus? Non enim agimus de Primatu in temporalibus & politicis, sed solum de Primatu in Ecclesiasticis. Si ergo in Ecclesiasticis Rex Angliæ subiectus est Sacerdotibus, tanquam filius ac discipulus; res salua est.

6. Iam, quod etiam in Reges & Imperatores iniquissimus sis, nisi te moneam, non facile aduertes. Audi igitur. Inter nos & vos contentio est, quis indixerit octo prima Concilia generalia, quis approbauerit, quis cum authoritate eis præfederit? Nos Pontifici, vos Imperatori id tribuitis. Igitur ex vestra sententia, septima Synodus à Constantino, octaua à Basilio Imperatoribus indicta, confirmata & approbata est. At tu de septima sic scribis: *Hæc Synodi authoritas imbecillior est, quàm vt causam nostram lædat.* De Adriano verò, cuius Canon ex octaua Synodo desumptus est, sic habes: *Adriani authoritatem nihil moramur.* Quid hoc aliud est, quàm apertè quidem in ipsas Synodos ac Pontifices, occultè autem in Imperatores, contumeliosum esse? Nam si Constantinus Imperator indixit & approbavit septimam Synodum, sanè cùm de Synodo sinistrè sentias ac loquaris, de Imperatore quoque sinistrè sentire ac loqui censeris debes. Itaque tuâ illa verba, quæ paulò antè effudisti: *Hæc Synodi*


Synodi authoritas imbecillior est, perinde valent, ac si dixisses, *Hæc Constantini Imperatoris & trecentorum ac quinquaginta Episcoporum authoritas imbecillior est*. Simile est de Basilio Imperatore. Nam si is indixit & approbavit octauam Synodum, ex qua Canon Adriani desumptus est; quidquid de hoc canone dixeris, de Imperatore dixisse existimandus es. Itaque pro illis verbis, *Adriani authoritatem nihil moramur*, poteras sic scribere, *Imperatoris authoritatem nihil moramur*. Iam aduertis, Tookere, quàm benè meritis sis de tuo Rege. Sacellanum adi, vt te purget.

7. Sed nondum purgandi tempus. Adhuc pergis in tua calumnia. Et sicut circa Canones à me citatos, occultè perstringis Reges & Imperatores; sic apertè id facis circa Imperatoriam constitutionem à me citatam. Citaui autem Constitutionem Iustiniani Imperatoris, quæ sic habet: *Si Ecclesiasticum negotium sit, nullam communionem habentò ciuiles magistratus cum ea disceptatione, sed religiosissimi Episcopi secundùm sacros Canones finem imponuntò*. In qua constitutione decernit Imperator, sæculares Principes non debere adesse, multò minus præesse aut præsidere in negotiis & disceptationibus Ecclesiasticis.

Et in

Et in ea re seruari vult sacros Canones, quibus cautum est, vt Episcopi, non autem Principes tractent controuersias ad Ecclesiam pertinentes.

8. Hic, inquam, apertè perstringis Imperatoriam authoritatem; & quidem tripliciter. Primò, quia cùm ego in hac vna Iustiniani Constitutione tantum momenti esse viderem, vt illam arbitrarer sufficere pro mea causa (tuam enim sine dubio euerit) tu per contemptum mihi obiicis illud ex Poeta, *Pauperis est numerare pecus*. Secundo, quia huic ipsi Constitutioni opponis, nescio quas alias sanctiones; quod nihil aliud est, quàm illius authoritatem enervare. Tertiò, quia Imperator in sua Constitutione allegat antiquos Canones; & non solùm allegat, sed etiam, pia veneratione, *Sacros* appellat. At tu, cum tuo Agrippa, parui pendens Imperatoris in hac re iudicium, & authoritatem, eosdem Canones, illiberati conuitio, *palearum* nomine vocasti. I nunc, & Regum ac Imperatorum patronum te esse, persuade. Vnius assentator es; aliorum hostis. Hoc sequenti Commentario clarius ostendam.



*An Rex, consensu doctorum
hominum habeat Prima-
tum Ecclesiæ?*

1. **E**Xcepto Sacellano, & quibusdam aliis adulatoribus, reclamationes omnes cordati & docti viri: Episcopi, Pontifices, Reges, Imperatores, alij. Seligam paucos, ne molestus sim: & incipiam à primitiua Ecclesia.

2. **S. I G N A T I V S**, Ioannis Euangelistæ discipulus, in Epistola ad Philadelphienſes, sic habet: *Principes subditi estote Cæsari, milites Principibus, Diaconi Presbyteris: Presbyteri verò & diaconi, atque omnis clerus, simul cum omni populo, & militibus atq; Principibus, sed & Cæsare, obediant Episcopo: Episcopus verò Christo, sicut Patri Christus: & ita unitas per omnia seruetur.* Vox digna viro Apostolico. Omnes, inquit, obediant Episcopo: Etiamne Cæsar? Omnino. Quidni & Rex?

3. **H O S I V S**

3. HOSIVS Cordubensis Episcopus, qui interfuit primo Concilio Nicæno, Constantinum Imperatorem sic affatus est; *Desine quæso Imperator, ne te misceas Ecclesiasticis, neq; nobis in hoc genere præcipe, sed potius ea à nobis discere. Tibi Deus imperium commisit; nobis quæ sunt Ecclesiæ, concedidit. Et quemadmodum, qui tuum Imperium malignis oculis carpit, contradicit ordinationi diuinæ: ita & tu caue, ne quæ sunt Ecclesiæ, ad te trahens, magno crimini obnoxius fias.* Refert hæc verba Athanasius in epistola ad solitariam vitam agentes,

4. S. AMBROSIVS epist. 33. ad Marcellinam sororem suam, scribit se Valentiniano Imperatori dixisse; *Noli te grauare Imperator, ut putes te in ea, quæ diuina sunt, imperiale aliquod ius habere. Noli te extollere, si vis diutius imperare. Esto Deo subditus. Scriptum est enim, quæ Dei, Deo; quæ Caesaris, Casari. Ad Imperatorem palatia perinent: ad Sacerdotem, Ecclesiæ. Pu-*

tiocho, & Herode comparat, asserens, malorum omnium esse voraginem & gurgitem, omnis impietatis caput, hæreticorum incitamentum, acerbitalis radicē, blasphemiam propugnatorem, religionis euersorem, & quæ similia sunt. Addit denique, inauditum esse, quod Reges & Imperatores misceant se causis ad Ecclesiam pertinentibus, & inter alia sic habet: *Quando à condito auro auditum est, quod iudicium Ecclesie, auctoritatem suam ab Imperatore accepit? aut quando unquam hoc pro iudicio agnitum est? Plurima antea Synodi fuere, multa iudicia Ecclesie habita sunt: sed neq; Patres istiusmodi res Principi persuadere conati sunt, nec Princeps se in rebus Ecclesiasticis curiosum præbuit.*

6. Conspirant alii Patres. S. MARTINVS Turonensis Episcopus, Maximo Imperatori in faciem dixit: *Novum esse & inauditum nefas, quod causam Ecclesie Iudex sæculi iudicaret; ut est apud Sulpitium lib. 2. sacræ hi-*

storiæ in fine. Et *Leontius* Episcopus Tripolitanus, teste *Suida*, ad constantium Imperatorem; *Miror quomodo ad alia vocatus, aliis rebus te immisceas, Militaribus enim & politicis rebus præfectus, in his quæ ad solos Episcopos pertinent præcesse vis*: Et *Cyrillus Hierosolymanus* catechesi 17. *Ad hodiernam usque diem cernimus mundanos Principes regi & instrui ab Ecclesiasticis. Omitto reliquos.*


7 Nec alia Regum & Imperatorum fuit sententia. Submiserunt se Episcopis & pontifici; neque causas Ecclesiasticas ad se pertinere arbitrati sunt. VALENTINIANVS senior Imperator cum importunè rogaretur, ut permetteret haberi Concilium, in quo de quibusdam rebus fidei decerneretur, respondit: *Mihi, qui vnus è numero laicorum sum, non licet, eiusmodi negotiis me interponere. Sacerdotes & Episcopi, quibus hæc cura sunt, ubicunque ipsis liberum fuerit conueniant.* Refert *Sozomenus* lib 6. histo. cap.

cap. 7. Nicephorus lib. II. cap. 30.
 Ruffinus libr. I. capi. 2. Baronius
 tom. 4. Annalium anno 364.

S. Eodem sensu & affectu THEO-
 DOSIVS Iunior in Epistola ad sy-
 nodum Ephesinam; *Candidianum*
Comitem ad hanc sacram vestram syno-
dum abire iussimus: sed ea lege & condi-
tione, ut cum quaestionibus & contro-
uersis, quæ circa fidei dogmata incidunt,
nihil quicquam commune habeat. Ne-
fas enim est, qui sanctissimorum Episco-
porum catalogo adscriptus non est, eum
Ecclesiasticis negotiis & consultationi-
bus se immiscere.

9. BASILIVS Imperator in oratio-
 ne, quam habuit in octava synodo
 generali, quæ tempore Adriani Pa-
 pæ, Constantinopoli celebrata est,
 in causa Photii Patriarchæ; *De vobis*
autem laicis, tam qui in dignitatibus,
quam qui absolutè versamini, quid am-
plius dicam, non habeo, quam quod nul-
lo modo vobis licet de Ecclesiasticis
causis sermonem mouere, neque penitus
 - N 3 *resiste-*

Imperatore scribit August. epist. 165.
Constantinus non est ausus de causa Episcopi indicare. An Rex Angliæ maior Constantino? Sacellanus ita vult.



COMMENTARIUS.

1. **I**N hoc capite citaui septem Patres & quatuor Imperatores, contra Primum Regium. Patres quidem, Ignatium, Hosium, Athanasium, Ambrosium, Martinum, Leontium, Cyrillum. Imperatores, Valentinianum, Theodosium, Basilium, Constantinum.

2. Tu, circa Patres, longè alius es, Tooke-re, quàm fuisti. Agis sobriè, modestè, pacificè: Et quæcunq; ab eis dicta sunt, vltro concedis, sub hac vel simili loquendi formula: *Rectissime: res ita se habet: veronihil verius: omnia, vt veritati consentanea, conceduntur.* Gaudeo, tam subito in alium virum mutatum te esse; præsertim si animo etiam, & non pelle tantùm mutatus es. Porro ex iis, quæ à Patribus dicta, à te concessa sunt, compendio hæc colligi possunt. 1. Rex Angliæ obediat Episcopo; Episcopus Christo. 2. Non misceat se ecclesiasticis negotiis. Non enim illi commissæ sunt. 3. Palatia ad illum pertinent,

N 4 non

non Ecclesiæ. 4. Nihil illi cum Synodis,
 5. Nec ullam Ecclesiæ causam iudicare debet. *Omnia, inquis, vt veritati consentanea, conceduntur.* Accipio.

3. Circa Imperatores duriores. Et valde suspicor, te ad ingenium hic redire. Iracundè fers, quod tam clarè locuti sint contra Primatum Regium: & accusas eos, quasi plus æquo tribuerint Episcopis, & hac ratione, suæ ipsorum authoritati plurimum derogarint. Sic enim scribis de Valentiniano: *Quod Episcopis totam rem reliquisset diiudicandam, non solertiam, sed timiditatem & inertiam hominis denotat.* Et de Basilio: *Esto, præiudicet sibi Basilius Imperator, aliisque; haud quidem veritati præiudicat.* Et de Constantino: *Non est ausus iudicare in persona propria, forsân ignarus Canonum & decretorum Ecclesiæ.*

4. Quid audio, Tookere? Tunc Imperatorum Christianorum censor factus es? Et quia non sentiunt ad tuum palatum, ideò inertiam, timiditatem, præiudicium, & ignorantiam illis obiicis? Video, quid spectes. Tuo Regi placere vis: reliquos non æstimas. Ille, *sapientissimus, doctissimus, clarissimus, prudentissimus, religiosissimus, deuotissimus* tibi est; reliqui, *inertes, timidi, præiudiciosi, ignari.* Hoc est, quod
 supra

supra dixi, vnius assentatorem te esse; reli-
quorum hostem.



CAPVT VI.

*An Rex titulo præscriptionis
habeat Primatum Ec-
clesiæ?*

1. **H**Oc planè videtur ipse velle.
Nam in *monitoria præfatione*
disertè ait; aliquos ex suis anteces-
soribus vsurpassè Primatum Eccle-
siæ in Anglia; neque passos esse, vt
Pontifex vllam iurisdictionem ibi
exerceret, sed ipsos eam sibi vendi-
casse. Itaque nihil noui se facere,
eundem Primatum vsurpando.

2. Sed valde friuolum hoc est.
Nam si sic liceret argumentari, faci-
le erit omnes penè abusus excusare.
Ostendam simili exemplo. Rex A-
CHAZ in Veteri Testamento cole-
bat falsos Deos, & veri DEI cultum
negligeabat, 4. Reg. 16. 3. QVÆRAM,

ritatem Pontificis, quàm respuerunt. Ergo & ego venerari eam volo, non respuere. Nec dubium, quin ita sit. Testes sunt Lucius, Eduinus, Osvaldus, Sigbertus, Penda, Ina, Eduardus, Henricus 2. & complures alii. Extant illorum acta. Ex his hæc accipe.

4. EDVARDVS in epist. ad Nicolaum 2. Pontificem, circa annũ Christi 1060. ita scribit: *Summo vniuersalis Ecclesiæ Patri Nicolao, Eduardus gratiâ Dei Anglorũ Rex debitam subiectionem & obedientiam.* Pauca; sed ponderosa verba. Agnoscit illum *Patrem*; & quidem *summum Patrem*; nec vnus alicuius particularis, sed *vniuersalis Ecclesiæ Patrem*. Quid amplius? Debitam subiectionem & obedientiam illi promittit. An hoc faceret, si supra Pontificem putaret esse Regiam maiestatem?

5. Nec aliter HENRICVS 2. in epistola ad Alexandrum 3. quæ habetur apud Petrum Blesensem Secretarium, epist. 136. *Vestra, inquit, magnitudini*

tudini promitto, me vestra dispositioni in omnibus pariturum. Itemq̃: Deus extulit vos in eminentiam officii pastoralis, ad dandā scientiam salutis plebi eius.

6. Regem Regina imitata est, pari animo, pari subiectione. ALEONORAM dico, Henrici Regis vxorem. Scripsit illa tres epistolas ad Cœlestinum Papam, in quibus vocat eum *Principem Sacerdotum, Vicarium crucifixi, successorem Petri, Christum Domini, DEVM Pharaonis, orbis Episcopum.* Et inter alia sic addit: *Non Rex, non Imperator à iugo vestre iurisdictionis eximitur.* Et rursum: *Christi crux antecellit Caesaris Aquilas: gladius Petri gladio Constantini, & Apostolica sedes præiudicat Imperatoriæ potestati.* Quid clarius? Extant hæ epistolæ apud eundem Blesensem, epist. 144. 145. & 146.


7. Hinc iam satis apparet, quid olim senserint Reges Angliæ de Primatu Romani Papæ. Ausim addere, vix ullos in orbe Christiano extitisse Reges, qui tam bene de Pontifice

sic meriti sint, quàm Anglicani. Parum putarunt, si in Ecclesiastico regimine illi parerent. Ipsum regnum, etiam in temporalibus, feudatarium illi fecerunt. Fatetur hoc Henricus 2. in epist. ad Alexandrum 3. iam citata, his verbis: *Vestra iurisdictionis est regnum Anglia: & quantum ad feudatarii iuris obligationem, vobis duntaxat obnoxius teneor & obstringor.*

8. Multò fufius id persequitur Polydorus Virgilius libro 4. historiæ Anglicanæ, vbi de INA Rege sic scribit: *Officia eius Regis, pietatis plena, infinita produntur: & illud in primis, quod Regnum suum Romano Pontifici vectigale fecerit, singulis argenteis nummis, quos denarios vocant, in singulas domos impositis. Fecit idem, eius exemplo, ut opinor, ductus, Offa Merciorum Rex, qui non multò post id tempus regnavit. Fuit is annus salutis circiter 740. Hoc vectigal, prout quidam scribunt, auxilio postea Atulphus Rex, qui ut proximo libro demonstrabitur, totius ferè Insule imperium*

Et quod magis mirum est, cur aliis quoque Regibus, ut idem faciant, conatur persuadere?

10. Ex DICTIS sic infero; Si in hoc negotio, præscriptioni locus esset, ea nobis potius faueret, quam Regi. Ab antiquis enim temporibus, ut iam ostensum est, usque ad Henricum 8. Elisabethæ parentem, tota Anglia quotannis solita est Romano Pontifici dare vectigal, in recognitionem supremæ ipsius jurisdictionis ecclesiasticæ; Ergo hoc suo facto, tam longa consuetudine præscripto, satis testatur, Pontificem esse Primatem Ecclesiæ vniuersalis, atque adeò Anglicanæ.



COMMENTARIUS.

1. **H**ic quæritur, an Rex Angliæ, titulo præscriptionis habeat Primatum Ecclesiæ. Posui duo argumenta. Vnum, quo Rex vtitur; alterum,

4. Igitur de eloquentia Regis, sic scribis: *Serenissima maiestas, tanquam aureum flumen verborum fundens, sic, præfatur: Nunc verò, ut cætera exterorum Regum facta præteream, satis erit decessorum meorum aliquot, qui in Anglia regnarunt, exempla memorare. Et prolixè recitas ea, quæ lequuntur. Sed, in Tookere, quid hoc ad rem? Aliud est, eloquentem esse; aliud, benè argumentari. Non quæritur hîc, quo verborum apparatu vel splendore utatur Rex Angliæ; sed quàm nervosè probet, Primatum Ecclesiæ, titulo præscriptionis ad se pertinere. Ego vrgeo, non posse hoc illum probare: tu ad aureum verborum flumen recurris. Quid hoc aliud est, quàm forum declinare? aut, sciscitanti de allijs, respondere de cepis?*


5. Iam alios Reges, qui hunc antecesserunt, & omni laude, propter eximiam erga Romanos Pontifices pietatem ac reuerentiam, dignissimi sunt, mirum est, quàm petulanter insecteris. Ais, *in crassissimis tenebris vixisse, simplices, infatuatos, bestię Romanæ obblandientes, magnos assentatores, aureo poculo fornicationum purpuratæ meretricis inebriatos: dixisse multa inania, verborum portenta, vanitatis commenta, præpostera. Pontifices verò, quibus obtemperarunt, fuisse caudas, Antichristos,*

Diabolos. Nimirum, vt præcedenti capite, Christianos Imperatores, Valentinianum, Basilium, Constantinum, multis conuitiis persecutus es ; ita nunc Catholicissimos Angliæ Reges non minori contumelia exagitandos esse censuisti. Quis iam non videt, Tookere, quod sæpe dixi, omnium Regum ac Imperatorum hostem te esse ; vnius Iacobi assentatorem ? Adeò, vt ne iis quidem parcas, qui hoc tempore, in Europa, rerum potiuntur : Regibus, inquam, Hispaniæ, Galliæ, & Magno Hetruriæ Duci ; quibus nescio, quam notam appingere ausus es.

6. De Præscriptione sic habes : *Quia autem latissimus campus hic proponebatur, in quo tua excurrere possit oratio, totus hic de præscriptione locus à te prætermisus est, quem leui pede transilis. Est autem præscriptio vel usucapio, acquisitio dominiij utilis vel directi, per continuationē possessionis, ac longi temporis lege definiti. Ad illam complendam quatuor requiruntur, continuatio possessionis, bona fides, iustus titulus, & quod res non sit vitiosa.* Audi, Tookere. Non opuserat, meam orationem excurrere in hunc campum de præscriptione. Eius rei duas rationes iam supra insinuavi. Vna est, quia præscriptio non habet locum in iis, quæ sunt iuris diuini.

At Pri-

At Primatus Ecclesiæ diuino iure pertinet ad Apostolos, qui Ecclesiam propria auctoritate gubernarunt, synodum indixerunt, legem sanciuerunt, controuersias diremerunt, vt supra tu ipse falsus es. Hoc ius diuinum haftenus mutatum non est, nec vlla hominum præscriptione mutari potest: Altera, quia si agendum esset lege præscriptionis, potior esset mea causa, quàm tua: Nam plures fuerunt Reges & Imperatores Christiani ante hæc tempora, qui agnouerunt auctoritatem Pontificis in spiritualibus, quàm qui respuerunt. Et Pontifex sine vlla interruptione, per tot annorum spatia, manet in continuata possessione, quod de Regibus Angliæ dici non potest.



CAPVT VII.

*An Rex ex propria doctrina
possit Primatum suum
defendere?*

1. **I** Nuenio duo principia in libello Regis, quæ si vera sunt, Prima-

matum suum tueri non potest. VNUM est (in quo convenit cum Bellarmino) quod, qui habet Primatum Ecclesiæ, possit creare & deponere Episcopos; dare illis iurisdictionem & auferre. Vnde Bellarminus, quia vult, Pontificem habere primatum totius Ecclesiæ, consequenter dicit, Pontificem in tota Ecclesia posse id facere. Rex verò, quia putat, vnumquemque Regem in suo Regno, & Imperatorem in suo imperio habere primatum Ecclesiæ; consequenter dicit, vnumquemque Regem in suo regno, & Imperatorem in suo imperio posse creare Episcopos & deponere; dare iurisdictionem & auferre. Quod autem Rex Angliæ ita sentiat, patet ex ipsius verbis. Sic enim habet in monitoria præfatione: *Primùm illud videamus, quàm longè Imperatores atque Reges, qui superioribus sæculis religiosè Christianeq; vixerunt, ab eo abfuerint, ut ius in se aliquod Pontifici esse crederent: cùm contrà, Papas ipsi creauerint,*

rint, in ordinem redegerint, adeoq; de sede deiecerint. Quibus verbis conatur ostendere, Pontifices olim non habuisse Primatum Ecclesiæ supra Reges & Imperatores; sed hos potius habuisse supra illos. Quare? quia potuerunt creare, in ordinem redigere, & de sede deicere Pontifices. Et paulò post: *Sed & per atates complurimas certum ius ac inuiolatum apud Imperatores mansit, Romanos Pontifices creandi.* Et in Apologia id confirmat exemplo Regum veteris Testamenti, *Qui, inquit, exauthoraverunt summum Pontificem, aliumq; in eius locum subrogaverunt. In summa, cuncta moderati sunt, quæ ad Ecclesiasticum regimen quoquo modo pertinerunt.* Eodem modo loquitur Sacellanus Regis in Tortura Torti: *Ad Regem, inquit, pertinet, Pontificem exauthorare, & in locum Abiathari Sacerdotem surrogare. Facit hoc, credo ad Primatum Regis.*

2. Alterum principium Regis est,

O

3

(in quo

(in quo dissentit, non solùm à Bellarmino, sed etiam à seipso, vt videbimus) quod Episcopi omnem suam iurisdictionem immediatè accipiant à Deo. Sic enim habet in monitoria præfatione: *Episcopos esse in Ecclesia debere, tanquam institutionem Apostolicam, ac ordinationem p oinde diuinam, contra Puritanos, contraq, Bellarminum semper sensi, qui negat Episcopos à Deo immediate suam iurisdictionem accepisse. Sed nihil mirum, à Puritanis eum stare, cùm Iesuite nihil aliud, quàm Puritanopapista sint.* Hic duo obiter notāda sunt. Vnum est, quod sermo sit de iurisdictione exteriori, de qua etiam quæstio nostra est. Hanc enim Bellarminus vult immediatè conferri à Pontifice; non autem potestatem ordinis, vel iurisdictionis interioris, vt patet lib. 4. de Pontifice c. 24. & 25. Alterum est, quod Bellarminus, cùm agitur de hac iurisdictione Episcoporū, nullo modo consentiat cum Puritanis, vt hic fal-

Hic falsò illi affingitur. Nam Puritani duo docent. 1. Hanc iurisdictionem conferri à populo vel magistratu seculari. 2. Æqualem esse in Episcopis & aliis Ecclesię ministris. Tollunt enim omnem ordinum distinctionem, & hierarchiam ecclesiasticam; & in omnibus volūt esse æqualitatem & paritatem. Hoc fatetur Rex in monitoria præfatione, his verbis: *Et quo studio in Episcoporum & ecclesiastica hierarchiæ defensionem semper incubui, eodem in confusam illam Anarchiam & Parilitatem Puritanorum inuectus sum.* Et infra: *Egone Puritanus qui suam Episcopis dignitatem restitui, & æqualitatem illam populare repressi?* At Bellarminus in utroque puncto ab iis dissidet. Nam PRIMÒ, non vult iurisdictionem Ecclesiasticam conferri à populo, vel magistratu seculari; sed immediatè à Pontifice, mediatè verò à Deo, vt disertè fatetur l. 4. de Pontifice c. 25. in solutione quartæ obiectionis. *Vtrumq;*, inquit, *nam ordo, quàm iurisdictionis, à Deo*

confertur: sed ordo immediatè, iurisdictione mediata. SECUNDO, vult Episcopos in hac potestate & iurisdictione, superiores esse aliis Sacerdotibus, qui Episcopi non sunt; & quidem iure diuino. Sic enim habet lib. 1. de Clericis cap. 14. Ecclesia Catholica distinctionem agnoscit, & docet iure diuino Episcopatum presbyterio maiorem esse, tum ordinis potestate, tum etiam iurisdictione. Et hoc probata autoritate Concilii Tridentini, & variis argumentis. Itaque toto, quod aiunt, cœlo distat à Puritanis. Sed hæc obiter. Nunc ad rem.


3. Ex his ergo duobus principiis, quæ ex libello Regis desumpta sunt, conficio hunc syllogismum, contra Regem: Qui habet Primatum Ecclesiæ, potest dare & auferre iurisdictionem Episcopalem, quibus vult, iuxta primum principium: At Rex Angliæ nō potest dare & auferre iurisdictionem Episcopalem, quibus vult: Ergo Rex Angliæ nō habet Primatum.

matū Ecclesiæ in Anglia. Minorem probo ex secundo principio, quia Episcopi omnē suam iurisdictionem accipiunt immediatē à Deo: Ergo non accipiunt illam immediatē à Rege: Ergo Rex non potest illam immediatē dare: Ergo nec auferre.

4. Hinc duo infero. PRIMVM est, quod Rex sibi ipsi cōtrarius sit. Nam vno loco dicit, iurisdictionem Episcopalem immediatē accipi à Deo: altero, eandem dari & auferri immediatē à Rege; quæ duo non cohærent. Vel ergo Rex non potest illam dare & auferre; & sic non habet primatum Ecclesiæ: vel si potest, falsum est, quod contra Bellarminum dixit, Iurisdictionem episcopalem immediatē à Deo conferri. Posterius est, quod Bellarminus, quem Rex oppugnat, consequenter locutus sit, quod Rex facere non potuit. Dixit enim Pontificem habere Primatum Ecclesiæ, & posse dare & auferre iurisdictionem episcopalem. Dixit etiam

hanc iurisdictionem esse quidem à Deo, non tamen immediatè ab eo conferri, sed mediante Pontifice. Hæc autem optimè cohærent.

5. Ex omnibus, quæ hæctenus disputata sunt, ita concludo; Rex Angliæ, nec iure naturali, nec iure diuino veteris Testamenti, nec iure diuino Noui Testamenti, nec iure ciuili aut canonico, nec consensu doctorum hominum, nec titulo legitimæ præscriptionis, nec ex principiis propriæ doctrinæ potest habere Primatum Ecclesiæ in Anglia: Ergo nullo modo potest eum legitimè habere. Faceßant igitur Sacellanus & similes adulatores, qui contrarium illi persuadent.



COMMENTARIVS.

IN hoc capite ex duobus principiis Regis Angliæ probaui, illum non habere Primatum Ecclesiæ. Vnum principium est, quod is, qui habet Primatū Ecclesiæ, possit dare

dare & auferre iurisdictionē Episcopalem, quibus vult. Alterum, quod Episcopi omnem suam iurisdictionem immediatē accipiant à Deo. Ex quibus sic argumentatus sum: *Qui habet Primatum Ecclesie, potest dare & auferre iurisdictionem Episcopalem, quibus vult. At Rex Anglia non potest illā dare & auferre quibus vult, Ergo non habet Primatum Ecclesie.*


2. Hic multum sudas, Tookere, vt succurras tuo Regi. Priori principio concesso, distinguis posterius, asserens, Episcopos habere omnem iurisdictionem à Deo, vel mediatē, vel immediatē: Et quidem iurisdictionem fori interioris habere totā immediatē à Deo; iurisdictionem verò exteriorem, partim immediatē à Deo, partim immediatē à Rege. Hanc distinctionē fuisse persequeris & inculcas. Sed frustra. Nihil enim profutura est Regi, quod sic ostendo: Quando Rex Angliæ dicit, Episcopos habere suam iurisdictionem immediatē à Deo, addit, se id dicere contra Bellarminum. Igitur, quid Bellarminus sentiat, videndum est. Is autem lib. 4. de Pontifice cap. 24. & 25. disertē docet, iurisdictionem interiorem immediatē conferri à Deo; exteriorem immediatē à Pontifice, & mediatē à Deo. Priorem partem concedit Rex Angliæ; posteriorem negat. Vult,

Vult, tam exteriorem, quàm interiorem, immediatè esse à Deo. Sic enim loquitur contra Bellarminum: *Episcopos esse in Ecclesia, tãquam institutionem diuinam, semper sensi contra Bellarminum, qui negat, Episcopos à Deo immediatè suam iurisdictionem accepisse.* Quæ posteriora verba debent intelligi de exteriori tantùm iurisdictione; alioqui falsa essent. Nam Bellarminus non negat, Episcopos accepisse interiorem iurisdictionem immediatè à Deo, sed apertè affirmat. Si ergo id, quod Bellarminus negat, Rex Angliæ affirmat, necesse est ipsum affirmare, quòd Episcopi suam iurisdictionem exteriorem immediatè habeant à Deo.

3. Iam ergo repeto argumentum, quod initio posui, hoc modo; Qui habet Primatum Ecclesiæ, potest dare & auferre iurisdictionem Episcopalem fori exterioris: Rex Angliæ non potest hanc dare & auferre; sed solus Deus, vt ipsemet fatetur contra Bellarminum: Ergo Rex Angliæ non habet Primatum Ecclesiæ. Quid iam prodest hîc tua distinctio, Tookere? aut quorsum ea necessaria est? Argumentum procedit de sola iurisdictione externa, de qua sola dissentiant Rex & Bellarminus. Hanc totam Bellarminus vult immediatè esse à Pontifice; Rex, immediatè à Deo.

4. Sed

4. Sed mirum non est, te hîc laborare, ubi agitur de ecclesiastica iurisdictione fori exterioris. Id vobis in Anglia commune est. Nemo in ea explicanda cum alio consentit. Ac tria potissimum sunt, in quibus dissidetis. Primum est, in quo consistat hæc iurisdictione exterior? an in sola potestate censurę seu excommunicationis, vt vult Sacellanus in Tortura Torti? an præterea in aliquo alio, vt tu contendis? Alterum, an Rex Anglię habeat omnem iurisdictionem exteriorem, & quidem *absolutissime* & *perfectissime*, vt tu asseris? an nullam planè, vt Sacellano, Thomsonio & Burhillio placet? an aliquam eius portionem, vt alibi tibi visum est? Tertium, an Episcopi accipiant eam totam immediatè à Deo, vt Rex cum Sacellano affirmat? an aliquam eius partem immediatè à Deo, aliquam immediatè à Rege, quod tuum commentum est? De hac re plura dixi, tum in *Refutatione Torturę Torti*; tum in *Dissidio Anglicano de Primatu Regis*.



CAPVT VIII.

*Quod sit ergo officium Regis
circa Ecclesiam?*

1. Ostendit

1. **O**stendi hætenus prolixè, Reges & Principes sæculares non habere Primatû seu iurisdictionem exteriorem in Ecclesia, ac proinde sua auctoritate non posse Ecclesiam regere, synodos conuocare, lites & controuersias fidei dirimere, Ecclesiæ ministros creare vel deponere, contumaces excommunicare: sed hæc omnia ad Episcopos & Ecclesiæ prælatos diuino ac humano iure pertinere. An igitur Regibus in regimine Ecclesiastico nihil reliquum est? An plane ab hac cura exclusi & immunes sunt? Dicam paucis, quod res est: & dabo Cæsari, quæ Cæsaris sunt: Deo, quæ Dei.

2. Ac PRIMVM illud statuendum est contra Politicos, Reges & Principes Christianos non ita debere sua regna ac prouincias administrare, vt omnem religionis & Ecclesiæ curam abiiciant, tanquam nihil ad se pertinentem, & vsurpent illud Donatistarum: *Quid Imperatori cum Ecclesia?*

Ecclesia? quod tantopere reprehendit Augustinus lib. 2. contra literas Petiliani cap. 92. Hoc enim & sacris literis, & bonorū Regum exemplis, & rationi ipsi contrarium est. Laudantur in sacris literis Daud, Ezechias, Iosaphat, Afa & Iosias, quod cultum ac religionem Dei, vel promouerint, vel restaurarint. Eorum exemplum in N. Testamēto imitati sunt Cōstantinus Magnus, Theodosius, Arcadius, Honorius, Carolus Magnus, Ludouicus, & alii. Contra verò, nō solum reprehensi, sed etiam puniti sunt, qui religionem & fidem contemserunt, vt Ieroboam, Achab, Achaz, Amon. Et ratio est, quia Reges, qui in sublimi potestate positi sunt, sicut ipsi ab inferioribus iure honorantur; sic Deum ipsum, á quo potestatem consecuti sunt, & cui iure naturæ subiiciuntur, meritò honorare debent, & ipsius gloriam ac maiestatem vbique propagare. Vnde A C A P I T V S ad Iustinianum Impe-

Imperatorem: *Honore quolibet subli-
miorem cū habear dignitatem, O Impe-
rator; honora super omnes, qui hac te di-
gnatus est. Deum: quoniam iuxta simi-
litudinem cœlestis regni, tradidit tibi
sceptrum terrene potestatis, ut homines
edoceres iusti custodiam, & eorum, qui
quasi canes aduersus ipsam rabiunt, in-
sectareris latratum, tum ipsius obtempe-
rando legibus, tum subditos tibi regendo
pro iure.*

3. SECUNDO statuendum est, eos-
dem Reges & Principes Christia-
nos, nullo modo in suis regnis ac
prouinciis debere admittere liberta-
tem fidei ac religionis, si impedire
eam possint. Hæc enim libertas pla-
nè illicita, & Christianæ doctrinæ
contraria est. Nam vt alibi dixi, mul-
ta in Euangelio sunt, ex quibus con-
stat, CHRISTVM vnā fidem man-
dasse; variā ac multiplicem pro-
hibuisse. Ac PRIMO, voluit vnā
tantū esse Ecclesiam, vnum ouile,
vnum pastorem, vnum baptismum.

Hæc

Hæc autem sine vnitate fidei consistere non possunt. SECUNDO, voluit discipulos suos attendere à falsis Prophetis; at in multiplici religione necesse est, alios esse veros, alios falsos Prophetas. Ergo, si hi excludendi sunt; fides vna retinenda est, varia explodenda. TERTIO, voluit Ecclesiam suam esse perpetuam, cui omnes inferiorum potestates resistere non possint. At perpetua esse non potest, si vna omnium fides non sit; quod ipse testatur Lucæ 11. 17. *Omne regnum in seipsum diuisum desolabitur.* Apostoli disertis verbis idem confirmant. Rom. 16. 17. *Rogo autem vos fratres, ut obseruetis eos, qui dissensiones & offendicula, præter doctrinam, quam vos didicistis, faciunt; & declinate ab illis.* Galat. 1. 8. *Licet nos aut Angelus de cælo euangelizet vobis, præterquam quod euangelizauimus vobis, anathema sit.* 1. Cor. 1. 10. *Obsecro vos fratres, ut id ipsum dicatis omnes, & non sint in vobis schismata.* 1. Cor. 14. 33. *Non enim est*

dissensionis Deus, sed pacis. Ephes. 4. 5. Unus Dominus, una fides, unū baptisma. Hebr. 13. 9. Doctrinis variis & peregrinis nolite abduci. Vides, quàm seriò, quàm sollicitè & grauitè hortetur Apostolus, vt vnitatē fidei retineamus. Quod non faceret, si libertas indulgeri possit. Plura in hanc sententiam dicta sunt in Disputat. De fide hæreticis seruanda, c. 10. Nūc illud solū addo ex Augustino epist. 66. Quæ est peior mors anima, quàm libertas erroris?

4. Quid ergo facient Reges circa Ecclesiam & religionem, si neque curam illius omnino reuicere, nec etiam libertatem indulgere possunt? Dicam verbo. Debent illam tueri ac defendere, non vt Domini, sed vt ministri: neque vt Iudices, sed vt executores. Hoc olim fecerunt Christiani Principes: Hoc verbo testati sunt. *Carolus Magnus*, vt alios omitam; apud Sigonium lib. 4. de regno Italiae, sic ait: *Si Ecclesiarum Dei seruis magnificētiam nostram impertimus,*
eorumq.

ecrumq; studiis libenter obsequimur: id nobis ad Augustalis excellentia culmen proficere credimus. Si, inquit, obsequimur Ecclesiarum DEI seruis. Obsequium offert; non arrogat sibi Primatum. Vult esse minister in defensione Ecclesiæ, non Dominus.


5. Idem *Carolus*, cum à *Leone* Papa coronam Imperii accepit, hac formula iurandi usus est: *In nomine Christi spondeo atque polliceor ego N. Imperator coram Deo & B. Petro Apostolo, me protectorem ac defensorem fore huius sanctæ Romanæ Ecclesiæ, in omnibus, quatenus diuino fultus fuero adiutorio, prout sciero poteroq;.* Refert *Sigonius* loco citato.

6. Et iam pridem usu receptum est in *Francia, Hispania, Anglia, Polonia, Hungaria*, ut simili iuramento obstringant se Reges, & nominatim promittat, defensuros se Ecclesiam ac religionem, eiusque Prælati debitam reuerentiam & subiectionem præstituros. Neque hoc quicquam

P 2 dero-

derogat ipsorum maiestati: imò perhonorificum est. Rectè AMBROSIUS epist. 32. ad Valentinianum Iuniorē: *Quid est, inquit, honorificentius, quàm ut Imperator dicatur filius Ecclesiæ? Imperator enim bonus intra Ecclesiam, non supra Ecclesiam est.* Et Theodoricus Italiæ Rex ad Ioannem Pontificem: *Sum quidem Iudex Palatinus, sed vester non desinam esse discipulus. Nam tunc ista rectè gerimus, si à vestris regulis minimè discedamus.*

7. Non ibo longius in hoc genere. Satis, opinor, iam constat, quam curam circa Religionis & Ecclesiæ defensionem habere debeant Reges & Principes sæculares. Hoc addo, non deesse exempla huius rei, etiam hoc tempore, præsertim in Francia, Hispania, Polonia, Belgio, Germania, Italia.



COMMENTARIUS.

1. **T**Ria dixi in hoc capite. Primò, Reges non debere omnem curam Ecclesiæ abdicere.

abiicere. Secundò, nec permittere libertatem religionis. Tertiò, debere tueri ac defendere Ecclesiam, non vt Dominos, sed vt ministros; non vt Iudices, sed vt executores. Quod dupliciter probaui. 1. Ex-

emplo Caroli Magni. 2. Ex formula iuramenti, quo Reges se obstringunt Ecclesiæ.

2. Duo priora puncta cōcedis, Tookere.

Circa tertium tergiuersaris. Ac primò, ad exemplum Caroli Magni, qui nō arrogauit sibi Primatum, sed obsequium Episcopis promisit, respondes his verbis: *Habebat Primatum re, sed obsequium nomine ac simulatione officii præ se ferebat.* Quid hoc est, mi homo? An putas, Imperatorem illum fuisse Puritanum, qui promitteret quidem Episcopis sua obsequia, sed verbo tantum & simulatione, non autem re ipsa? Vbiq̃ue in Imperatores iniquus es.

3. Secundò, ad formulam iuramenti, qua tum Carolus, tum alii Reges vsi sunt, respondes hoc modo: *Iuramenti formula non est pro Ecclesia Catholica, sed Romana Catholica.* Vix scio, quid velis. Si hoc vis, Carolum Magnum & alios Reges iurasse, se defensores, non totam Ecclesiam Catholicam, sed illam tantum partem Ecclesiæ Catholicæ, quæ Romæ est; partim erras, partim pro nobis facis. In eo erras, quod putes, iuramentum ipsorum ad vni-

cam tantum Ecclesiæ partem pertinuisse. Iurarunt olim, & nunc iurant, quotquot in Hispania, Francia, Polonia, Hungaria, sceptrata regalia suscipiunt, se veram religionem & Ecclesiam, non Romæ tantum, sed etiam in suis regnis, perpetuò defensuros. In eo pro nobis facis, quod agnoscas Ecclesiam Romanam, tempore Caroli Magni ac deinceps, Catholicam fuisse; quod alias soliti estis negare.

4. Tertiò, valde laudas Henricum VIII. Angliæ Regem: tum, quod acceperit titulum *Defensoris Ecclesiæ*; tum maximè, quod cum illius tituli rationem in Evangelicæ lucis crepusculo perspexisset, instinctu quodam diuinitatis exarserit ad religionem promouendam, & superstitiones euertendas, magna orbis terrarum admiratione. Quidquid sit de illo Rege, cui benè esse cupio, satis constat, non aliundè, quàm à Romano Pontifice (cui vos tam infensi estis sine causa) accepisse titulum *Defensoris Ecclesiæ*; nec alterius Ecclesiæ, quàm Pontificiæ, quam Catholicam appellamus; nec ob aliam causam, quàm quod contra Patriarcham vestrum Lutherum, Pontificiam Ecclesiam defendisset. Si postea defecit ab illius Ecclesiæ vnitatem, non instinctu diuinitatis, sed carnis ac luxuriæ, factum esse manifestum est. Nec orbis Christianus

mira-

miratus est, eum promouisse religionem, sed illius Ecclesiæ, cuius antea fuerat Defensor, deseruisse vnitatem; & illius Reginæ, quam legitimo matrimonio sibi sociauerat, repudiasse torum & cohabitationem. Nec id in lucis Euangelicæ, sed in hæresis Lutheranæ crepusculo accidisse, certum est.

5. Quartò, laudas Edouardum sextum, Henrici filium, his verbis: *Idipsum in Edouardo sexto, postea Rege, altero huius ætatis Gratiano, meminisse poterunt omnes, qui vt olim Gratianus gentilitiarum superstitionum hostis acerri-
mus, titulum & stolam Pontificiam aspernabatur, sic neque minimam falsi cultus vmbra, ceremoniamve fucatam, etiamnum puer patiebatur, primatu nihilominus Christiano sibi retento, quo salubris Ecclesia consuleret, ac in longitudinem temporis prouideret. Vt cætera omittam, quæ adulatoria sunt, quid obsecro intelligis per Primum Christianum, quem Rex ille sibi retinuit? Sine dubio, eundem Primum, quem à parente acceperat. At si Primatus ille Christianus fuit, cur illum hoc tempore non desertis vestro Regi? cur tanquam ludibrium vestræ Ecclesiæ pridem explosistis? Nam Edouardus quidē, vt patet ex ipsius rescripto ad Thomam Crammerū Archiepiscopum Cantuariensem, ratione sui Primatus, quem tu Christianum vocas, appellabat*

labat se *supremum in terris Ecclesiæ Anglicanæ caput*: quem sanè titulum vos nullo modo permittitis vestro Regi.

6. Quintò, laudas Elisabetham Reginā, quæ Henrici filia, Edouardi soror fuit. De ea sic scribis: *Vtriusque horum vestigia insecuta est, & patris & fratris, Elisabetha, nostræ, sed felicissimæ memoriæ, ac omni immortalitate dignissima Regina.* Utinam taceres de fœmina, quam nec sponsam, nec virginem appellare ausi estis. Mirabuntur posterì, fuisse aliquando tempus, cùm Angli, non modò in temporalibus, sed etiam in spiritualibus, vnius fœminæ arbitrio se submiserint, & illam tanquam supremam Ecclesiæ Anglicanæ Dominam ac caput venerati sint. Sed mittamus hæc. Nam parum ad rem faciunt.

EPILOGVS.

Quæ hætenus à me scripta sunt, vt in bonam partem accipias, Tookere, omninò abs te peto. Quamquam meritò queri non potes. Primò, quia maiori modestia in te vsus sum, quàm tu in me. Secundò, æquiore causam defendo, quàm tu. Tertiò, ego

DEI gloriam, & Ecclesiæ vtilitatem specto: tu vnius Regis gratiam & fauorem aucuparis.

FINIS.